


Aka (Hrusso) Bible



Hruso: Aka (Hrusso) Bible (Portions) for India

Aka (Hrusso) Bible

Hruso: Aka (Hrusso) Bible (Portions) for India

copyright © 2024 Bridge Connectivity Solutions Pvt. Ltd.

Language: (Hruso)

Contributor: Bridge Connectivity Solutions Pvt. Ltd.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025
6ed36eea-a167-5ded-a2d7-08d8d10b8e3c

Contents

Luka	1
Filemon	39

Luka i shi-ñu

Ġiwbraw

Bzūga go kako ġiwbraw na vyow vew a vetsü se ye he kako ye Luk i ġiw cheñe, sünda he kako yo danghuda i galyiw ksü go veksüw Kristan cheñe. Ñom-niti go homeje, i utro ġübye küġüw go da. I Tawgyew i shi-ñu truw nüna. I Tawgyew i shi-ñu seyo Tawgyew i shürhaw ná kako ġida. Ije Polus idra ye Kristan na chiġa daw Tawgyew ichi chiġa daw nüna (Kulu. 4:14, 2 Timu. 4:11; 11:1).

Ġiwbraw i djaga

Odje 60-80 kuw.

Luka i he kako i Kesriya ge ġilyeñe seyo Rome ge kakuñe ġimdzoadabi. Kako ġidaw dzaga na Betlehem, Galil, yahudiya seyo Yerusalemjo du.

Lajovo

Luka ubo yo Tawgyew i shi-ñu ye Tiyufilus i ġilyeda. Tiyufilus chemeje “Tawgyew i nülvo daw.” I Kristan i küġüw ma mo i lyaġoñ dawma se ye usu-upa yo madanghume. Luka i ġidaw ge i “Dyewfo” cheñe 1: 3 ge ġidaw i homeje i Roman gow babu dyew vedujo a du. Añe ge kako ngüdaw ná holaimaje he ye utro ġübye gojo du. Ichi ġidaw ge ana vedufodame, “Tawgyew i nüna” seyo “Tawgyew i ġadz” (Luka 5:24; 19:10; 17:20-21; 13:18).

Ha ma a vew

Jisu iñiñ lañe trumkoige, Luka i Jisu i “Nüna üsañe” cheda. I Tiyufilus i ana ġida, i ha ñu ná dadrüdama se na se i uw yo danghulafjodawe (Luka 1:4). Luka i ñiku-ñisüw djüngkoi ge i ġiw yo i kristan nabo hado chemeje Tiyufilus i danghulajobi Tawgyew i shüraw na nüna mauw mow cheñe.

Ñustu gow

Jisu - Nüna uw a.

Udrüla

Jisu i saw seyo ichi kutcho shüw ___ 1:5-2:52

2. Jisu i nüna nabo chiġa daw ___ 3:1 - 4:13

3. Jisu ġaksüivo übraw ___ 4:14-9:50

4. Jisu i kros ge jiw ___ 9:51-19:27

5. Jerusalem ge Jisu i lüshüw paw, dzüw seyo üshükülyetcho ___ 19:28-24:53

Luka i galyiw

1 Ñimko a ha ha lyilyedama, se ná nüna añe na galyiw ġipüñejoñe dada.

2 Sünda he ñu ná dju nudzoġ iñiyo hohusedama se naje, seyo, Tawgyew i shi-ñu truñe kahisedaw se naje, se ñu ná ütrüyomdo ñi trukuida.

3 Sünambo, no je ütrüyomdo, he na he i, usupa yo hoksüñe kalyisedaw no, süvzüw Tiyofilus bábo, he na he i magabolyiw ġi vyeimeje ujoñe vyeda.

4 Hado cheholye, bá ha trudrüyedama, se ná umsowgo ba danghuweñe no vyedame.

Dzakariya ñe Elizabet

5 Nugo Herodes i Yahudiya ñetrü go ñetrü nugo dañe shüi ñeto ge ana lyikülye: Abiya müga go Jakariya cheñe mügaw a du. Üfum ye, mügaw Arö yo samtolyyiw namko yo a, iñiñi ye Elishiba.

6 Sünda se naksü Tawgyew uvro ge chiñifoñe, seyo Prabhu ichi shotuko dügyew ná je da shüw. Üġü dadrüyedaw ná je madatruw-makitruw da shüw.

7 Sünda Elishiba i ügübzümdá naksü agü je ñiwbi. Sünda se naksü kewje keahubi.

Sorgomuko i yo Yohañ i sakülyew ñihowrü

8 Dzakariyas i i ñeñü ná daġañ kuwñe, Tawgyew uvro ge, i ñegru ge müga chew daw.

9 Sündada mügaw ná daw basha yo dañe kako dzulaw ge iñiñi kakülye, Tawgyew i küġüw ñegru ge jiñe shobrovzü foweñe.

10 Sündada shobrovzü fomkoi sese vyew na nopsü ge kahuañe küġütsü.

11 Sese Tawgyew ichi sorgomuko a ye shobrovzü fodaw südzüvyepsüġ vyego psüġañe ge gudzükülyedaw ye, i hohu.

12 Sünda Jakariya i hoglye šüpo lamosha, sünda i ġew vyehua.

13 Sešo ye sorgomuko i i che, “Jakariya, djuġejodawe hado chemeje bá küġüdaw ye dzühujemme sündada bafum Elishiba yo babó saw a sakülyejome, sünda ba se iñiñi ye Yohañ ñe ñijodawe.

¹⁴ Sûnda ba agü saahuñe şüpyo lûshûñe, lûshûmfoajome seyo şüpyo nûna na agü sadabi cheñe lûshûjome.”

¹⁵ Hado chemeje i Tawgyew üvro ge sawlyiw chiñifojome; seyo tsü keje matujome; seyo iyañ ulhu ge duluge yo ğulo ğüdraw yo ğüdraavojobi.

¹⁶ Seyo Israyel yo naje şüpo nûna na Tawgyew ichi ge kakultrujome.

¹⁷ I ñihow Eliya í ğulo seyo küña dafidama dañe üvro üvro kutrojome hado chemeje awu na na üdrü-ulu ye agü nachi ge tchodügyejo; seyo zew chew madzüw na Tawgyewchi ge chiñidrûñe lakujo sûnda Tawgyew ibó dafimsofiw dashütrüvojo.

¹⁸ Jakariya i sorgomuko í dzü, hei no kûnda danghujowa; hado chemeje nobó mukroad-abi seyo nofum boje mukromyadabi.

¹⁹ Sorgomuko i í trutchi, “No Gebriyalwa, Tawgyew ichi mukow kewwa sûnda üdra gudzusaw ye wa; sûndada nó badra chitruweñe seyo bá he ñu ye truweñe kiadaw yewa.

²⁰ Seyo hojo dawé, he ñu ye umsow makalu kuw ba mulyo ğyojome, sûnda mazefijomme, hado chemeje ba nó ñu ye, i ke damdrûñe dafiajoma, sei umsow mavye.”

²¹ Nûna na Jakariya í ğyokrütsü, sûnda mavyenghuahuw lyatsü, hado cheme ñegru ge aña kûnda uwalajemañe? Vyeñe.

²² Sûnda i ñopsü kahudadabi abó ñu mazefibi, sûndawñe na danghuladabi i ñegru ulunge hama ñita homadadañe, sûnda i sei vyeġelalye seyo mulyo lyadabiñe.

²³ Sûnda i sehu datunofiahuñe i í ñe ge katcho.

²⁴ Setasaġa yo ifum Elishiba somafobi, sûnda hubye pom kuw i nudzoġ ana cheñe müşüñe vye.

²⁵ “Nûna nafo ge nó bûmazeamedañe nobó Tawgyew i he ñeto ye ana daidawa.”

Sorgomuko i mariyam itrü a jiku

²⁶ Elishiba agü ñiw yo hubye ġe kuw sa a Tawgyewchi go sorgomuko Gebriyal i Galili iñiñi Nazrat ñetrü ge,

²⁷ Mimsa nano makaw a ichi ge kiku. Djú Joseb cheñe Dawud í ñeşü go Muhusa a idra ğulo daida, se nano makaw mimsa iñiñi ye Mariyamwa

²⁸ Sûnda Sorgomuko i ichi ge ñelunge jimyoñe che, ba hu je adjüdüw no je aġimiw lûshütukoaiwe, Djú Tawgyew i nûlvow tukoaidama! Tawgyew i badraşome.

²⁹ I se ñu yo şüpyo ġelamoag, sûnda vyemche, hei küna ñu a djüjemma?

³⁰ Séso Sorgomuko i í che, Mariyama; djuġejoda, hado cheme Tawgyew í nûlvo bá tukoaidawa.

³¹ Sûnda hojodawe, ba somafojome, sûnda ba saw a sakülyejome, ba iñiñi ye Jisu ñe ñijodawe.

³² I şüġlyiġjome; seyo bá Soġgro-yaloñe üsaw chejome; sûnda Tawgyew i í awu Dawud i psüġa ye i djüjome.

³³ Sûnda i Yakub í ñeşü ge şhüwa nugo da şhükejome; sûnda í ġadzü da şhükyew ye keje mamütrajome.

³⁴ Mariyam i Sorgomuko í che, “Hei kûnda lyijowa? Nobó muhuje madanghulubi.”

³⁵ Sorgomuko i í trutchi “Ġulo ğüdraw ye baso ge kamyojome, seyo Toġgroyama í Ġagra ye badru ge duñgudrujome; Hado chemeje í ğulo ğüdraw yo sakülyalaibi, í Tawgyew üsaw chejome.

³⁶ Sûnda hojo dawé, bá ñeşüġ go Elishiba i je mukromyadabi a saw sakülyemkoiba, hei ichimsoba i na Üġübzüm chebabi, i so mafow hubye ġe kudaba.

³⁷ Hado chemeje Tawgyew ichi ge ha ñu je madafiwo che ñiwoe.”

³⁸ Mariyam i che, “Howe, no Tawgyew i chiġadambabi, bachi ñu trudo trüduyo dubroñe nodra ana lyimeje.” Sese sorgomuko ye itrü yo katrükralye.

Elizabeth ichi ge Mariyam i jiw

³⁹ Sûndaw se ñeto Mariyam i kutcho yo gudzüñe pufo go Yahudi na ñetrü a ge ji.

⁴⁰ Sûnda Jakariya iñe ge jiñe Elishiba í gagañe da.

⁴¹ Elishiba i Mariyam ichi gaga chewye dzühuhuwñe, seşüġudoye ulhu go agü yeje gog, sûnda llishiba i ğulo ğüdraw yo tukoa.

⁴² Sûnda i gow yo şoġzüñe che, ba mim naġi yo süvzüfowmme, seyo balhu go sheje ye şüvzüw me.

⁴³ Sûnda noje hango yo nûlvoyema, no Tawgyew üyañ ye notrüġań a jikuda.

⁴⁴ Sûnda holabya bachi gaga chew ye nofu ge dzühubyo dzühügyowñe seşüġudo ye nolhu go agü yeje lûshülye gogje.

⁴⁵ Sûndada seiye şüvzüwmmme, se í djuyo umsow vyeñe Tawgyew ichi go, ha ñu ye idra chedama, sei damsojebi.

Mariyam i Tawgyew í troi.

- 46 Sese Mariyam i che, “Nodrü-nolu yo Tawgyew i troime.
 47 Sûnda noĝulo ye, nó gudraw choakejo Tawgyew yo lûshû damme.
 48 Hado chemeje i í chigadam idru ge nûlvo hoida, sündada holabya, ayo dalalye shûwa shûw
 pumnûshûgi kuw nûna na nó şûvzûbram chejome.
 49 Hado chemeje se bolugobraw Tawgyew i nobo chiĝa dew dew daida, sündada iñiñ ye
 ĝudraw me.
 50 Sûnda i nûlvo ye se nadra jome, dju í ĝeima, saltso saltsow daw kuw sûnañgudrujome.
 51 I í bolugow ye sheiwa, seyo dju nudzo drû-lu ge dafowşoñe daima sena daame-kiame vye.
 52 I shotuko dûmbraw na psûga go dûgaaha; Sûnda nûlvodaw i udruda vye.
 53 Luhuşûmgraado na gañ uwyo da djû, séso dzomo-kûlyimodaw na ũgzû ufobûla lyadûgye.
 54 I í nudzoĝ aki-awu na, kulo Israyel na ĝaksûla, hado chemeje se nûlvo ye bûvyesûdañe.
 55 Shûwa Abraham ñe i saltsoahuw nadra shûwa duñgudrujo, I kûna ñi bupye-ñipye nadra
 chedama sûna.”
 56 Mariyam i hubye dzû kuw idra ĝyoselyeñe, i ñe ge katcho.

Yohañ Baptisma djûw i sawfo

- 57 Sese Elishiba i samdrû kudabi, sûnda i saw sakûlye.
 58 I ĝafopsûĝ-ĝampsûĝ seyo i ñeşûĝ-ñepeĝ na sei dzûhulye, Tawgyew i idru ge şûpyo nûlvo
 dadañe, idra ye lûshûtuno.
 59 Sündalye ana a dadawa ñegi şûgzû kuwñe se agû í fyuw ñeto kudabi sûnda i ñiñi ye ichi
 awu Jakariya í iñiñ ye ñiweñeda.
 60 Séso iyañ i che, mowwe; i ñiñi ye Yohañ ñe ñijo dawé.
 61 Sûnda na í che, bá ñeşûĝ ge ana ũñiñi djuchije ñiwa.
 62 Sese i ichi awu i damcheñe dzû, ba iñiñi í ha ñiĝoñda?
 63 Sündawñe í ĝijo kako prûlañe ĝiag, iñiñi ye Yohañ me, sündawñe vyew na mavyenghu-
 atsûg.
 64 Sündawñe ichi umdzu ñe zebûla naksû seşûgudo ye zefikûlye; Sûnda i ñu zehuahuw ye
 Tawgyew i trokûlye.
 65 Sündawñe iñisa ye ĝyodo na vyew ĝemoatsû; sûnda se ñu ye vyew se Yahudiya nachi ñetru
 ũñisa ũñisa naje şûĝeatsû.
 66 Sûnda vyew dzûhudo na nudzoĝ nudzoĝ drû-lu ge vyelatsû che, “He agû ye
 kûnajeşoma?” Hado chemeje Tawgyew i ũgzû ye idra dubi.

Dzakeriya í ñihow

- 67 Sûnda iyaw Jakariya i ĝulo ĝudraw yo tukoa, sûnda ñihokûlye.
 68 Israyel go Tawgyew í şûvzûwe.
 Hado chemeje i í nudzo nûna ná hokrûvo,
 Sûnda ná ĝaksûivo,
 69 Seyo i kulo Dawud i ñe ge ñibo muchoaijo hosûw ũşûvzû a lahuaida.
 70 Sûnambo i bzûga yomdo ĝudraw ñihow truw bupye-ñipye nayo, dju ñedzû ũña no ũña gomdo
 dulyisema, senayo trulyeida.
 71 Chemeje ñi vyeñiw-vyeĝaw nayo, seyo ñi homsûsew nagzû yo ñi muchoaida;
 72 Sei ye ñi bupye-ñipye na nûlvo dañe nudzoĝ ĝudraw ñu i vyesûweñe,
 73 Seyo se trasĝa sei, se í i ñi awu Abraham yo todaye,
 74 I ñi hei djûjo, sei ye ñi vyeñido nayo kahajoñe,
 75 Ivro ge chiñiw seyo ĝudraw ĝabo kaw ge şûdzowkuw maĝew ichi chiĝa dañgudruweñe.
 76 Seyo ba ye muhusa agûsa, Toĝgroyama i ñihobraw chejome, hado cheme ba Tawgyew ichi
 ĝabo dashûtrûvojoñe uvro uvro kutrojome,
 77 Sei ichi nûna na djumuchoawe, dju, ná lalo yo ĝudraw pawma.
 78 Hei ñi Tawgyew í nûlvo dado yo lyijome, seiyo ñidru ge udrugo yo mûsaw a dzûto-
 rûnokûlyejo.
 79 Sei ye nukuĝuw seyo dzûjo ĝabo ge ĝyodo na mûsaw djû, seyo ñishi í lûshûw ĝabo gudow
 lakutrokewe.
 80 Seyo se muhusa angasa ye Yohañ, şûlyifi şûlyi seyo ĝulo ge gokûlyefi gokûlye seyo
 Israyel ge kakujo ñeto kuw i bye ge ĝyo.

2

Betlehem ge Jisu i saw

- 1 Se ñeto ge ñubyu Kesar Agastas ichivye gow shotuko-kunu kihua, vyow Druguw-Drulyiw
 gow ĝadzû-ĝaĝi nañiñ ĝimyoewñe.
 2 He uvromashû iñiñ ĝimyoew ye ñubyu Keriniyas í Siriya gow dûmbraw dadaw ñetow ge
 daw.
 3 Vyew na nañiñ í ĝimyojoñe nudzo-nudzo ñetru ge katsûkûĝatsû.

⁴ Sūnda: Joseb je Dawud i ñešū go ūšū umu, sūndada i Galili go Nazrat ñetrū yo kañe Yahudiya ge Dawud i ñetrū Betlehem ge ka.

⁵ I iñiñ ġimiyow, í goidaw Mariyam dju so mafoma idra jisa.

⁶ Na Betlehem ñetrū ge dulu ge, i agū sajo ūmdrū kuadabi.

⁷ Sūnda i agū ūsaw samkyo a saa sūndañe í gyeke ge ġūshūñe káko ge zua ve, hado chemeje nabo sūge ñe ġyojo mapa.

Fugulu ġokrūw nabo soġgomuko í ñu kidaw

⁸ Seyo se ñetrū a kūña fugulu ġyokrūw дума, se na ñegi ge vi ge ġyoñe ná hokrū ġow.

⁹ Seyo Tawgyew i sorgomukow a namgkow ge gudzukūlye, sūnda Tawgyew i ġagra namgkow ye dubrokūlyeg, sūndawñe na šupo ġeatsūg.

¹⁰ Sūndawñe sorgomukow i na che, “Dju ġejo dawew; Hado cheholye chemeje, howe, no tuġu-tumo vyow nabo šupo lūshūw ñu a trujome.

¹¹ Yow ñubyu Dawud i ñetrū ge djobo muchoaijo a sadame, sūnda se i Prabhu Masime.”

¹² Sūnda se ye ba chi shewme, sei ye ba agū a ye gye ġūshūñe seyo káko ge zuw hohujome.

¹³ Sūndawñe sorgomuko a ūdra ye soġgomuko upua a Tawgyew i iñiñ la troñe ana chew hohuda,

¹⁴ “Ñedzū ge Tawgyew í ġūdźūw sūnda no ge se tuġu-tumo na ġūdźūw djūwe djū ñedzū Tawgyew i uw veima.”

Fugulu ġaksūw na Betlehem ge jiw

¹⁵ Sorgomuko i natrū go soġgo ge katralyewñe, fugulu ġaksūw na ġūtchū cheġi, “Tchow, ñi Betlehem jiñe he ñu chedaw i, seyo Tawgyew i trudaw i, hobo.”

¹⁶ Sūnda na mekutcho djeñe Mariyam ñe seyo Joseb naksū ūtrū ge anga i káko ge vedaw hohu.

¹⁷ I holyeñe na se anga ufo gow na ha trudama se ñu chedaw na tružeġiatsū.

¹⁸ Seyo vyew dzūhutsūdaw na fugulu ġaksūvw na ñu trudaw yo mavenghuatsūg.

¹⁹ Sešo Mariyam i he ñu na ūdrū-ulu ge veñe vemchepūñe.

²⁰ Sūnda fugulu ġaksūw na ná kūna trudama, sūnambo vyew dzūhuñe hohuñe Tawgyew i trolyeñe lūshūñe katsūtcho.

Jisu ichi fyūñe seyo iñiñ ñiw

²¹ Ñegi šūgźū kufiahuñe, seyo i Jisu i mūkraksūw fyumdrū kuadabi, sūnda iñiñ Jisu ñe ñi, he iñiñ ye sorgomuko i uluhudrū ge mañilugomdo djūlyedabi.

²² Sūnda Musa i shotuko dalyedaw yo Mariyam i ġūdraw ġyow ye ġomdzoahuwñe sūnda Joseb ñe Mariyam naksū i Tawgyew uvro ge shew Yarusalem lañe jike.

²³ Tawgyew i shotuko ge ġimbo: “Vyew saw samkyo na Tawgyew ibó ġūdraw vyejome.”

²⁴ Sūnda Tawgyew i shotuko dalyedaw go chemeje, “Ašūm osa ksū, momeje paġusa ūsasa ksū lañe kūġūwe.”

Simon i ñi-how

²⁵ Se ñeto ge Yarusalem ge Simon iñiñ yo nūna a duw, sūnda i ġūdraw nūna seyo Tawgyew i kūġūw nūna, sūnda Israyel ge ġūdźūjo i ġyokrū, seyo ġulo ġūdraw ūdra dusa.

²⁶ Sūnda ġulo ġūdraw yo truhua, ba Tawgyew i saw Masi í mahohulu, ba madźūvźjome.

²⁷ Sūnda í Ģulo Ģūdraw i ñegru nopsū ge jidūgye; sūnda iyaw ñe ūyañ naksū se agūsa Jisu ibo, ahogo shotuko na dajoñe veñe lajikedaw sesse,

²⁸ sūnda Simon i angasa í lolalyeñe, Tawgyew í troñe ana che:

²⁹ “He Tawgyewwa, ba ñu chew kudabi, bá kulo í ba ġūdźūw yo kadūgyejodabe;

³⁰ Hado chemeje noñi yo ba muchoadūgyedaw ye hohudamme.

³¹ Djū ba vyew druguw-drulyiw gow nūna na hovow sa a dadrū kikūlyadama.

³² I utro sama nabo umsow truhoahuw mūsaw da kakūlyajome, sūnda Israyel go djo nūna nabo lūshū-lūbajome.”

³³ Sūnda ūyaw ñe ūyañ naksū ubo gow ñu chedaw yo mavenghuatcheseñgudru.

³⁴ Sūndawñe Simon i í gaġūzū djūñe, ūyañ Mariyam í che, “Howe, i Israyel go na gaañe seyo pūlyidūgye go, seyo ana a chi shedūgyejoñe ġyokrūdūgyeda, seifo go ñu zeġjome.

³⁵ Sūnda ba ġulo je vetsū yo vudūga-vudūga dajome. He yo šupo na drū-lu ge vedaw na truhujome.”

Hanna i yo trudaw ñu

³⁶ Sūnda Asher ġūbye go Fanual ūsam a duw iñiñ Hanna, i ñihow trum: I šupo mukrombi, I ūlshi dzūwñe ūdra gźū daw yo odje mro kuw shūfisawba.

³⁷ I odje šūgźūġūtrū psūġi gow mūjem: sūnda ñegru keje matrahaw ñegiw-ñetow drūpsū-ñilyi mañiw seyo kūġūñe ġyonggudruwba.

³⁸ Sündä i sehu ñeto süge jikuñe Tawgyew i drü-lu yo uw che, sünda vyew ná, dju Yarusalem i yo muchoajofne gyokruvodaw na, ifo go ñu trumyokülye.

Josep ñe Mariyam naksü ñe katcho

³⁹ Sündä na Tawgyew davyedaw shotuko ügü ye vyew damdzoahuwñe sese Galili ge nudzoğ ñetrü Nazrat ge katcho.

⁴⁰ Sündä angasa ye nugow Iya, sünda bolu dukülyebi, seyo patsü-sholu tukoaha, sünda Tawgyew i nülvo üdra sa dusa.

Angasa Jisu ñegru ge

⁴¹ Üyaw ñe üyañ naksü oje drü-drü Yarusalem ge Fasa rhano ge jinggudru.

⁴² I oje güyo ksü kuwñe, na rhano ge ġidaw ñom í daw Jerusalem ge ji.

⁴³ Sündä na vyew ñegi gyomdzolye sese katcho, se angasa Jisu Yarusalem ge ġyotralye; sei üyow ñe üyañ naksü madanghu.

⁴⁴ Na ana veñ, i upu jiw nadra dusamada, ñegi a kapseajebi: sünda na í nadraw seyo na ñeşü nangko ge tchüpüñe.

⁴⁵ Sé matchülawñe na tchü-tchüñe Yarusalem ge katcho.

⁴⁶ Seyo ñegi dzü sefum ye na í ñegru nopsü ge dadrüw nangko ge ġyosañe, ná ñu dzüñe seyo naje i chi dzü ġyodaw hohu.

⁴⁷ Seyo küña na i ñu truw dzü ġyodama, se na vyew í danghuw yo seyo i ñu hutrow yo mavenghuatsü.

⁴⁸ Sündawñe na í holyeñe mavenghualyeñe seyo üyañ i í che, “No sawwa, ba ñidra ana hado daña? Howe, baw ñiksü ba tağaw na veduw tchü ñegiaha.”

⁴⁹ I í che, “Ba no hado tchüña? Hadoma madanghuma, no nó awu i ñe ge dujobabi cheñe?”

⁵⁰ Seşo i í ha ñu chedama, i se i madzüsüla.

⁵¹ Sündawñe i üdra kasa, sünda Nazrat ge kaku, sünda na chew dzü ġyosa; sünda üyañ i he ñu ye üdrü-ulu ge ve.

⁵² Seyo Jisu i patsü-sholu seyo udru ge lyifyly sünda Tawgyew ñe nuna naksü ubo yo go şhülyi.

3

Yohañ Baptisma djüw ichi shi-ñu.

¹ Nugo Tibiriyus Kesar ñetrü nugo dañe oje ġütrüpom kuw sese, seyo Pontus Pilatus i Yahudiya go ñetrü nugo da şhüi sese, seyo Galili ge Herodes, sünda üñu Filip Ituriya seyo Trakonitis go nugo da şhüw sese, sündalye Abilene ge ye Lisaniyas go nugo da şhüw sese.

² Seyo sese Anasñe Kefas naksü müga gow, seta-seğa Tawgyew ichi shi-ñu ye, ge bye ge Jakariya ichi üsaw Yohañ ütrü ge dzühuku.

³ Sündalye i Yordan hu itrügañ go vyew ñetrü-ñetrü ge jiñe, lalo muchojoñe drü-lu ye vyegudoweñe baptisma ifo ye truzekülye.

⁴ Yasaya i ñihow truelyedaw shi-ñu kako ge ġidaw ye:

“Bye ge shogzükülyedaw nuna i ġuksüwme he i:

“Tawgyew i ġabo dashütrüvowe, i ġabo í gudow davowe.

⁵ Kagüguahuw küñama kazeġiyijome,

Seyo pusa je lüñew daajo;

Seyo üküngüw ná gudojo, lüvzüw lüñew ġabo

Sena ġabo rhugro lyijome.

⁶ Seyo uso duw chebiw ye vyew Tawgyew i muchoaihuw hohujome.”

⁷ Dju upu dyam na ichi ge baptisma lajoñe jihuañe jikutsüdaw na, se na i che, “He byu üsa nawa, djö dju truda, he kalai lusuvyuw yo ġe jehuatsüwe che?”

⁸ Drü-lu vyegudofilaw kuw sheje lakuwe: seyo nudzoğ-nudzoğ drü-lu ge ana djuvyelajo dawe, se ñi aki-awu ye Abrahameñe; hado cheme no dju chengkoime, Tawgyew i he kunu yo je Abraham ibo mulo lakülyefijobame.

⁹ Seyo ya bo puğje ye shoñ ükrütrü ge vyedabi, sündada ha shoñ ye sheje uw yo majema, se na poskealye mi ge foahuebabi.”

¹⁰ Seyo nuna na í dzü, “Sename ñi ha dajowa?”

¹¹ I ná tru, “Djuchi ge polu ksü duma, se djuchi ge ñima se i djüwe seyo djuchi ge tsajo duma, se naje süna datsüwe.”

¹² Seyo patso-law na je baptisma law jiku, seyo í dzü, “He dadrüwwa, ñi ha dajobyas?”

¹³ I ná trutcho, “Dju djöbo ġyokrüima, se i fojelüzbüw patso djulajo dawe.”

¹⁴ Seyo rhünakew na je í ana dzü, “Ñi ha dajobyas?” I ná chetcho, “Djudru ge je külü djujowe, seyo mülaw-mütraw djufajo dawe, seyo nudzoğ chiğa dadaw ge lüshüjo dawe.”

¹⁵ Sündä nūna na se í vyeksūñe ġyomkoi sese, seyo vyew na nadrü-nalu ge Yohañ ifo go vyemkoi, haña he ashá he i Masi mošomachañe.

¹⁶ Sündawñe Yohañ i vyew ná che, “Nób djo hu yo baptisma djüwbame, sésöye i kalaime, dju nó cheje saw-lyiw bolufowme; no ivro ge ichi shita udro tashaijoje ugō ñiw sünabame, se i djó ġulo ġüdraw seyo mi yo baptisma djüjome.

¹⁷ Ichi chiaġi ye ichi ügzü a me; seyo i í ñetchü ye uw yo dagüdrajosome; seyo pulgü tcholadaw na üšaka lakeġijome, sésö ügüťchü na ye mi ge foajo se mi ye keje madzoñojajo.”

¹⁸ Sündalye i nūna na dadrüñ-dadrülye shi-ñu uw je trusejome.

Herodas i Yohañ í pache ge kiw

¹⁹ Sešöye i psüġimko yo ñetrü a go nugo Herodes í iñuw Filipus ufum Hirodiyas ifo go, vyew lalo datruw nafo se na sei í dadaw na fokülye.

²⁰ Sündada Hirodes i vyew naġi yo je i fow lalo je datru, Yohañ í pache ñe ge shü vyewe che.

Yohañ yo Jisu í baptisma djüw

²¹ Vyew na baptisma latsüwñe, seyo Jisu je baptisma lalyeñe küġü ġyo, sündawñe ñedzü müsaag.

²² Seyo ġulo ġüdraw paġusa veduw ye uso dañe idru ge ġudrokülya, sündä ñedzüdru go ñu zekülye “Ba nó sawme, ba yo no šüpo lüshüdame.”

Jisu i galyiw

²³ Jisu i shi-ñu trukülyewñe, sese i oje dzüġü kuw. I Joseb üsaw (nūna na ana vedabi), seyo i Eli ichi,

²⁴ Seyo i Mattat üsaw, seyo i Lewi ichi, seyo i Malki ichi, seyo i Jannai ichi, seyo i Yusuf ichi,

²⁵ Seyo i Mantiyah ichi, seyo i Amos ichi, seyo i Nahum ichi, seyo i Asaliya ichi, seyo Naggai ichi,

²⁶ Seyo i Mat ichi, seyo i Matiyah ichi, seyo i Simi ichi, seyo i Yosek ichi, Seyo i Yoda ichi,

²⁷ Seyo i Yohañ ichi, seyo i Resa ichi, seyo i Jarubbabel ichi, seyo i Shaltiyel ichi seyo Nari ichi,

²⁸ Seyo i Malki ichi, seyo i Adi ichi, seyo i Kosam ichi, seyo i Almadam ichi, seyo i Er ichi,

²⁹ Seyo i Jisu ichi, seyo i Aliyejer ichi, seyo i Yorim ichi, seyo i Mantat ichi, seyo i Lewi ichi,

³⁰ Seyo i Simon ichi, seyo i Yahuda ichi, Seyo i Yusuf ichi, seyo i Yonan ichi, seyo i Eliyakim ichi,

³¹ Seyo i Maleyah ichi, seyo i Minnah ichi, seyo i Mantat ichi, seyo i Natan ichi, seyo i Dawud ichi,

³² Seyo i Yise ichi, seyo i Obed ichi, seyo i Boj ichi, seyo i Salmon ichi, seyo i Nason ichi,

³³ Seyo i Amminadab üsaw, seyo i Arni üsaw, seyo i Henson üsaw, seyo i Peres üsaw, seyo i Yahuda üsaw,

³⁴ Seyo i Yakub ichi, seyo i Isahak ichi, seyo i Abraham ichi, seyo i Terah ichi, seyo i Nahor ichi,

³⁵ Seyo i Sarug ichi, seyo i Rawu ichi, seyo i Peleg ichi, seyo i Eber ichhi, seyo i Shilah ichi,

³⁶ Seyo i Kenan ichi, seyo i Arafzed ichi, seyo i Shom ichi, seyo i Nuha ichi, seyo i Lemek ichi,

³⁷ Seyo i Matushilah ichi, seyo i Hanok ichi, seyo i Yirid ichi, seyo i Mahalleh ichi, seyo i Kenan ichi,

³⁸ Seyo i Enosh ichi, seyo i Shet ichi, seyo i Adam ichi, seyo i Tawgyew ichi üsawwa.

4

Jisu í purkya

¹ Sündä Jisu i ġulo ġüdraw yo tukoañe, Yordan hu go kakutcho; seyo ġulo yo bye ge laġüşhi laġüşhi vye;

² Seyo ñegi piġü kuw mütü na dakütso-kikütso ho. Se ñeto ge i haje-haje matsa-matuw seyo se ñeto kamdzohuñe, sese i luhušüku.

³ Sündañe mütü ye í che, “Sünameje ba Tawgyew üsawšommeje, he kunu ye cheha odje lyaweñe.”

⁴ Jisu i í trutcho “Ġidame, nūna na odje yo aka mashüjome.”

⁵ Sündatchowñe mütü ye í la djeketcho sündalye lüġañe pu udru gow vyew druguw-drulyiw go ñetrü ná shemdzoa.

⁶ Sündalye mütü chetcho, “No he na he i vyew bá übraw daweñe djüjome, sündä no ġagra djüjome, hado cheholye he na braw nobabi, seyo no dju djüġoñdama djüñfijabame.

⁷ Sündada ba nó küġümeje, he na vyew bachi lyajo.”

⁸ Jisu i í chetcho, “Ana gídame: ‘Ba bá nudzoğ Tawgyew í gaga dawē; seyo í kűğűjo dabawē.’”

⁹ Sündatchowñe i í lalye Yarusalem go kűğűw ñegru ñelűtsű udru ge lalyi vye, sűndalye í che, “Sűname ba Tawgyew űsašommeje, babraw bá nudzoğ he ayo űla ge gaawe.

¹⁰ Hado cheme gídabi, ‘I bábo í sorgomuko ná babo ğaksűweñe dűgyejome’

¹¹ Seyo ‘I bábo űğzű yo lolajobame, hado chemeje bá gaañe kunu ge bashi í madpűgyejoye.’”

¹² Jisu i í chetcho, “Ana je chedame; ‘Ba nudzoğ Tawgyew í dafimsoima djuhojo dawē.’”

¹³ Műtű ye í dafiyima madafima da hopűñemdzoahuñe, sűndawñe memja kuw űtrű yo kahatrűkralye.

Galili ge Shi-Ñi trukűlyew

¹⁴ Sündatchowñe Jisu i Ğulo Ğűdraw yo tukoañe, Galili ge katcho, sűnda ífo go ñu ye űñisa űñisa yo kűña ñetrű duma vyew dzűhuzeğiatśű.

¹⁵ Seyo i sűge Tawgyew i kűğűw melye ñe ge truw ñe ge shi-ñu truğudru, sűnda vyew na í trotsűkűgatśű.

Nasrat ge Jisu i mağoñiw

¹⁶ Sűndalye i Nazrat ñetrű ge jiku; hayo sa a í dalañe shűkyedama sese; seyo í nudzoğ daw űğű dajo ge ğyogow ñeto kuwñe kűğűw ñegru ge jiñe kako ngűjoye gudzu.

¹⁷ Ñihow Yasaya í ğilyedaw kako ye í djű, sűnda i kako ye tahalye, hayo sa a ğídama se i lakűlye:

¹⁸ “Tawgyew i ğulo ğűdraw nodra dume, Sűndada i sapse na shi-ñu truweñe nó lakűlyedame, Seyo nó ana dawēñe kiadame, kűlyidaw ná shaaweñe, Seyo űñi ğew ná hofidűgyeweñe shi-ñu na truñe, Seyo dűgrűlyadaw na lahuaiweñe, Seyo Tawgyew ichi lűshű ğyoyo oje í shi-ñu trujo.”

²⁰ Sűndalye i se kako ye pyelyealye í shűrhaw űğzű ge djű, sűndalye ğyoag: seyo se kűğűw ñegru yo nűna na í homdzoatsű.

²¹ Sűndawñe i ná che, “Yow he ğídaw ye djovro a damdzojemme.”

²² Seyo vyew na í umsolyeñe vyeatsű, seyo ha shi-ñu ye i umdzu yo zehuahima, se na i djűhulye vyengatsű; sűnda ná ubo chetsű, “Haña he i Joseb űsaw mowma?”

²³ I na chetcho, “Djo nó he anabo zeğajobamme, ‘He műgawwa, nudzoğ í uw dagyolatchowe! No hadamje ñu dzűhudaw ye ba Kafarnahum ge dadaw ná age nudzoğ ñetrű a je dawē.’”

²⁴ Seyo i je chetcho, “No djó umsow cheime, djű ñihow je yow kuw nudzoğ ñetrű ge űğđ mapawme.

²⁵ No bá umsow cheime, Eliya í ñeto ge oje dzű kuw ñedzű ye pyelyeatrűlye, ana lyiladjew vyew druguw-drulyiw ge luhuśűmoatsű, sese Israyel ge śűpyo műjem kadā dutsű.

²⁶ Séšo Eliya í se namko ye djuchi ge je maki, Sídón go Sarfat ge Jewishñim mo műjem a ichi a aka ki.

²⁷ Seyo ñihow Elisha i shűi ñeto ge Israyel to śűpyo ğoğo naw kadā, séšo Naman ñidaw Jewish mo Siriya go nűna yé tralye vyew na so ğűdraw madaw kadā.”

²⁸ He ñu ye dzűhubyo-dzűhuğyowñe kűña na se ñegru a duma, se na vyew lusvyumfoatsű.

²⁹ Sűndalye gudzulyitsűne í na se ñetrű yo lahua, sűnda ha pudru to í ñetrű ğyodama, se pudru ulodza ge la jiku, í seyośű űla ge dűgaajoñe.

³⁰ Séšo i nalumko yo kahulalye katrűkralye.

Ğulo ma uw í ñepsű ge lahuahuw

³¹ Sűndatcholye i Galili ñetrű go Kafarnahum ge jiku, sűnda ğyogow ñeto ge nűna ná shi-ñu tru.

³² Se na í shi-ñu ye dzűlye mavenghuatsű hado chemeje í ñu ye dűgyebyo-dűgyeğowdra du.

³³ Melye ñe ulunge nűna a du, djuso ge ğulo mauw kamyó ğyodama. Se i śűpyo gow yo śogzűkűlye,

³⁴ “He Nazret go Jisua, no bá ha tsűnghu? Haña ba no damtrűajoñe jikuwma? No bá danghűwsowa ba djuma? Ba Tawgyew ichi ğűdraw űsaw ñe sakűlyedaw yewa!”

³⁵ Jisu i í zűñe che, “Mazűda ğyo sűnda i yo kahuag!” Sűndawñe se ğulo mauw kamyodaw ye ilungo haje ma uw madalyew kahuag.

³⁶ Sei holye vyew na aañiñe vyeatsűg, seyo se na nağűtchű ge ñu truğiñe che, “He i ye kűna ñu bajeśoma? I se ğulo ye ñigudu yo mağew dűgyebyo-dűgyeğoyiwa, sűndawñe se i je kuhuabai.”

³⁷ Hange je hange je imdo i kadang ifo truğitsűabaibi.

Patras ichi apyēñe utro nűna na dagyow

³⁸ I ñegru yo kahuañe simon í ñe ge ji, süge se Simon (Pirat) ichi apye ye uso shüñe nala. Sündada í ibo í kügütscho.

³⁹ I ichi üñisa a gudzulye se usso shü nadaw í züg, züwñe sese usso shüw ye gabruag sünda uwabyo-uwağyowñe í süge age da í datunotcho.

⁴⁰ Dru guamkoi sese dju-dju sama-sama yo nomñew yo so natsüdama, se na ichi ge la jikutsü, sündawñe í ügzü ye nadru ge a a dañe vyeñe na dagyotsü.

⁴¹ Sündawñe ġulo mauw na šogzuñe che, “Ba Tawgyew ichi üsawwa,” šüpyo nachi go kuhuatsü, séso í se na züñe seyo ñu mazüdügye, hado chemeje na danghudabi, í Masi cheñe.

Galili ge shi-ñu truw

⁴² Sünda ñetoahuwñe í namko yo kahuañe ġüdzüw ge katrükralye, sündawñe upu na í tchüsetcho ichi a kakusetcho, sünda í dügoha, nachi go djukatrükralyewewñe.

⁴³ Séso í ná chetcho, “No ñetrü utro ge je Tawgyew ichi shi-ñu trujo dulumme, hado chemeje nó he í daweñe kiabadamme.”

⁴⁴ Sünda í Galili ñetrü go ñegru ge shi-ñu tru.

5

Jisu ichi shürhaw

¹ Upu na ichi ge gapulotsüñe, seyo Tawgyew ichi shi-ñu na dzütsükügütsü, sünda íbó ge Gannesrat go huğülyi üdza to gudzu, sese ana a da.

² Sese í huğülyi üdza ge lü ksü vyedaw hohu, seyo tromaw-dzükrüw na ná tromaw na tchegüdrankoi.

³ Se lü namko ye a ye, se Simon ichi ye lyimyoalye, í í hudza ge me latrüyewewñe kügüñe che, sündawñe í lü ge ġyolye í nüna ná shi-ñu trukülye.

⁴ I ñu trufiahuwñe, sese í Simon í che, “Ġyuw ge la jikewe, seyo tchü lügyejoñe bá tromaw ye majo dawe.”

⁵ Simon í í chetcho, “He Tabrawwa, no yakülyi ñegimütrü kuw koğiw dawye ha malügylafibi; sedamje ba ñu cheda, tromaw mamkoime.”

⁶ Se í süna dawñe, ichi tromaw ye tchü aña-šütschüw tromaw gağalajew malgrula.

⁷ Sündaw í í draw utro lü ge gyodaw na, age djeñe latunowewñe naje damche: seyo se na djekutsüñe, se lü ksü ye gudze-gulüšuahuw lagu vye sünda lü yeje mülaje ladjew latchuğyo vye.

⁸ Se na holyebi Simonñe Patras naksü Jisu üshitrü ye gaañe, seyo che, “He Tawgyewwa, notrüğañ yo katrüyewew, hado cheme no lalo nünabame!”

⁹ Hado chemeje aña šütschüw tchü lügyladaw í holyeñe í seyo üdra ayo na mavenghu-atsüdabi;

¹⁰ Seyo sünatchombo Jabdi í üsaw Yakub ñe Yohañ naksü je, dju Simon í shürhawma, mavenghuatsü dawñe Jisu í Simon í chetcho, “Djuğejodawe, ayogo ba nüna ná üshü tsülaje dawe.”

¹¹ Sündawñe na lü ye hudza ge lakulye seyo sa a tralye ífum ífum kase.

Ġoğó í ġüdraw daihuw

¹² I utro ñetrü ge dula sese, se süge ġoğó yo tsafoahuw nüna a ye jiku, sünda í Jisu í hohulye uvro ye gakülyea, sündalye kügüñe che, “He Tawgyewwa ba dagyojoñe vyedameje nó ba muchoadügyefijošome.”

¹³ I ügzü ye djüñe dadülye che, “Bá muchogüdrawewñe, no vedame.” Sündawñe ichi se ġoğó tsadaw ye sešügudo ye kagüdrüatsü.

¹⁴ Sündawñe í í trüdrüse, “Djusaje djutruwe, séso kañe babraw ba mügaw na shewe, seyo ba kúnda ġüdraw mucholawma se fo ye, se hadamje Musa í djüvyelyedama se í djüwe ifo gow trufijoñe.”

¹⁵ Séso íbo gow ñu šüpyo tüğa-zegütsü, seyo šüpyo nünapu ye ichi ge shi-ñu dzüjoñe seyo sonaw na dagyolajoñe ichi ye keğütsü.

¹⁶ Séso í nüna ñiw ge utroga kagañe kügüñgudru.

Jisu í külyi-ğüdjew naw í dagyo

¹⁷ Ahua ye ana a datcho, í shi-ñu trumkotchoi sese, Farisiñe dakyew kikyew na sa a ġyoda, dju Galili seyo Yahudiya go küña ñetrü dulumma sego na, seyo Yarusalem go jiku; sünda naw na dagyojoye Tawgyew í ġagra gokyew ye idra ye duse.

¹⁸ Seyo howe kagua na külyi-ğüdjew naw nüna a ye, ñelütsüdrü ge lalyi, seyo na í ġütrü ge la jikuñe lamyoañe seyo Jisu ivro ye vyejoñe daahi.

¹⁹ Seyo na upu mutchusübyeñe ñelunge la majimyoñwñe, na ñelütsü udru ge lyilyiñe seyo ñeltsü tahalye, í ġütrü nadra ye Jisu uvro ge ulungko ye kikülyeaha.

²⁰ Jisu í na umsow lutuksüw vyedaw ye holyeñe che, “He nüna bá lalo ye muchoajemme.”

²¹ Sündawñe shizew-ñuzew nañe Farisi nağüтчü cheği, “He i djubajema, Tawgyew í mow uw zehi ye? Tawgyew í tralye dju lalo na muchoifiwa?”

²² Jisu i nalu ge vyedaw danghulye ná che, “Djo djolu ge ha vyemkoiya?”

²³ Hado vyedoña? Ana chejoma, ‘Djo lalo ná muchoadama,’ semome ana ma ‘Gudzuñe seyo kutro djeg?’

²⁴ Séso ye ana dadá djo danghujo dawwe nuna üsaw í druguw-drulyiw ayo lalo muchoaifiwme.” I se külyi-ğüdjea nado í che, “No ba chemkoi me, gudjuwe seyo bá ğütrü ye lalye ba ñe ge la kabi.”

²⁵ I jeañe ütrü a gudzu, seyo hayo sa a í gudru dama se í lolalye, Tawgyew í trolye í nudzoğ ñe ge kajebi.

²⁶ Sündawñe vyew na mavyenghuatsüñe Tawgyew í trotsü, sündalye şüpyo ğeñe che, “Yow ñi sama a ñu hohujemme.”

Matti í balaw

²⁷ Seyo sefum a i ñepsü ge jihua, seyo Leviñe ñidaw a ye patso-law nuna ye patso ñe ye ğyodaw hohu, sünda í che, “Nófum kasewe.”

²⁸ Sündawñe i vyew tratsülye ífum kase.

Lalo nadra tsasaw

²⁹ Sünada Levi i í ñe ge ava tsaw rhano a djü; seyo sünda se patso-law nañe seyo nuna utro a upua nañe üša ğyoñe ava tsa, şüpyo upu dyam.

³⁰ Seyo Farisi nañe seyo shizew-ñuzew nañe í şürhaw ná ana cheñe zekütso-zemrhü “Djo patso-law seyo lalobraw nadra hado ğyoñe üša tsa-tu daiya?”

Luhuşüw-lukrow ğyow ge Jisu i dzüw

³¹ Jisu i na chetcho, “Müga ñachi ge so manaw na majijome, séso sonaw na jijome.

³² No nuna ğüdraw na mowme, lalo duw ná nadrü-nalu lagudoijöñe balaw kakuwme.”

³³ Seyo na í chetcho, “Yohañ í şürhaw na ye şüpyo uw yo matsa-matuw küğüñe ğyoiwa, seyo sünambó Farisi nachi go na je, séso bá şürhaw na ye tsa-tuiwa.”

³⁴ Jisu i ná chetcho, “Hawa ba name gzü jiw nuna ná gzübraw ye nadra dulu sese, matsa-matudügyefijoma?”

³⁵ Séso se ñeto je kakujome, sayo sa a gzübraw ye nayo utroga dajome, sese na se ñeto ge matsa-matuw dajome.”

³⁶ Ná i zeğaw a ze tru, “Dju nuna yo gye ükün ye tağañe dju matüpsüwme, semome ükün ye tağajobabi sedamje se tüpsüdaw ye je gye üme üdra makamyöğijo.

³⁷ Seyo dju je tsühu ükün ye dzaği üme gye mapyujö, semome tsü ükün ye se dzaği üme yebó byoğalye kasuajo, seyo dzaği je mau lyajo.

³⁸ Séso anggur uhu ükün ye dzaği ükün ge pyujo dume.

³⁹ Kagua nuna na tsühu üme ye tulye ükün ye matuğöñjo, hado chemeje na truihi, üme ye ufomdodašo cheñe.”

6

Jisu Sabbat go Tawgyew

¹ Sündalye ğyogow ñeto sehu i vi goşü dañe kamkoi sese, seyo í şürhaw na pu ye trükülyelalye, üğzüku yo şükrüñe tsa-tsa ka.

² Sese Farisi namko yo na hadamje chekülyetcho, “Djo süna chiğa hado dawwa hai ye ğyogow ñeto ge madafiwjoma?”

³ Jisu i ná trutcho, “Hawa djo he í mangüma, nugo Dawudñe üdra ayo na luhuşüda sese ha dawma?”

⁴ I kündañe Tawgyew ichi ñe ge jima, seyo lapsü djüdaw go odje na lañe tsa, se na bó müğaw ná tralye djusaje matsafijo, seyo idra yo naje djüdalubi?”

⁵ Sünda i ná chetcho, “Nuna üsaw ye ğyogow ñeto ge je Tawgyewbamme.”

Ğyogow ñeto ye sonaw ná dagyow

⁶ Sünda ana dañ ahua ye ğyogow ñeto kuw sese i ñegru ge jiñe shi-ñu trutchoñe da ğyo; seyo sa a nuna a duw ye üğzü fuvro go krosdzüada.

⁷ Shizew-ñuzewñe Farisi na í hadamje zeñe ñu jojoñe hoksü ğyo, i ğyogow ñeto ge dagyoahima madagyoima hojoñe.

⁸ Séso ibó nalu vyedaw dāhuñda; sündada i se üğzü kroadaw nuna í che, “Pülyiñe, umko a gudzug.” I pülyiñe gudzu.

⁹ Jisu i í chetcho, “No djo he dzüime ğyogow ñeto ge ha dafijowa, uw dajo veima mo mau dajoma; şühü ná ğaksüjoma mo mağaksüjoma?”

¹⁰ Seyo i vyew ná hozeğiatşülye, se nuna í che, “Bagzü ye vro ge djüwe.” I süna da, sündawñe üğzü ye muchoañe uw lya.

¹¹ Séšo se na ñepsü ge kuhuatcholye lusvyuñe nağüтчü poğitcho, ñi he Jisu idra ha dañelye?

Shürhaw ġü yo ksü

¹² Seyo se ñeto bó i pudru ge küğüw katrükralye, seyo akülya ñetow Tawgyew í küğü ñetoaha.

¹³ Ñetohuwñe, i í shürhaw ná balalye namko ye ġü yo ksü ye pola, sündalye ná shürhawñe che.

¹⁴ Sünda se na heimme; Simon í ñiñi ye i Patras ñe je vye; seyo í ñuw Andriyas, seyo Yakub, seyo Yohañ, seyo Fillipus, seyo Bertulme,

¹⁵ Seyo Matti, seyo Tomas, seyo Halfais í saw Yakub, seyo Simon dju í Jeletes je chewma,

¹⁶ Seyo Yakub í saw Yahuda, seyo Yahuda tcho Iskariyoti, se i í tsadrüahuw lyikülye.

Jisu i nuna ná truñe dagyow

¹⁷ Sündawñe na idra kagalye no üpra a ye gudzutsü, sünda ichi shürhaw na upu mutchu, seyo vyew Yahudiya na, seyo Yarusalem, seyo Sor seyo Sidon go sütüğülü üdza ge küña ñetrü ma sego şüpyo nuna upu na je,

¹⁸ Dju í shi-ñu truw í seyo ġulo ná muchoañe dagyojoñe ichi ge jikutsüdama, süge dutsü. Seyo chigüje na maw da vyedaw na je uw dagyo.

¹⁹ Seyo vyew na í kidügyoñ vyetsü, hado cheme iso go ġagra na kahuañe ná muchoahi.

Gağüze shi-ñu

²⁰ Sündawñe i í shürhaw nachi ge hoñe che,

“Şüvzüwme bá, ñeto daw ye,
Hado cheme Tawgyew ichi ñetrü ye bachime.”

²¹ “Şüvzüwme bá je, dju luhuşüdama,

Hado cheme ġaksüjome,

Şüvzüwme bá, dju ksei ma;

Hado cheme tchüjome.”

²² “Şüvzüwme bá, dju nuna üsaw íbo

Bá mau dajome,

Seyo bá lahuajome, seyo bá tchügo-hoğojome,

Seyo bá ñiñi danghulye vyetsü djojome.

²³ “Sehu ñeto lüshüñe gyojo daw, hado cheme hojo daw, babó soğgo ge lapsü dume. Í bupye-ñipyen ñihow kew nadra je süna dawbamme.”

Dzüngawhuw shi-ñu

²⁴ “Séšo tui me djo, dju bo-luko duma,

Hado cheme djo djolu vyew apyew pajebi.”

²⁵ “Tuime djó dju hesahe ġaksüwdadama,

Hado cheme luhuşüjome.”

“Tuime djó, dju hesahe tchüima,

Hado cheme duhu pajome seyo ksejome.”

²⁶ “Tui me djó, nuna na djodruge uw chejome,

Hado cheme ná bupye-ñipyen na mülaw ñihow nadra je ana dawbamme.”

Vyeñiw na je nülvowe

²⁷ “Sešo dzüvodo djó no chei me, bá vyeñido na nülvow daw; bá dju mau daiba sena uw dajo daw.

²⁸ Bá dju chemui ma, sená gağüzü djüjo daw; bá dju zeamei ma, senábo küğüjo daw.

²⁹ Dju bákrumo ge tcheima, ichi ge krumo a go je djüwe; seyo dju bachi ġüfaw lağaima, se í bá polu djulawe djuchewe.

³⁰ Dju damje bá prüima sená djüwe; seyo bachi ġağ lağaima, í djuprüwe.

³¹ Seyo ba nuna ná bá küna dawewñe vyedama, baje ná süna dajo daw.

³² “Sešo ba bá nülvow dai ná akasa ba nülvow dame je, ba ha dew dawwa? Hado chemeje lalo dado na je, ná dju nülvow daima na je sená nülvow daşoi.

³³ Ba bá dju uw daihi ma sená akasa uw daijobame, bá ha dew chejowa? Hado chemeje lalo daw na je süna bó daşoi.

³⁴ Sešo ba í chi gudzumeje, nachi go patchojoñe vyemeje, bachi ha uwwa? Hado cheme lalo daw nağüтчü je chi bó gudzuşoi.

³⁵ Sešo bá vyeñido nadra nülvow daw, seyo uw daw, seyo patchojoñe mavvew chi gudzujo daw; seyo babó dew lapsü lyijome; seyo ba Tawgyew í üsañe chejome, hado chemeje i se nabó dju maşüvzüdügyejome, dju kew nadru ge nülvoi me

³⁶ Baw küna nülvosüwma, sünambo ba je nülvojo daw.

Udru ge dju truchoawe

³⁷ “Külü dju jowe, sündame badru ge je külü majojome; trudañe djuchewe, badru ge je truda machejome; aloijoda, sündameje bá je alojome.

³⁸ Djüjo dawé, sündame bá je djüjome: nüna na düsdzü-düsdzüñe seyo so-soñe seyo gusuañe badru ge suijome, hado cheme ha chi yo ba tsoima, se chi yo babó je seiyo tsojome.”

³⁹ Sündatcholye i ná zegaw a yo chetcho: “Hawa ñigew ye, ñigew i gabo trufijoma? Hawa naksü noğu ge magaajoma?

⁴⁰ Shürhaw na nudzoğ chi dadrüw na yo madewfojome, sešo djudamje dagro dama, i i chi dadrüw imbó vyedujome.

⁴¹ Ba bá ñuw ichi iñi go gashüsaw shobosa i hado hoiya, seyo bá nudzoğ bañi go sholbosa duw ye maholama?

⁴² Seyo ba bá nudzoğ bañi go sholbosa mahomeje, ba bá ñuw ichi i kúnda chefijowa, ‘No ñuwwa, mola bañi go gashüdaw ye lahuajoma?’ He dakulyutchüwba, uvromashü bachi iñi go sholbosa lahuavzüwe, sündameje sese bachi ñuwwa ichi iñi go gashüdaw ye hohulye lahuahifijome.

Shoñ i hosüjo ye üje yo

⁴³ “Ha shoñ uw a je ñime, dju sheje ha madağiw jewma, seyo ha madağiw shoñ je ñime, dju shejo uw jewma.

⁴⁴ Shoñ küña duma, nudzoğ üje yo hosüwme; hado cheme nüna na gralye go lufuje mapyowme, seyo küfsüje go angur mapyofijome.

⁴⁵ Nüna uw na nudzoğ lu go ñu uw chehuahi; seyo nüna mau na nudzoğ lu go mau ñu na mau yo chehuajome; hado cheme lu ge ha gudama se i namdzu go kahujome.

Ñe daw nüna sama ksü yo duw

⁴⁶ “Ba nó ñu chew ná madzüjomeje, sünameje hado nó ‘He Tawgyewwa, he Tawgyewwa,’ cheiya?

⁴⁷ Dju damje nochi ge jikuima, seyo nó ñu i dzühulyeñe zew dzüima, no djo trujome, na dju vyeduwma?

⁴⁸ I se nüna i vyeduwme, dju ñe damkoi sese nogüdzü ye gyuw chigalye kunu ge ñekrü dzüñe, seyo hutchuğo-ğölüşü ye idru yo da kaa, séšo i madañifijome; hado chemeje i lyow yo dada.

⁴⁹ Séšo dju dzhutcholyeñe zew madzüma, se i se nüna i dambo vyeduwme, dju nogüdzü ye ñekru lyow madaw dadama. Se udru ge hutchuğo-ğölüşü kame, i sebyo-seğyo ngüañe seyo se i gaañe ganü-gağaa.”

7*Kulokyew ichi umsow vyedaw ye Jisu i vyelamoa*

¹ I i ñu ná nüna na trumzoalyeñe Kafarnahum ñetrü ge jiku.

² Sündamükaw a ichi kulom djü i, i ñešümbo veduw vewma, usso nañe dzüjo veduw lyada.

³ Jisu iñiñ hutraw-notraw dzühulyeñe Yahudi ñetrü go nugow na ütrü ge i kulo i jikuñe dagyoñe cheñe ki.

⁴ Na Jisu ichi ge jikuñe ishitrü ge gaañe ana che, “Ba ibo he i daijo dawé

⁵ Hado chemeje i ñi gübye na nülvo daw, sünda ñi melye ñe ije i daihu.”

⁶ Jisu i nadra nadra hutro jisa, sünda i ñe yo añe üga ñibisa sa a, mükaw i üdraw na yo ana cheñe ki, “He Tawgyewwa, ba ñikuñisüw djudajodawe, hado chemeje nochi ge übadzü ñime, ba no ñelütsü pudaw ge jimyojo.

⁷ Sündada nudzo no bachi ge jikujo übadzü duñe mavemme, sé ba bá ñu i truñe no kulo usso dagyoñe jodawe.

⁸ Noje nüna na üla yo nünabame; sünda shipashi na nogzü geme, sünda nüna a i ‘Kab’ chewñe se nüna ye kaw, sünda ütro a i ‘age kab’ chewñe i kaku; sünda no kulo na ‘He i da’ chewñe na se chiğa i daag.”

⁹ He ñu i dzühulye Jisu i lumashüw vea, sünda i ufum ge nüna upu kalasalai nachi ge tcholtrügiañe cheñ, “No djo he trungkoi heme, Israyel ge je no ana veksüw mapame.”

¹⁰ Sünda nüna kidaw na ñe kaku hobanda, kulo usso nadaw i dagyovodabi.

Dzüdo i shüdügye

¹¹ Me ñegi fum sa a i Nayan cheñe ñetrü a ge ji, ichi shürhaw nañe seyo nüna upu üdra jisa.

¹² I se ñetrü gow füta ütrü iñisa jiku, hojodawe, nüna na ñimo a i ñepsü ge la kahuangkoi; se ye üyan üsaw akasa ba, sünda i müjem: sünda ñetrü gow šüpo nüna añe üdra dusa.

¹³ I hoñe Prabu üdrapra-ulupra na, sünda i cheñ, “Dju ksewe.”

¹⁴ Südawñe i iñisa ge jikuñe ñimo vedaw i ki; sünda gidaw na gogog jebi, südawñe i cheñ, “O muhumya, No ba chengkoime, pakülyejodawe.”

¹⁵ Sündawñe se dzüdaw ye pakülye gyo, sündä ütrü zekülye: sündä i í üyañ i djülye.

¹⁶ He yo vyew na gëatsü, sündä na Tawgyew ibo gow troñe ana che, “Ñimko a šupo dyew ñihow truw a kakülyadame, sündä Tawgyew i í nülwov i nuna na she.”

¹⁷ Sündä ibo gow ñu ye vyew Yahudiya seyo iñisa gow vyew ñetrü ge truzeğiatsü.

Yohañ Baptisma djüw í dzüw

¹⁸ Sündä Yohañ i í shürhaw na he ñu na trutsü.

¹⁹ Sündawñe Yohañ i í shürhaw nango yo ksü i balalyeñe Prabu ichi ana dzüw ki, “Kakujo ye babamma, mo no utro na gýokrüjoma?”

²⁰ Na ichi ge jikuñe cheñ, “Yohañ baptisma djüw i ñi bachi ge ana a dzüw kidame, se ye kakujo ye babamma, mo no utro gýokrüjoma?”

²¹ Sa yo sa a í šupo na usso naw yo seyo duhu yo lahuaida; sündä mütü kamyodaw seyo šupo iñi giw na iñi djü.

²² Sündä i í che, “Djo ha ha hohuñe dzühudama, kañe Yohañ i trujo daw; iñi gýew hohungkoimme, üshi lyew kahinkoimme, gôgo nadaw i dagüdrajemme, ufu vaw dzühungkoimme, sündä dzüdaw ye üshükülyejemme, sündä sapse na Tawgyew i shi-ñu trujeme.

²³ Tawgyew i šüvzüw djüdra duma na ushi mahütrüjome.”

²⁴ Yohañ i kidaw nuna na kawñe, Jisu i Yohañ ubo gow nuna na ana tru, “Djo bye ge ha how jiña? Ha, ñedzülyiw yo age ngüa süge ngüa daw müsü? i?”

²⁵ Nameje djo ha how jibaña? Ha, nuna gye howsa shedaw í? Howe, dju gye-guwo uw sheima sündä ñe uw ge gyoima, na mahal ge gýowwa.

²⁶ Nameje ha how jindobaña? Ha, djuma a ñihow í? Am, no djo trungkoime, ñihow truw ije dyewfo.

²⁷ He ye seabamme, djubo gídama: ‘Howe, no muko í bavro bavro kijome, dju bavro ge kañe gabo gudow davojome.’”

²⁸ “No djo trungkoime, mim naluhu yow sadaw na, namko ye Yohañ i dyewfo djuje mome sé dju Tawgyew i ñe ge imisafo dama, i se ije dyewfo me i.”

²⁹ Sündä vyew nuna na seyo patso-lavow naje dzühuñe Yohañ ichi gow baptisma lañe Tawgyew i umso ve.

³⁰ Sé Farisi seyo shotuko-kunu davow na ichi baptisma malañe Tawgyew i gabo shedaw i madzü.

³¹ “Sündada: no he shülsongkoi gow nuna na ha üdra tsojowa? Na ha veduda?

³² Na se angasa na veduw dju bajar ge gýoñe nağütchü gúksügiñe ana chegiw, ‘Ñi babo bzüva viw, se ba ñuksu je mada, sündä ñi duhu dawgeje ba kseje makse.’

³³ Hado chemeje Yohañ baptisma djüw i odje je matsaw kakülyada seyo tsü je matuw kakülyada, sé ba cheiye, usso ge mütü du.

³⁴ Nuna üsaw na tsa tuñe kakülyahume; se ba chewye, ‘Howe, tsağotüw sündä tsü tujetchüw nuna nawa, patso-law üdraw seyo lalo gifuğuw nadraw.’

³⁵ Sé patsü-sholu ye nasaw nachí i umsoñe da veda.”

Simon Faresi ichi ñe ge lalobram í muchoahuw

³⁶ Sündä Farisi a ye í üdra ava tsasaweñe bakuda; sündawñe: i se Farisi i ñe ge jiñe ava tsajone gýoha.

³⁷ Süge se ñetrü yo lalobram a ye, i Farisi i ñe ge ava tsaw jikuñe gýoda che danghulye, kunulübzü yo daw shüve a ge šowsa šow uhu lajikuda.

³⁸ Sündä üshi ütrü ge, fum gow gudzüñe kseñe üshi i üñiñü yo dağüñe sündä nudzo ükye gow ükyetrü yo düğüdra sündä üshi ge umdzo yo tsa tsañe, šowsa šow uhu yo šüi.

³⁹ He í holyeñe, se Farisi dju í baladama, üdrü-ulu ve vemche, “Í ñihow truw nünan meje i danghujobi, dju i kingkoima, se ye djuma seyo kúna mimma cheñe? Hado chemeje ibo lalobrambabi.”

⁴⁰ He í dzühulye Jisu i hutrolañe cheñ, “Simonña, no ba hadamje a chejome.”

⁴¹ “Bo djüw a ichi gudzuvaw ksü duw, a ye lumu yo bosüñ fo pom, seyo utro a ichi ge lumu yo bosüñ pomgü duw.

⁴² Ichi ge domgütchojo ñiahuñe, sündawñe i naksü maksü i ujobammeñe traaha. Sündä: naksümko a dju i nülvo fo vejowa?”

⁴³ Simon i cheñ, “no vew ge, i djü aña traafodama.” I í cheñ, “Ba uw vebadamme.”

⁴⁴ Sündä se mim ichi ge tcholtrüñe i Simon i che, “Ba he mim i homa? No ba ñe ge jikuwbi sé ba nó üshi chejo hu je madjü, se i noshi i iñiñü yo dagzüida, seyo i nudzo ükyetrü yo düğüdraida.”

⁴⁵ Ba no umdzo yo bubu matsa, se no jikuw yo i noshi i umdzo yo bubu madamdu.

⁴⁶ Ba no kye ge tel je mañü; se i noshi ge šowsa šow uhu šüida.

⁴⁷ “Sündada no ba chengkoime; i lalo šupo duw ye, muchoihumme, hado chemeje i šupo nülvo dada; sé djuchi mesame muchodama, i nülwov je mesame dawba.”

⁴⁸ Sündä i mim í che, “Ba lalo muchoajemme.”

⁴⁹ Sündawñe údra a ava tsaw gýosadaw na, nadrü-nalu ve vetsü, “He lalo na muchoihu ye djubajema?”

⁵⁰ Se i mim í che, “Ba kügüw ye ba gaksüi damme, lüshüw yo kajodabe.”

8

Jisu ichi shürhaw na

¹ Se yo na ñetrü ñetrü shi-ñu tru ka, seyo Tawgyew í ñe gow shi-ñu na truñe kahi, sündä i nadra shürhaw gû yo ksü duse,

² seyo mim üchea naje djuso gow mütü na lahuañe so naw na dagyodama, se iñiñ ye Mariyam Magdalini chewme, djuso gow mütü mro kahudama.

³ Seyo Herodes í hokrüvow Kuja ufum Yoanañe Susana seyo şüpo mim na í ná gañ-miği yo na kulom na hotunovow.

Iği truw ichi zeraw

⁴ Nüna upu jikyegíatsüwñe, seyo ñetrü ñetrü gow na je ütrü ge jikutsüwñe, i zeğaw tru:

⁵ “Üsü traw nüna a ye üsaw traw jihua: trangkoi ye üsü üchea ye gábokutru ge gaa, sündä dügrüprag, seyo ñedzü gow musu na pilag.

⁶ Seyo üche ye kunuka udru ge gaa, sündä shükülye, séso hu gzüw mapawtro graha.

⁷ Üchea ye tsü namko ge gaa, sündä tsü na üša üša shüsañe í shümüla.

⁸ Seyo üchea na no uw ge gaada, sündä shülyilyeñe sheje fuğua dzaw djüda.” Ana cheñalyeñe í gow yo ñu che, “Djuchi ge dzüjo ufu duma dzüsaew.”

Zeğaw yo trudrüw

⁹ I shürhaw na í dzü, “He zeğaw ichi hawa?”

¹⁰ I cheñ, “Djo Tawgyew í ñe go ñu na dzüsüdügýewbi, se utro na zeğaw go trujome, hado chemeje na hohuñe mahohujome, seyo dzühuñe je madzüsüjome.”

¹¹ “Zeğaw í chemeje ana me: üsü ye Tawgyew í ñume.”

¹² Gábo üdza ge gýodaw na dju dzühudama; sündawñe mütü na jikuñe nadrü-nalu gow Tawgyew í ñu í lañe katrükralye, hado cheme ana malyajoşoma na Tawgyew í küğüñe na gaksüw pajo.

¹³ Kunnu udru ge duw na, dzüñe lüshüw yo shi-ñu bo laşoi, séso ükrü ñiw tro ye na umso mesame kuw ve, sündä muchow ge gaaha.

¹⁴ Dju kusu ge gamyoadama, se na, dju dzüi na, sé vro ge kañe vesumow seyo bo-luko seyo şüng-dongkoi ge duhu ge gamyojome, sündä na sheje mañujo.

¹⁵ Sé no uw gow na he me, dju shi-ñu lu-drü lümyew yo dzüñe veima, na se yo sheje lakufijome.

Mitrü yo zeğaw

¹⁶ “Djuje müsaw tchüholyeñe boğtom yo pelye mavejo, seyo buğo ufum ge mavejo, sé mütchü ubo ge vejo, hado chemeje nüna jikudaw na müsaw pajo.

¹⁷ Haje mamüşüme, ha ye matruhoajoma; seyo haje trumşüw ñime, se ye madanghujome sündä müsaw mapajoma.

¹⁸ Sündada güdzüw gýowe, ba ha vego dzüngkoima? Hado chemeje djuchi ge dumañe vedama, í djüpyojolume; seyo djuchi ge ñima, ichi gow se ije lağajome, ha ye ichi nudzoğchiñe vedama.”

Jisu ichi ñeşügümsaw

¹⁹ Üyañe uñuw naksü ütrü ge jiku, sé nüna añe duw tro sa í matüvafilye.

²⁰ Sündä í tru, “Bañe bañuw naksü ba tüvajoñe ñepsü ge gudzudame.”

²¹ I í ñu í hutrolañe che, “No añe no ñuw he bamme, dju Tawgyew í shi-ñu dzüñe seyo umso vewma.”

Şüw-lyiw law kaw í dağüdzüahuw

²² Sesüyo ahua ye í seyo í shürhaw na lü ge gyolyi, sündä í ná cheñ, “Age djebya, hu dügepsü ge jibo.”

²³ Sündawñe: na lü í shaa.

²⁴ Sündawñe na jiñe í dapüñe, sündä cheñ, “Tawgyewa! Tawgyewa! Ñi mauwfimaaw lyangkoimme. Sündawñe í pakülyeñe ñedzü şüw-lyiw seyo hu í lashüraw í miği sündawñe na damudoañe güdzüw lyaha.”

²⁵ Sündä í na che, “djo küğüi ye hanga?” Se na gëaglye seyo mavenghuañe nağütchü cheği, “He djubajema, ñedzü şüw-lyiw seyo hu naje dügyeyiye, sündä na í chew dzütsü.”

Guló mauw na lahuahuw

²⁶ Sündä Giraseni na ñetrü ge jiku se ye süge pseğ ge Galili hu ütrü iñisa ge.

²⁷ I hudza ge jikuwñe, se ñetrü go nuna a í tüva, djuso ge mütü kamyodama. Seyo šüpo üğaluw gomdo gye-ğuvo je mashew seyo ñe ge je mağyow nuğu ge aka ġyow.

²⁸ I Jisu i hoñe šogzu, sündä uvro toi gaañe gow yo ñu che, “He Toğgroyama Tawgyew üsaw Jisu! No badra ha dajo duwa? No ba chengkoime, no ñiku-ñisüw djudjüjodawe.”

²⁹ Hado chemeje i mütü i se nuna usso go kahuaawe cheñe dügyengkoï, sündä i üdra gow lyanggudrulai. Sündä nuna na í sülyeñtchü seyo sülyebu yo vogo vew, sedamje i se sü na gokyoaha, sündä mütü ye i sümbye ge sagañgudrudügye.

³⁰ Jisu i í dzü, “Bañiñ hawa?” I cheñ, “Upu,” hado chemeje šüpo uğulo na usso ge kamyolyedabi.

³¹ Sündä i í cheñ, “No noğu ge djukadügyejowe.”

³² Süge puge vo upulo dyew a tsamroñe ġyoda, sündä: i í cheñ, “No nalung ge kamy-odügyewe.” Sündä: i í kamyodügye.

³³ Sündawñe se uğulo ge nuna usso go kahuañe vo usso ge kamyog sündä se vo upulo ye ġo ge ġuañe husu ge gamyoñe gamüla dzüag.

³⁴ Fugulu ġyokrüw na se dagjew i holyeñe ġe djeshükralyetsü, sündä ñetrü ñetrü ge kañe he ñu i trutsüküğa.

³⁵ Sündä nuna na se dajew i how jihuatsü, sündä Jisu ichi ge jikuñe dju nuna usso go uğulo mauw lahuadama se ye Jisu ishitrü ge gye sheñe ġyodaw i hohuñe ġeag.

³⁶ Sündä hohusadaw nuna na ná tru, se uğulo mauw ye nuna i ñiku-ñisüw da vedaw í kúndañe uw dagyodama.

³⁷ Sündawñe Giraseni ñetrü üñisa gow nuna na Jisu i cheñ, ñichi ayo kahuañodabe; hado chemeje na ġemğekoatsüdabi. Sündä: na lü ge gyolaye katrükralye.

³⁸ Djuso gow uğulo mauw lahuadama se nuna ye í che, no badra ġyokyejodawe, séšo Jisu i kadügyelye cheñ.

³⁹ “Bañe ge kañe nuna na truwe, Tawgyew i kúndañe babo aña šüw-lyiw chiğa dadama.” I kañe vyew ñetrü ge trüzeğiat süg, Jisu i nobo küña šüw-lyiw chiğa dadama.

Sonaw mim seyo dzüdaw mimsa naksü dashüicho

⁴⁰ Jisu i Galili ñetrü go kalai sa a, nuna na lüshüw yo i tüva; hado chemeje na í ġyokrüñe ġyow.

⁴¹ Sündañe howe, Yayir cheñe nuna a iñiñ dju ñegru go dyewma, i jikuñe Jisu ishitrü ge gaañe cheñ, “Noñe ge jisawe.”

⁴² Hado chemeje ichi oje ġüyo ksü yo üsam akasa a duw ye dzüasalaibi. I jingkoï ge nuna ishitrü ge gaatsü.

⁴³ Sündä mim a dju oje ġüyo ksügomdo šü lu ġyowma sündä dju nudzo šüw-duw na so naw dagyow nadru ge tratsüdabi sedamje djugzü gow je i madagyofibi,

⁴⁴ fum gow jiñe i gye üdza ge kig sündawñe sešüğdo a i šü luw ye lumudoag.

⁴⁵ Se yo a Jisu i cheñ, “No dju kidüğña?” Vyow na makitsüñe chetsüwñe, Patras seyo üdra ayo dusaw na cheñ, “He Tawgyewwa, bá he nuna fupulodaw na düñe badru ge gaiwa.”

⁴⁶ Séšo Jisu i cheñ, “Djudamje a no kidawa hado chemeje no danghudabi nochi gow mu kahuañewa.”

⁴⁷ Mim ye holyeñe no mamušufjobañe vewñe, usso somsokyo jikülye, sündä ishitrü ge gaañe vyew nuna navro se trukülye, i hado kima, sündä kúndañe mekutcho dagyogdama.

⁴⁸ I í cheñ, “Nosamya ba küğüw ye ba dagyodašoñe, lüshüw yo kajodawe.”

⁴⁹ I trungkoibalubi ye, ñegru go müğaw i nuna a jekuñe che, “Basam dzüdamme: müğaw i duhu djujüwe.”

⁵⁰ Jisu i dzühuñe cheñ, “Djuğejodawe; küğüjodabuwe; i basüjosome.”

⁵¹ Ñe ge jikuñe i üdra ye Patras, Yohañ, Yakub seyo mimsa üyow-üyañ na tralyeñe djuje ütrü üñisa ge majidügyew da.

⁵² Sündä vyew na ubo kse-ñiğitsü, séšo i cheñ, “Djuksejodawe; I madzüme, i dru-mubadame.”

⁵³ Nuna na i dzüdabi che danghuñe, i chedaw i dzüñe tchüg.

⁵⁴ Sé i ügzü i kigolañe ġuksuñe che, “He akoa pakülyebi.”

⁵⁵ Sündawñe ġulo üshükülyeñe pakülyeg; sündä i na dügye i tsajo hadamje djüwe che.

⁵⁶ Üyawñe üyañ naksü mavenghutsüg, sé i ná cheñ, he ha dajema se i djuje djutruwe.

9

Shürhaw ġüyo ksü ná jidügyew

¹ Sündatcholye i na ġüyo ksü shürhaw na balañe ná ġuló mauw seyo so naw na dagyow dajo gow bó vye.

² Sündä ná Tawgyew i ñe go shi-ñu uw truw, seyo so naw na dagyowe cheñe ki.

³ Sündä i ná che, “Jiw ge haje djulawe: shobo je djulawe, kapûga je, odje je, bo je seyo polu ksü ksü djulawe.

⁴ Seyo dju ñe yedamje ba gyogoima, se a gyojodawe; sündä se yo kahujodawe.

⁵ Dju bala magokyema se ñetrü yo kahuañe ishigo ñelümo na pafiajodawe, hado chemeje nadru ge na je truksüfijo.”

⁶ Sündä: na jhuañe ñetrü, ñetrü shi-ñu uw tru kaahi, seyo nuna ná djuje djuje dagyoñe kaahi.

Herodas í velamow

⁷ Seyo ñetrü go psügi fum yo nugo Herodes i he í dzühulyeñe mavenghuag, hado chemeje küña nuna na trudabya, Se i Yohañ dzüdo go üshükülyetchoda cheñe.

⁸ Sündä küña nuna na he i, se Eliya i hohuda: utro na ana je chetcho, ahugo ñihow truw mügaw namko yo djuma üshükülyetchoda.

⁹ Sešo Herodes i che, “Yohañ ükye bo no poskeadügyembi, he ye djutchoa, djufo go ana ñu dzühumkotchoiya?” Sündä i í hogoñikülye.

Nuna hadza pom ná gyew

¹⁰ Sündä í shürhaw na kakuñe na ha ha dalyedama ná í truatsü. Sündä i ná utro ge lagañe, Betseda cheñe ñetrü a ge lañe kakye.

¹¹ He i danghulyeñe nuna na ufum fupuloatsü, sündä í ná lüshüw yo tüvatsü, seyo ná i Tawgyew i Nogofo shi-ñu trukye, sündä djú dagyodügyeñoñdama, ná dagyo.

¹² Ñeto kapsealaibi a, se í shürhaw güyo ksü jikuñe che, “Upu na kadügyejodabe, kañe na ñetrü ge ná gyojo seyo tsajo bühohidame, hado chemeje ñi güdzüw ñetrü ge dume.”

¹³ Ná che, “Djo ná tsajo djübalabya.” Na cheñ, “Ñichi ge odje pom seyo tchükro ksü yo haje ñime; sé ñi jhuañe vyow nabo tsaw-tuw prülameje, se ye dujome.”

¹⁴ (Hado chemeje sa yo sa a muhu fo pom kuw du.) Sündä i í shürhaw na che, “Ná pom gü, pom gü dañe gyodügyewe.”

¹⁵ Na süna dabadaba, seyo vyow ná gyodügye.

¹⁶ Sese Tawgyew i ülgü odje pom seyo tchükrosa ksü í la, seyo ñedzüdra ge hotroñe na gağüzü djü, sündä tchekuği, tchekuğiñe í shürhaw na djü nuna na hawe cheñe.

¹⁷ Sündä: vyow na tsalyeñe tsaelsatüdabi, seyo godza daw yo mo gü yo ksü guw trügula.

Patras i Jisu í Tawgyewñe vyew

¹⁸ Se i akasa güdzüw ge kagañe kügümkoï sese, seyo idra ye ichi shürhaw na idra dusa, sündawñe i ná dzü, “Nuna na nó ha cheiya?”

¹⁹ Na che, “Yohañ baptisma djuï ye, seyo kagua na mügaw Eliya, seyo kagua na chew ye ahugo ñihow truw mügaw nangko yo a üshükülye da.”

²⁰ Í ná dzü, “Sešo djo nó ha cheiya?” Patras i che, “Tawgyew i üsaw Masi.”

²¹ Sündawñe Jisu ná züpsügeñe che, “He ana djúje djuchewe.”

Jisu i í nudzo dzüjo í ñihow tru

²² Sündä i che, “Nuna üsaw í duhu paketrabamme, seyo dasüñejome seyo kew mügaw na seyo mügaw sawlyiw seyo shizew-ñuzew na í hosügow vyeñe shijobamme, sündä i ñegi dzü ye üshükülyetchojome.”

Jisu ufum kasaw ye

²³ Ivyow ná che, “djuma no fum kasajo vedama, nudzoğ yo makasajoñe trawe seyo shüwa nudzo shokru i gilañe no fum kasajodawe.

²⁴ Hado chemeje dju yo nudzoğ shüw ye fupojome vedama na shokru í moajome, sé djudamje nobo nudzoğ uluvyu takyoima se iyo í fupojome.

²⁵ Nuna na vyow druguw-drulyiw í patsülameje, seyo nudzoğ uluvyu ye takyoame, semome ñiku-ñisüw pa, se yo ha palajowa?

²⁶ Djudamje no yo seyo no ñu yo ñimchüñjema; nuna üsaw ye je ichi seyo i awu ichi sündä güdraw sorgomuko ichi lüshüw pawñe, ije ñimchüñjome.

²⁷ No djo umso trungkoime, dju ayo ha a gudzudama, namko he a üchea na ana dame Tawgyew i ñetrü mahohumdoluye, na dzüw ye künama madanghujome.”

Musa ñe Iliya naksüdra Jisu

²⁸ He ñu na chelye ñegi şügzü fum sa a Patras, Yohañ seyo Yakub na üdra kügüw pu a ge lañe jike.

²⁹ Í kügüngkolui ye, ukrumro utro a lya, seyo i gye ye grobülaşüksüñe lüna-lünakülye.

³⁰ Sese, muhu ksü se ye Musa ñe Eliya naksü üdra ñu chitrukkoï.

³¹ Na gülo güdrawdra hohu, sündä i dzüjo go ñu poği, se ye Yarusalem ge dajo.

³² Patras ñe üdraw na drumügoñatsüdabi, sündä na pakülyewñe, í gülo güdraw; seyo se nuna ksü ye dju üdra gudzüsadama, hohu.

³³ Na ichi yo kajoñe dawñe, Patras i Jisu í che, “He übrawwa, ñi ha a gýow ye uwme: sündä: ñi lañe ulügü dzü dajome, a ye babo, a ye Musa ibo, seyo a ye Eliya ibo.” I madanghu, i ha chengkoima.

³⁴ I ana chengkobaiye, ná mumu yo boshiğiag, ná mumu yo bolyangkoi ye na gëatsüg.

³⁵ Sündä se mumu yo ana ñu a zekülye, “He ye nosaw seyo no i golawme, i chew dzüwe.”

³⁶ He ñu i dzühungkoi ge, Jisu i akasa hohuda; sündä i mazüda gýoda, sündä ha hohudama, se ñu í se ñeto ge djuje malakülye.

Muhusa í gulo mauw yo lahua

³⁷ Seyo se draha na pu goşü kagaahuñe, upu dyew a í jiñe tüva.

³⁸ Sündawñe, upumko yo nuna a ye şogzuñe che, “He dadrüwa, no ba chengkoime, nosaw i nülwov hoijodawe; hado chemeje i nosaw akasame.

³⁹ Sündä howe, gulo mauw a usso ge kamyö, sündä i ülya akaye şogzukülyeg; seyo i se í ana güşhülyığıada, se í üga ge üzetcho fegükülye; seyo í ana damgzüw yo ñiku-ñisüw da tra.

⁴⁰ Seyo no bachi şürhaw ná che, í lahuawe; séso na malahuafi.”

⁴¹ Jisu i che, “He makügü seyo bolu datchüw şürhaw nawa, no djodra küña kuw gýofisajowa, seyo djó daw na vejowa? I muhu i cheñ, basaw i age la jekuha.”

⁴² I jimkolai ye gulo mauw ye í lola padubug, sé Jisu i ñişgzün gulo í miğiñe seyo muhusa í uw dagyoñe uyow ügzü ge djü.

⁴³ Sündawñe vyow na Tawgyew i gow yo mavenghutsü. Sé vyow na í ha ha chiğa dadama se na trongkoiye, sese i í şürhaw na che.

⁴⁴ “He ñu ye djo djofu ge vejodawe, hado chemeje nuna üsaw í nuna nagzü yo kigo ladügyejome.”

⁴⁵ Sé na he ñu i madzüsü; se i í madanghdügye; seyo na he ñu ífo go idra dzüjoje gëtcho.

Vyow namko yo dyewfo djuwa?

⁴⁶ Sündä şürhaw nağüchü ge ñu a kakülye, se i ye nangko a dju dyewfoma?

⁴⁷ Seşo Jisu i nalu ge vedaw í danghula, sündä muhumsasa a í lañe idra a gudzudügye,

⁴⁸ Sündä i che, “Dju damje noñiñi yo he muhusa i hutroima, se i nó hutrolawme; seyo dju nó hutroima, se na nó kidaw na je hutrolawbamme, hado chemeje djomko yo imisa yo imisafodama, se ye dyewfobamme.”

Dju maveñisama, na udraşome

⁴⁹ Sündawñe Yohañ i che, “He übrawwa, ñi nuna a ye bañiñi lañe gulo mauw í lahuahuw hohudama, sündä ñi í gohame, hado chemeje i ñidra ñisañe bafum makasa.”

⁵⁰ Jisu i ná che, “Í djugohajo daw; hado chemeje dju djo mauw madama, na djodra dujome.”

Jerusalem ge jiw

⁵¹ Se í sorgo ge lalyimdrü ñeto kakusalaibi sese, sündawñe i Yarusalem ge jijoñe vye.

⁵² Seyo i ivro ge mukow ki: i Samariya na ñetrü a ge ji, ibó gýoyo dashütrüivojoñe.

⁵³ Sé na i magyogadügye, hado chemeje i Yarusalem ge jingkoida.

⁵⁴ Se i hoñe i şürhaw Yakub ñe Yohañ naksü che, “He Tawgyewwa; ba ha tsüda, se i ñi dügye, se i ñedzü go mi gaañe ná damyaweñe ma?”

⁵⁵ Séso i tcholtruğiäñe na ze, [Seyo che “Ba madanghuwa ba ha uğluo yo ma. Hado chemeje nuna üsaw ye nuna nachi luvuy ye damütrajoñe madaw se í gaksüjijoñe kakuwme.”]

⁵⁶ Sündälye iñe i şürhaw na ñetrü utro ge jitrükrälye.

Jisu ufum kasaw chemeje

⁵⁷ Se i gabo jimkoi ge, se djuma a ye í che, “Ba hange hange jiyima, no bafum kasajome.”

⁵⁸ Jisu i í che, “Şelü ichi uksu seyo ñedzü go musu nachi üdrü duwme, sé nuna üsaw ichi ükye vejo je ñe ñime.”

⁵⁹ I utro nuna a i che, “Nofum jisawe.” I che, “He Tawgyewwa, nó uvromashü kadügyevzüwe, no awu í gúavzüjome.”

⁶⁰ I í che, “Dzüdaw na ná nudzoğ dzüw í büğudame, sé ba jiñe Tawgyew ichi ñetrü go shi-ñu trujodawe.”

⁶¹ Utro a ye je che, “He Tawgyewwa, no bafum kasajome; sé uvromashü nó kadügyevzüwe no nochi ñe go nuna na yo mülüñ kajoñe.”

⁶² Jisu i í che, “Djudamje nudzo ügzü i luksungkuğu ge kiñe fum ge homeje, i Tawgyew i ñetrü ge gýofiwjome.”

¹ Seyo he ñu nafum sa a Tawgyew i nuna mroḡu lapyo, sūnda ha ha ñetrü ge i jijoma, süge kšü, kšü dañe ivro kibraḡitsü.

² Sūnda i ná che, “Rhamu kiw añe dume; séšo chīga daw mesame duba sūndada vi ũbraw i küḡüwe chejodawe, se i i nudzoḡ vi i tcholaḡo vi nuna kiwe.”

³ Jiwe; howe no djó fugulu vyeduw dañe fumsu namko ge kijome.

⁴ Sūndada dzulngasaje djulawe, kapüḡa je, seyo shita je; sūnda ḡabo ge je nuna ná dju je gaga djudawe.

⁵ “Dju ñe ge jihima, uvromashü chevzüwe, ‘He ñe ge ḡüdzüw djuwe chewe.’”

⁶ Süge djuma ḡüdzüw pafiwo dumeje, ba ḡüdzüw djüdaw ye ũdra dusajome, momeje bachi ge kakutchojome.

⁷ Se ñe ge ḡyowe, sūnda ichi go ha paima, se i tsa-tuwe, hado chemeje chīga daw nuna ná shishü patsüw; ñetro-ñetro djukahijodawe.

⁸ Seyo ha ñetrü ge jiyima, sügow nuna na hutrovowñe, se bavro a ha vedama se i tsajodabuwe.

⁹ “Sügow sonaw ná dagyojodawe: sūnda ná chewe, ‘Tawgyew i ñetrü ye batrü iñiñisa ge kakudamme.’”

¹⁰ Sé ba ha ñetrü ge jimyoima, seyo sügo nuna na bá mahutrovolaime, ná bodzaḡ ge jeñe ana chewe,

¹¹ “‘Djo ñetrü yo ñelümo naje, ñishi ge ḡüdrüsada na, ñi djovro a pafiamkoimme, sedamje he i danghujodawe, Tawgyew i ñetrü djotrü iñiñisa ge kakulaimme.’”

¹² No djo trungkoime, se niyay ñeto se ñetrü ye Sodom ñetrü i je mofokaw gijo lyajome.”

Ŭdrü-ulu mavvegudow ná tui

¹³ “Tui Kurajiña! Tui Betseda! Dju dyew chīga dafiwo ye djo ge dadama, sese i Sor ñetrüñe sidon ñetrü ge dameje, na ke ge gye ḡüpañe seyo kütsesüpu ge ḡyoñe na kye ge dru-lu vyegudoñjemma.

¹⁴ Sešo, melye gzuñe cheḡiyi sehu bafo vyego yo yeje Sor ñe Sidon naksü vyego ye vyeksufofijome.

¹⁵ Seyo Kafarnahum ñetrü, hawa ba soḡgo kuw lüvzüw dalyijoma? Ba bó noḡu ũla ge kuw ũla kaajome.”

¹⁶ “Dju ba chew dzüima, se i no chew dzüjo, sūnda ba dju mauw daima, noje i mauw dajome; seyo dju no mauw daima, se ye no kiada na i je mauw dajome.”

Shürhaw mroḡu na kakuw

¹⁷ Se shürhaw mroḡu yo kšü na lüshüw yo kakutchoñe che, “He Tawgyewwa, ba ũñiñi yo se ḡuló mauw na je ñichi pudu-puña ulunge pumódame.”

¹⁸ I ná che, “No müttö i ñedzü lüḡaw veduw ñedzü go gaahu hohuime.”

¹⁹ No djó byu na seyo müttö ḡüdzü na düḡrüdzagofijo djüwme, seyo vyeñiw nachi go vyew mau dafiwo ná madafijo pudu-puña djüwme; seyo ha ḡañ yo je djo naw madafijomme.

²⁰ Sé sūnašo cheñe djulüshüwe, se ḡulo mauw na djo pudu-puña yo pumoda cheñe, sešo djo lüshüjo dawe se djo ñiñi Ñedzü ge ḡi vyedotto yo.

Ŭsaw udru yo uyow i daw

²¹ Sa yo sa a i ḡulo ḡüdraw yo dañe lüshüdzualye, seyo che “He Awa, Ñedzü ñe No i Tawgyewwa, no ba ulu yo uw cheime, se ba he ñu na danghu-kinghuw nuna seyo vyesü-vyelüw na yo müšüñe veda, sūnda angasa natrü ge duda. Am, he Tawgyewa, hado chemeje bá he i uw veda.

²² No awu i nó vyow nodru ge traadamme; seyo djuje madanghu se saw ye djujema, awu aka danghuba seyo awu djujema se je dju madanghu, se i ye sawchi gemdo aka seyo se djudru ge saw i dujoñe vyedama.”

²³ Seyo i shürhaw nachi ge tchoñe akasa ge che, “Šüvzüwme se iñi ye, se he ñu ná se ba hoiwa hoiye,

²⁴ Hado chemeje no djo chemkoime, šüpo ñihow truw na seyo ñubyu na tsüdaw ye, se ba ha ñu ye hoima howe; sé maho seyo ha ñu ye ba dzüima dzüwe, sé madzühu.”

Samri nuna uw a i zeḡaw

²⁵ Sūndawñe nuna a ḡudzülyi; sūnda ana cheñe i küna daima hopüñew che, “He shotuko-kunu go dadrüwa, shüwa shüw shüjo ibo ha dameje ujowa?”

²⁶ I che, “Shotuko-kunu ge ha ḡida? Ba künda ngüña?”

²⁷ I trutcho, “Ba Tabraw bá nudzoḡ Tawgyewchi go vyew nudzoḡ drü-lu seyo nudzoḡ kraše seyo nudzoḡ budzu vyew se nadra nülwov vyejodawe; seyo nudzoḡ ḡafopsüḡi-ḡampsüḡi go ná nülvojo dawe.”

²⁸ I i che, “Ba umso chedaba, he ana dabya sūndame ũshü ḡyojome.”

²⁹ Sé i í nudzo í usu dajoñe veñe Jisu í dzü, “Nameje nochi ġafopsüġi-ġampsüġi na djuwa?”
³⁰ Jisu í che, “Nüna a ye Yarusalem yo Jeriko ge jimbkoi ye ñigudu tsaġaw na djeshiġiaña i gye í na shalüġülag, sünda gü-shü dañe atrü dzüw datralye katrükralye.
³¹ Sünda ana da, se ġabo ge müġaw a kamkoi, séso í holye ġeaglyeñe djetrükralye.
³² Ana vedumbo Lewi a ye je sešü katcho, ije í holyeñe ġeaglye djetrükralyetcho.
³³ Séso djudamje Samari ñetrü a go sa a kakukülye, sünda í hohulyeñe nülvo vyela.
³⁴ Sünda itrüġañ ge jikuñe seyo ichi üshi ge luvuhu seyo tsühu prüñe gyeche-gyelye yo pyogo, seyo í gügedru ge gyodügyelyeñe ñe ġyow ge lajikye sünda í uwyo hoivo.
³⁵ Se draha í lumu yo bosüñ ksü lahuañe se ñebraw í djüñe che, ‘I uwyo hoivojodawe, seyo bachi go küña kapyoima, se ye no kakuwñe doajome.’ ”
³⁶ Hesahelu he ba vyew ge se na ñigudu-tsaġaw süna ge lyalahado, nadzüngko a dju ichi ġafopsüġi ġampsüġi go na ñe veiya?
³⁷ I che, “Se í dju í nülvodama.” Jisu í í che, “Kai, baje kañe süna dajodawe.”

Marta ñe Mariyam

³⁸ Sündatcholye Jisuñe í shürhaw na jimkoitchoi ye, se í ñetrü a ge ji, seyo Marta cheñe mim a ye í iñe ge balada.
³⁹ Seyo Mariam cheñe uñum a duw, i Tawgyew ishitrü ge ġyoñe í shi-ñu dzüw.
⁴⁰ Sé Marta chiġa da dañe mavenghua sünda itrü iñisa ge jikuñe che, “He Tawgyewwa, ba haje mavema, noñum í no akasa chiġa dawene traadaw ye? Sündada í chetcho, nó datunowe.”
⁴¹ Tawgyew í í trutcho, “Marta O Marta; ba süpyo ñu ha vejema venglyeñe seyo mavenghulyaha.”
⁴² “Séso ñu a ye umsoma, seyo se chiġa uw í Mariam í golame; se í ichi go malaġafijomme.”

11

Tawgyew Küġüw í dadrüw

¹ Sündatcholye ahua ye í nolu a ye küġüngkoi. Seyo í se küġüfiahuñe, ichi shürhaw namko yo a ye í che, “He Tawgyewwa, Yohañ í í shürhaw ná küna veduw küġüdrüdama baje ñi süna veduw küġüdrüwe.”
² I í che, “kye damje djo küġümkoime, sese chejodawe:
‘He Awa,
Bañiñ güdraw vejome, ba ġadzü kakülyawe.’ ”
³ “Ñichi muhu muhu yo tsajo-tujo í ñi djüijodawe.”
⁴ ‘Seyo ñi lalo na muchoaijo dawe,
Hado chemeje ñi je, ñi mauw dado na muchoaijome,
Sünda ñi mauw uw dajo yo ġaksüiwe.’ ”

Prünggudruwe

⁵ Sünda Jisu í ná che, “Djumko ye üdraw a duw ye djuwa, sünda í ñegimko ge pakülyeñe ichi ge ji í chewe, ‘He drawwa; nó odje üka dzü djüwe.”
⁶ Hado chemeje, kasew-biśew go draw a ye nochi ge jikuda, sünda ivro ge vejio nochi ge haje ñime.’ ”
⁷ Sünda í ulung gośü ñu tru, se nó afafsüw djudjüwe; yabó ñegüdrüśü je dugoadammje, sünda nosa ye nodra buġo ge ġusadame, sündada nó bá pakülyeñe haje madjüfijomme.
⁸ No ba trungkoime, se üdraw duñ sese je í pakülyeñe haje madjüfisabamme, sedamje í ñimtchüñ ye tralye prüdo ye í küña tsüdama süña pakülyeñe djüjošo.
⁹ Sünda nó djó cheime; prümeje, djo djüjome; tchümeje djo pajome; dümeje, djobo voaijome.
¹⁰ Hado chemeje dju prüima, ná pajome; sünda dju tchüima, na pajome; seyo dju düima, nabo voaijome.
¹¹ Djomko ye dju ana awu duwa, se üsaw ye odje prüme, se í kunnu djü, seyo sündalye tchü prümeje, se tchü madjüw byu djü?
¹² Semome jeje prülaime, se í mütü güdzü djü?
¹³ Sünda, ba maulyeñe je basa ná ġañ uw djüjo danghumeje, se djo ñedzü go Awu, i ichi nudzoġ nüna prüi ná hado ġulo güdraw madjüjowa.

Jisu ñe mütü na go dyewfo

¹⁴ Sündatcholye Jisu í ügadow ġulo mauw a í lahuatcho; se ġulo mauw ye kahuahüñe, ügadoo ye ütrü zekülye; sünda nüna na mavenghuatsü.
¹⁵ Séso namko ye küña na cheda, “I bó ġuló mauw nachí go dyewfow mütü ichi datunow yo lahuabaiwa.”
¹⁶ Utro na í dafidama hojoñe í ñedzü udru ge hadamge sheweñe cheshew shewe che.

¹⁷ Séso Jisu i, nadrü-nalü ge vedaw i danghulyeñe, na che, “Ha ha ñetrüğüfo ge brağidama, se ñetrüğüfo ye mütrüajome; sünda ha ñe ye brağidama, se ñe ye je mümyajome.

¹⁸ Seyo sünda mütti ye í nudzo íbo magotchow dame, se ichi ñetrüğüfo kúndañe dujowa? Hado chemeje djo nofo go ana cheşoibi, se mütti i datunow yo se mauw ná lahuabaiibi cheñe.

¹⁹ Senameje no mütti i datunow yo ğuló mauw ná lahuabameje, se djó agü na dju tunow yo kaküleyaiya? Sündada ná djo niyay djüw nüna chejome.

²⁰ Séso no Tawgyew udruyo yo uğulo mauw na lahuameje, Tawgyew i ñetrüğüfo ye djotrü ge kakujome.

²¹ Nüna gow na nachi ñe i ğaksüw chiağı pyogoñe ñe í hokrüimeje, se ichi gañ-miğı na ğüdzüw dujo.

²² Seşo ije gofotchow na djuma a í tumuvojoñe í dafoahuñe, í se chiağı na ha ye i veksüdama, sena lağalag seyo ichi gañ-miğı na lağañe habrağiame.

²³ Dju nodra ñima se i no mavyewme, seyo dju nodra dukyegiyima se i trabrağiame.”

Ğuló ñişğzüñ ye ñe tchüw

²⁴ “Nüna usso go ñişğzüñ ğulo kahuahüñe nokro ge ğyogojo tchüğijome, sünda mapawñe i chejome, no ha ñe yo kahua dama se ñe ge kamyotchojome.

²⁵ Sünda kakuwñe i ğümsa-ğümgañe howsa hohujome.

²⁶ Sündawñe i idra ye í je mofokow uğulo mauw mro ye idra ye lakujome, sünda na ilunge kamyoñe sayo sa ğyojome, sünda se nüna ye uvro gow ije mokofofow mauw lyajome.”

²⁷ Sese i he ñu i trungkoi ye upumko go mim a ye gow yo che, “Şüvzüwme se uluhu ye hayo sa a ba ğyodama seyo se apu ye ha ye ba mütsüdama.”

²⁸ I che, “Am; séso şüvzüwme i, dju Tawgyew i ñu dzüñe i chew dzüima.”

Ñedzü go ñu prüw

²⁹ Se şüpyo upu kyeğipyo dawñe, i che, “He ñishü yo nüna na maume; na chishew tchüngudru; se ná Yona i chishew í tralye seyo haje chi mashejome.

³⁰ Yona í küna veduw Ninwe ñetrü go chishew vewma, sünambo nüna üsa ye he ñishü yo nüna na chishew vedujome.

³¹ Müdzavye go nugom niyay djüw se ñetomüdrü ayo nüna nadra gudzuñe, í datrüwñe chejome, hado chemeje i Suleman i ñu dzüjoñe druguw-drulyiw udza go jikuda, sünda holabya he ayo he a Suleman ije dyewfo a du.

³² Ninwe go nüna na Niyay djüw ñetomdrü ye hesalu yo nüna nadra gudzuñe, naso ge truchoaijome; hado chemeje na Yona i ñu tru í dzüñe nadra-nalu muchoagye sünda howe, age Yona ije dyewfo a dume.”

Ussu go mütrü

³³ “Dju nüna je bela ge mütrü tchühoñe ğümşü ge seyo ñeshü ge mavewme, seşo mütrü ubo ge dzugo vewme hado chemeje nüna jikui na hohujoñe.

³⁴ Baso go mütrü ye bañi ye me, sündada bañi ğüdrameje, se basso naje vyow müsajome; séso se ye maumeje, basso ge je nukuğujome.

³⁵ Sündada ufu je ksü-üñi je ksü dañe ğyowe, se müsaw ye baso duwye nukuğuañeme.

³⁶ Sündada baso ye vyow müsazeğiame, seyo se ichi hangeje manukrumeje, se sündame se vyow na müsajome, süna vyeduw ñeto ge dadawa, se mütrü ye ichi lünaw yo djó müsaw djüiwa.”

Mim na seyo Farisi na gohaw

³⁷ Jisu i ñu trungkoi ye, djudamje Farisi a ye i che, se nochi ge jiñe ava tsawe; sünda i ñelu ge djemyoñe ava tsajoñe ğyoag.

³⁸ Farisi na basha go na ava matsalu üshi-upo machew í holyeñe mavyenghua.

³⁹ Tawgyew i i che, “O Farisi, ba bekasa seyo bela na udru udru go ğüdrawşo, séso balung ge vyesbiw seyo mauw vyesumokradama.

⁴⁰ Budzu ñiw nawa, dju ñepsü go vye ye dadama, hawa se i ulung go i madaima?

⁴¹ Am séso, ulung go gañ-miğı duw na chi djüajo dawe, sündameje bábo vyow ğüdraw lyajome.”

⁴² “Se Farisi nawa, djo tui me! Ba pudina ñe sudab yo, seyo vyow ñomñow sheğe bağüdo yo ülye ğü tronguaña djüşoma, séso Niay i seyo Tawgyew i nülvo í mahutroiwa; tsüwbo tsüda hena je dağudru seyo sena je tratcho.

⁴³ Farisia nawa, djo druge tui me! Djo ñegru ge nugo buğo uw vye seyo badzağ ge ye djó gaga tsüw.”

⁴⁴ “Djo tui me! Hado chemeje djo se pelyadu nuğu vedudame, süge nüna na udru ge düğrüñe kahi, se madanguhuw nuğu du cheñe.”

⁴⁵ Sündawñe mükýew a ye í che, “Dadrüwa, he ana cheñe ba ñi tchügoime.”

⁴⁶ Jisu che, “Oi shotuko-kunu dakyew nawa, djoje tui me! Djo ana lojemalofi w gañ me, nūna nadrū ge jo so i sešo yabó djo djogzútsū a je madadū.”

⁴⁷ Djo je tui! Djo se ñihow truw na nuḡu chiw, dju djo aki-awu na shilyedama.

⁴⁸ Sūnda: djo truksūw nūna me, seyo djo aki-awu na dalyedaw yo uw vye; hado chemeje na bó ná shidabi sūnda djo ná nuḡu í daw.

⁴⁹ Sūndada Tawgyew i patsū-sholu je chedame, se no nachi ge ñihow truw seyo shūrhaw kiajome, seyo na naḡiyo kūña na shiojema seyo kūña na daše-damejojema.

⁵⁰ Se i ye kūña ñihow truw duma našū í he druguw-drulyiw í dakūlyejobo a fualyedame, vyew na ḡilyedo ye he ñefo ayo nūna nachi yo lajodawe.

⁵¹ Habil í úšū yo dalalye Jakaria í shiw kuw se psūḡaṇe mūgañe naksūmko ye shiw: no djo umso truime; ichi ḡidoye he ñefo syo shūdo nūna nachi go lajome.

⁵² Shotuko-kunu dakyew djo tui me! Se djo je patsū-sholu veḡiw bo ladašome, séšo djo djoluvyo makakume, seyo kakujofne dado na dugo vye.

⁵³ Sūndalye í sa yo kahuahūne, sese shizew-ñuzew nañe seyo Farisi šūpyo ifum kase seyo i dagtso-damrhūne, ha ha ñu büttruluweñe da, se í šūpyo ñu ufo büttruluweñe

⁵⁴ sūnda na i ha ñu chehualaima ḡyokrū ḡyo, se umdzu yo ha damje ñu zetruahuw ye kigolajofne.

12

Ḡivow seyo Farisi na dambo djulyawe

¹ Aña a sese hadzaḡ-hadzaḡ dzaw nūna fuguñe, aña ana kuw naḡütchū tcheḡi-lūgyeḡi da, se i uvromashū í shūrhaw ná che, “Farisi nago loḡáloḡe yo ūḡa ḡyodawe.

² Vyojo haje dūmyofne maveme, madanghujo haje mūšūne maveme.

³ Sūndada ba ha damje nukuḡuw ge chedo ye, se i mūsaw ge dzūhujome; seyo ñeḡūñ ulung ge ufu ge ha ašesa yo chedama, se ye ñelütsū udru go yo trujome.”

Iyo ḡewe

⁴ “Séšo no djo trungkoime, nodraw nawa, dju usso i shifidama se na seyo ha madamñefijomme, ná djuḡejo dawe.

⁵ No djo trumchemjome djo djú ḡejoma, dzūwñe djú chigūje ge lañe djoafima, se í ḡejo dawe; no djo trupangkoitchoimme, se í ḡejodabuwe.

⁶ Hawa ajolya ksū yo sūlyisa pom madrūafima? Sedamje Tawgyew i namko ye a ye je makošoa.

⁷ Bakye go vyow ūkyetrū duw naje ngūmdzo vedame, sūndada: djuḡejo dawe, ba sūlyisa na dafowme.

Jisu í matsūne chewye hama

⁸ “No djo chengkoime djudamje no nūna navro ge nó nošobiñe danghumeje na je nūna ūsaw ye je Tawgyew i sorgomuko uvro ge ēšobijome.

⁹ Séšo dju nūna navro ge no hopseḡiahima ije Tawgyew í sorgomuko uvro ye hopseḡiajome.”

¹⁰ “Dju nūna ūsaw ūtūma mauw truima, í datrudaw í muchoaijome. Séšo dju ḡulo ḡūdraw ūtūma mauw trūima, í datruw í mamuchoijomme.”

¹¹ “Nūna na ba mūḡaw-ñegru seyo mūkyew seyo damikyew navro lakuwñe, ba navro ge ha chemeje ujojema seyo kūna chejojema se na djuvengūajodawe.

¹² Hado chemeje ḡulo ḡūdraw ba sayo sa a ha chejome zedrūjome.”

Nūna nugo a ye veduw

¹³ Seyo upu go nūna a ye í che, “He dadrūwa, noñuw í awu í bo-luko ná noje hawe chejodawe.”

¹⁴ Í í che, “Nūna nawa, nó dju niyay djūw seyo baḡūḡiw nūna boña?”

¹⁵ Sūnda i í che, “Uw yo ho ḡyodawe, seyo tsaḡa-laḡaw sūna yo basū ḡyodawe; hado chemeje nūna na shūw ye dju bo-luko duw yo mashūwme.”

¹⁶ Í í zeḡaw a tru, “Tūmbum nugo a í no ge rhamu šūpo kakūlye.

¹⁷ Sūndawñe i ulvyu ge no hadajojemmañe ve, hado chemeje nochi ge bo no dakūlyedaw rhamu na vejo buḡo je ñi.

¹⁸ Sūnda i che, ‘no ana dajobabi: no nó ñetchū í tashalyeñe dyew dalajo; sūnda no rhamu seyo bo-luko na vyow sūḡe vejo;

¹⁹ sūnda no ḡulo i chejo, ḡuloa, bachi ge oje šūpo ūḡalaw kuw bo-luko vewme; ḡyogowe, tsawe, tuwe seyo lūshūw yo ḡyowe.’

²⁰ Sešo Tawgyew i í che, ‘Chí madnaghaw nūna! He ñegimdo ñegi a ba lutuw ye lutukyoadūḡejomme; sūndawñe ba kūña dashūtrūne vedama, se ye djuchi lyajowa?’

²¹ Ana je nūna duwme dju nudzo ubo bo-luko dashūtrūne ve, sé í Tawgyew iñḡzū ge nugo mo.”

Ha ñu yo je duhu djudajo dawē

²² Sūnda í í shūrhaw ná che, “Sūndada no djo trungkoime, nudzo shūjo-dujo ubo djuvewe, no ha tsajojemañe; seyo nudzo usso ubo je ha gye-ḡuwo shejojemañe.

²³ Hado chemeje tsaw-tuw í shūw ye, seyo gye-ḡuwo í dyewfo usso yeme.

²⁴ Pūlḡam na hojodawe; na zuje mazuw seyo ñetchū ge rhamu je mapaw; sedamje Tawgyew í ná tsakyewšo. Bá musu na fow go añe dufowme.

²⁵ Djomko ye dju duwa, dju vengaw yo nudzo í shūngkoi ge ganta a ña damje shafijo ye?

²⁶ Sūndada ba imisa fo chiḡa ije madafimeje, hado utro ñu ná lañe vemyoñña?

²⁷ Bye go shoba ná hojo dawē, na kūndañe shūlyima; na chiḡa je madaw chitra je madaw; sedamje no djo chengkoime, Suleman je í kūña ūbadzū gidama, namko ye ana veduw gañ a je magime.

²⁸ Sūndada Tawgyew í no go suso-mūtchū namaje yow gye sheida sūnda draha ná boti shūw ge joañe, anambo gye-ḡuwo sheñe veihome; Tawgyew ge mesame veksūw nawa, djo kūnadañe añe masheijowa?

²⁹ Sūnda djo ha tsajojema ha tujojema sūna ve djuḡyowe, sūnda meaje mavemyow djudajodawe.

³⁰ Hado chemeje he druguw-drulyiw ayo go vyow tuḡu-tumo na he ana veduw bostu na tchūnggudrumme sūnda ba Awu danghudame djo he bostu na šūpo tsūda cheñe.

³¹ Sēšo ichi ḡadzū í tchūjodawe, sūndameje, he bostu naje pajome.

Bo-luko ná hange dashūttrūñe vejowa?

³² “Nūna imisa nawa, djuḡejodawe; hado chemeje ba awu í bá ḡadzū paweñe vedame.

³³ Nudzo ichi fuñ-voñ na draalyeñe tunojodawe; sūndalye nudzo ubo ana dalajodawe, ha ye ūme malyajoma, sūnda soḡgo ge ana bo-luko dashūttrūlajo dawē ha ye makaajoma, djutrū iñisa ge tsaksutchūw naje majikujō seyo bulu naje mauw madajo.

³⁴ Hado chemeje hange bachi bo-luko duma, badrū-balu he sūge dujome.

Dashūttrūjo ḡyovojo dawē

³⁵ “Djotsū na pyogo vejo dawē, seyo dju mūttrū na dzodūgyejo dawē.

³⁶ Sūnda djo se kulo na veduw dajo dawē, dju nudzo dadrū í gzū jiw go ke kakujojemañe ḡyokrū ḡyow veduw; i kakuñe ñegūdrišū dūwñe mekutcho djeñe voa.

³⁷ Gaḡūzewe se kulo í, djū dadrūw ye kakuñe madrumuvow hohudama; no djo umso trungkoime, í ūtsū ge pyogolañe ava tsajoñe ḡyovojo, sūnda ūñisa jiñe í hojjo.

³⁸ I ñegi ge ūlye ksū seyo ūlye dzū ñepūñew ge je pakūlyew hohumeje, se kulo ye gaḡūzebamme.

³⁹ Djo he í danghujo vejo dawē, ñe ūbraw ye tsaksutchūw na tsaksuw ke jikujoma se í danghubammeje, í pakūlye ḡyobjobbamme, sūnda nudzo ñe ge majimyyogyejome.

⁴⁰ Bajē dashūttrū ḡyobjobbamme; hado chemeje ha homoi ye jikujojñe mavew se homoi ge nūna ūsaw jikujome.”

Veksūfiw kulo djuwa?

⁴¹ Sūndawñe Patras í che, “He Tawgyewwa, ba he zeḡaw ye ñi aka bama mow vyow naje truwma.”

⁴² Tawgyew í che, “He veksūw seyo patsū-sholu hokrūw ye djuwa, djuchi dadrūw ye ná tsaw-tuw homai ge djūweñe kulo-kutro boñe ve.

⁴³ Se kulo ye gaḡūzeme, djū í dadrūw ye ana dangkoiye hohudama.

⁴⁴ No djo umso cheime; í í nudzo ichi vyow bo-luko ge zeḡiw vejobbamme.

⁴⁵ Sēšo se kulo ye ulu ge ana vemeje, no dadrūw ye ūḡalaw ge kakujobañe veñe, sūnda kulo seyo kulom na ḡūñe seyo tsañe tuñe tukrañe ḡyomeje.

⁴⁶ Se kulo í dadrūw ye ana ñeto a ye, í madanghuw ñeto a ye, í í maḡyokrūngkoi ye, seyo í madanghuw homai ye, kakujō sūndañe í sojai djūñe í usu maw ge ḡūañe vejo.

⁴⁷ Seyo se kulo dju nudzo dadrūw í vėw í danghuñe, seyo madashūttrūvoñe seyo í vew kuw ge makasabbammeje, šūpo tsalajobbamme.

⁴⁸ Sēšo dju madanghuñe ḡūw tsalajo chiḡa dadama se ye me tsalajobbame, sūndada dju añe djūdama, í añe prūjome; seyo dju šūpo boñe vedame, ichigo añe lajome.

Ḡūdžūw dušome

⁴⁹ “No druguw-drulyiw ge mi dahow kakūlyahume; sūnda ha tsūdawa chemeje hesalu mi dzomzoaweñe!

⁵⁰ No baptisma lajome; sūnda no malamdlolu kuw no kūna mauw ñiku-ñisūw ge ḡyobjojema! ⁵¹ Ba vedaw ye no he druguw-drulyiw ge ḡūdžūw kakudañe vedama? No ba chengkoime; mome, no dabraḡiahuw kakūlyahume.

⁵² Hado chemeje hesalu yo ñe ge nūna pom naḡūtchū ge magaḡijome, dzū ye ksū ūdra seyo ksū ye dzū ūdra.

⁵³ Awu ye saw üdra, seyo saw ye awu üdra maveĝijome; añ ye sam üdra seyo sam ye añ üdra, apye ye safu üdra, seyo safu apye üdra maveĝijome.”

Ümdrü í hosüw

⁵⁴ Sündä i upu naje che, “Mumu ije druguw go kalyiw hohumeje, djeañe ñedzü šüjo chew; sündä süna dabaibi.

⁵⁵ Sündä müdza gow ñedzü lyiw hohuñe cheibi, ñedzü shüw lyijome, sündä süna dabyo-dağyotcho.

⁵⁶ Loğa-loĝe nuna nawa, djo ñedzüñe no naksü í utroñe danghudameje, hado he shüw-duw ubo kündañe madanghufia?”

Nudzo ñu duw ná chebruwawe

⁵⁷ “Ba hesalu ba nudzo yo hado ñu mavelafia?

⁵⁸ Ba bá fodaw nuna üdra mukow ichi ge jingko ye, ĝabo ge ñu chegüdrajo dawwe, momeje ba í mukow ichi ge šüñe lajikyeñeme, sündä mukow í bá shipashi nagzü ge djüñe seyo shipashi na bá pache ge shüñeme.

⁵⁹ No djo trungkoime, ba ajolya ajolya dañe magimdzoalu kuw, ba makahuañijome.”

13

Vegudolawe mome mütrajobamme

¹ Nuna üchea sayo sa a djeku, seyo Jisu í Galiliyo nabo go ñu dzüngkoi, djušü í Pilatus í í kügüw ge djüasadamma.

² He í dzühuñe Jisu í na che, “Djo ana veima, he Galili na utro Galili ná lalofoñe, hado chemeje nadru ge ana veduw ñiku-ñisüw djüda che?

³ No djo trungkoime, mowme; sêšo djo djüdrü djolu mavetülumeje djo vyow he ñom yo mütratsüjobamme.

⁴ Mow djo ana vedama, Shilom ge nuna ĝütrü šügzü djudrü ge post gaañe trüalyañe dzüdama: na vyow Yarusalem ge küña tuĝu-tumo shütsüdama ná lalofoma?

⁵ No djo trungkoime, mowme; sêšo djo djüdrü djolu mavetülumeje djo vyow he ñom yo mütratsüjobamme.”

Lufuje üyañ üje majew

⁶ Sündä i he zegaw ije tru, “Djuchidamje anggur vi ge lufuje üyañ a zuñe veda: i sayo sa a sheje thcüw jikuda, sé í mapa.

⁷ Sündä i vi ĝyokrüw nuna i che, ‘Howe oje dzü gomdo no he lufuje üyañ go sheje thcüw jikunggudru, sé keje mapa, he í chepyojo dawwe, i hado no í ĝyokrügejowa?’

⁸ I ana che, dadrüwa, í oje a kuw ĝyokrülüwe; no üdza üdza ge no chigüguañe nobi sujome.

⁹ Sündañe, drawha ge sheje jelaimeje uw; se molaimeje chepyojo dašobe.”

Mim utsubo kuw í dagyow

¹⁰ Ğyogow ñeto sehu Jisu kügüw ñegru a ye truñe ĝyoda.

¹¹ Süge mim a du, dju oje ĝütrü šügzügomdo ksuw kaw mütü a kamyoda, sündä i utsubo kuw lyada, sündä i keje gudow magudzufiwbi.

¹² Jisu i hohuñe balayeñe, che, “O mimya, ba bá hamalyiw yo kahuañemme.”

¹³ Sündä i ügzü í udru ge ve, sündä i djeañe gudow lyajebi, sündä Tawgyew í trokülyejebi.

¹⁴ Hado chemeje Jisu í ĝyogow ñeto sehu dagyoda, müğaw na seyo nugobraw na nuna na che, “Ñegi ĝe duw me, sa yo sa chiga dajo dawwe, seyo se ñeto ye jikuñe dagyojo dabuwe; sêšo Sabat ñeto ge djudawe.”

¹⁵ He í dzühulye Tawgyew i che, “Loğa-loĝe nuna nawa, ĝyogow ñeto sehu djo djó nudzo fulhu seyo ĝigá na ñe tashalyeñe hu tuw lañe majikewma?

¹⁶ Seyo ha ye madafijo cheña, he mim Abraham üsam djuso ge oje ĝütrü šügzügomdo mütü ye pyogodama, se í ĝyogow ñeto ye vogodaw í kihuaño?”

¹⁷ Ná he ñu na chewñe, í ubo mauw dai na ñimtchüñ lyatsü, seyo vyow upu na se uw chiga dadaw ubo lüshütsü.

Pemdu üsü seyo pa í shipyew

¹⁸ Sündä Jisu í chetcho, “Tawgyew í ĝadzü dju veduda? Seyo no í ha shipyew üdra djüsejowa?

¹⁹ I pemdu üsü a veduwbame, djü nuna na lañe ná vi ge trawma; sündä i shülyiñe shoñ lya; sündä ñedzü go musu na ufotsa ge guñe ĝyow.”

²⁰ I sündä chetcho, “No Tawgyew í ĝadzü í dju vedu dañe vejowa?

²¹ I pa vedudame, djü mim a ye lañe oje ulumo tola dzü ge gülüšügia, sündä ñu-ñuñe oje ulumo ye pa lya.”

Ñegüdrüshü imisa

²² I ñetrü-ñetrü jiñe dadrüshü Yarusalem ge ji.

²³ Sünda djudamje a í che, “He Tawgyewa, nuna mesame basüafijobama?” I í che,

²⁴ “Ñegüdrüshü imisa yo jimyojodawe, hado chemeje no djo trungkoime, šüpo nuna na jimyojoñe dajome, se majimyoñijome.

²⁵ Ñe ubrow gudzulyiñe ñegüdrüshü dugoahuñe, seyo ba ñepsü ge gudzuñe ñegüdrüshü düñe che, ‘He Tawgyewwa, nobo vojodawe,’ sünda i sügow no ba madanghume, ha hanggowa?

²⁶ Sündawñe ba chejo, ‘No ba how ge tsa-tuw sünda ba ñi bodzağ ge dadrüda.’

²⁷ Séso i chejo, no djo chengkoime, ‘No madanghume djo hanggoma. Mütü chiğá daw nuna nawa, djo vyow no yo üga gyojodawe.’

²⁸ Süge ksew seyo utu trashügrüjome, ba Abraham, Isahak seyo Yakub seyo vyow ñihow truw ná Tawgyew ge ġadzü ge gyodaw hohuñe nudzo í ñepsü kahuahuw hohujome.

²⁹ Sünda druguw seyo drulyiw; tchüsa seyo müdza go nuna na jikuñe Tawgyew i ñetrüğüfo ge dusejome.

³⁰ He i danghulajo dawe, küña ná fum ge duma, na uvro ge dujome, seyo küña na uvro ge duma, na fum ge dujome.”

Herod i vyeñiw na

³¹ Sa yo sa küña Farisi na jikuñe í chejea, “Ayogo kahuañe kajo dawe; hado chemeje Herodes i ba shijoñe vedame.”

³² I ná che, “Kañe se šelü í trujodawe, howe, no yow je seyo draha je uğulo na lahuañe seyo usso naw na dagyojolume, sünda ñegi dzü ye no chiğá damdzoajome.

³³ Sedamje no yow, draha seyo pülha kuw jijome, hado chemeje dju ñihow truw na Yarusalem í ñepsü ge madzüñijome.

Yarusalem ubo duhu

³⁴ “He Yarusalem! He Yarusalem! Ba se ñihow truw ná shiye, seyo bachi ge dju kiima ná kunu yo trümoahije; no ana veduw küña tsüda, joñi i üsa ná utupro ulung ge küna tchelaima, sünambo noje basa ná lakeyeğiajoñe daw, sé ba he í matsü.

³⁵ Howe, bañe babo kabra-kasağijjome, sünda no djo chengkoime; ba ‘Ná üdrü-ulu yo uw cheime, se nuna ye gağüzü dume dju Tawgyew iñiñi yo lañe kakuima,’ machemdolu ba nó keje mahohujome.”

14*Ğyogow ñeto ge dagyow*

¹ Sünda í ġyogow ñeto sehu djudamje Farisi nágo nugo a í ñe ge odje tsaw ji: sünda ná í usu yo hopasa.

² Süge í veduw muhu a du, dju usso dalfuñe nada.

³ Jisu í Farisi seyo shotuko-kunu damivro ná che, “ğyogow ñeto ge dagyomeje ujo ma mow ma?”

⁴ Sé na madañda ġyo. Sündawñe Jisu i í ügzü kiñe dagyo, sünda kadügye. Sünda i í ügzü kidüñe dagyo, sünda kadügye.

⁵ Sünda i ná che, “Djongko ye dju duwa, djusa seyo fulhu ye kalü ulung ge gamyoa sünda ġyogow ñeto ye kutcho malahuajo.”

⁶ Sé ná he ñu ge haje machefibi.

Tumowna ná hovow

⁷ I hobanda, tumona baladaw na uw uw buğo tsatchüñe lai sünda í se ná hoñe zeğaw ze,

⁸ “Djuma djo ġü ge balai ye, buğo dyew tsatchüñe djuğyojodawe, asha baje dyewfo tumona baw je dufijome.

⁹ Sünda dju ije seyo baje badama, bá jikuñe ana chemeje, ‘í buğo djüjo dawe,’ sündawñe ba ñimtchüñ lyañe ülafo buğo ge ġyow dujobamme.

¹⁰ Sé bá bawñe, ülafo buğo ge jiñe ġyojo dawe, bá badaw nuna ye jikuwñe, bá ana che ‘Drawa, uvro ge kalyiñe ġyoa,’ sündawñe badra a ġyosadaw navro ge udru kalyijome.

¹¹ Hado chemeje dju nudzo yo dyew dalaima, se ye imisa lyajome; seyo dju nudzó í imisa dalaima, se ye dyew lyajome.”

Dakülyew

¹² Sündawñe Jisu i í baladaw naje che, “Djo ñeto ge damje ñegi ge damje ava tsaw ge, nudzo draw, ayo-ñuw, ñeşü seyo nugo na djubajodawe, ana dañeme, naje djo balañe dağüñeme.

¹³ Sé ba ava tsakelai ge sapse, hamalyiw, üshilyew seyo iñiğew ná bajo dawe.

¹⁴ Sündawñe ba gağüzebamme, hado chemeje nachi ge djó djüjo haje ñiwmme, séso djó ná güdraw yo üşhükülyejo go küğüjome.”

Tsaw-tuw dyew go shipyew

¹⁵ Üdra ava tsasangkoi go nūna a ye he ñu ná dzühulyeñe che, “Gağūze nadra dujome, dju Tawgyew í ġadzū ge odje tsaima.”

¹⁶ Ná í che, “Djudamje nūna a ye ava dyew tsakeñe seyo sūnda šūpo ná ba.

¹⁷ Tsaw-tuw dafihuñe, í í kulo ná tumona baladaw ná cheñe ki, ‘Age djebe; tsaw-tuw dafiadamme.’

¹⁸ Sé vyow na chetsü, ‘uvro go ye í che, no vi a prūlawme, sūnda no se í hojo dume; no ba chengkoime, no maf daijo dawē.’

¹⁹ Ütro a ye che, ‘No fulhu fulshi pom lawme, sūnda no he na dañe how jingkoime; no ba chengkoime, no maf daijo dawē.’

²⁰ Sūnda a ye che, ‘No gzü dawme, sūndada no majikufijome.’

²¹ Se kulo ye jekuñe í ñe übraw í he ñu ná trutsü. Sūndawñe se ñe ubraw ye lusuvyulalye í kulo í che, ‘ñetrü go bozağ seyo ġabo ge kutcho jeñe sapse, kiği, üshilyew seyo iñiğew ná age lañe kakuwe.’

²² Kulo ye che, ‘O übrawa, ba kūna chedama, sūna damme; sé yaje buğo ufo dulumme.’

²³ Übraw ye kulo í che, ‘Ġabo ge seyo fūta duw ge djeñe nūna ná kūnadamje lañe kakujodawe sūndameje noñe gujome.’

²⁴ Hado chemeje no djó trungkoime, se tumona badaw ná no tsaw-tuw í tsapüñeje matsapüñeje.”

Dju Jisu í kulo lyafijowa?

²⁵ Sūnda upu na ufum kasawñe, sūnda Jisu í fum ge tchoñe ná che.

²⁶ “Djudamje nochi ge jikuñe, seyo nudzo awu, añ, ufum, agü, ñu seyo ñum seyo nudzo shüw-duw naje mahosübammeje, í no shürhaw mowme;

²⁷ Seyo dju nudzo shokru íje magilama; sūnda nofum makameje; se je no shürhaw madafijome.”

²⁸ “Djomko ye dju post dzuğoñdama, seyo uvromsahü bo kūña kajoma, damdzojo kuw nochi ge duşoma ñima mahow?

²⁹ Ana dawñe, í shobo dzugoñe ñekru makrufiwñe, sūndawñe hovow nūna na vyow í tchügojoşo,

³⁰ ‘He nūna ye damyowbo damyodaşowa, sé madamdzofiwa?’

³¹ Mo dju ñubyu duwa, ütro ñubyu nadra tumo daw jiw, sūnda uvromashü ġyoñe mavemchevzüme, se hadza büsha kulo lañe nodrü ge tujovodawye no hadza ġü lañe üdra dağufijoşoma mo mowma?

³² Mowmeje üğa ġyodamje, mukow kiñe ñu ġüdzüagyeñi.

³³ Ana veduw djo nudzo ichi kūña дума ná nobo matrafimeje, se ye no shürhaw malyafijome.

Tsamtsalyow ġu

³⁴ “Ġu bo udame, sé ġu tsamğüw lyameje, se í ha yo ġu lüw dajowa.

³⁵ Se ye no ubo je seyo nobi ubo je chiğa ge makakujomme: se í nūna na ñepsü ge joajohubamme. Djuchi ge dzüjo ufu дума duma dzülasajodawe.”

15*Fugulu moahuw í shipyew*

¹ Vyow patso-law na seyo lalo ubraw ná ichi ge dzüw jikuw.

² Seyo Farisi na seyo shizew-ñuzew na dubyoğunguñe che, “I bó lalo ubraw ná tüvañe seyo nadra ava je tsasai.”

³ Sūndawñe í ná he zeğaw í tru:

⁴ “Djongko ye djuwa djuchi fugulu fuğua дума, sūnda namko sa a moahuñe se sütü ġütrü sütü ná nodo ge tralye, se a moadaw í matchülalu kuw tchü ġyo?

⁵ Sūnda tchülawñe, í šüpo lüshüw upostu ge trütalañe ka.

⁶ Sūnda ñe ge kakuñe draw seyo ñeşü na bakeğiañe che, ‘Nodra lüshüsawe, hado chemeje nochi fugulu moadaw ye tchüladamme.’

⁷ No djo trume; ana veduw ñedzü ge je lalo a dju vyegudoladama ubo lüshüjome, kūñambo sütüğütrü sütü nūna ġüdraw dju ulu mavegudojo дума nabo madama.

Bosüñ moahuw í shipyew

⁸ “Ana mim dju dujowa, djuchi ge bosüñ ġü duw, sūnda namko ye bosüñ a moadabi; sūndawñe í matchü uw mütrü tchühofne seyo ñe na süñe, dju uw yo matchüjowa?

⁹ Sūnda tchülawñe, í üdram na seyo ñeşü ná balañe che, nodra lüshü-lübasawe nochi bosüñ moadaw ye tchüladamme.

¹⁰ No djo truime; ana veduw, lalo nūna a í ulu vyegudolaw ge Tawgyew í sorgomuko ná ana lūshūjome.”

Saw tsaḡudroahuw í shipyew

¹¹ Sūnda Jisu í che, “Nūna a ichi saw ksū duw.

¹² Naksūmko ye kiḡiw ye uyow í che ‘Awa, nobo go bo-luko duw ye, no djūjo dawē.’ Í í ichi bo-luko na haḡiag.

¹³ Sūnda ñegi añe makulu fum ye ūsaw kiḡiw ye vyow dashūtrū lalyeñe ñetrū ūḡa a ge katrūkralye, sūnda sūge bo-luko duw na vyow tsaḡudroamdzoag.

¹⁴ I vyow damdzoahūñe, se ñetrū ge nokrow kaku, sūnda i usso ufobūla lya.

¹⁵ Sūnda i se ñetrū go nūna a ichi ji, se nūna ye í í vi ge vo na ava gyew ki.

¹⁶ Sūnda i ve uluhu í gudugyejoñe se votsa pago go vo na tsa; hado chemeje í djuje haje madjū.

¹⁷ Í vepalawñe, sūnda che, ‘No awu ichi kūña vi daw ná tsaw-tuw añe paw, seyo no age luhušūw yo dzūangkoibi.

¹⁸ No gudzulyiñe no awu ichi kañe í chejo, awa no ñedzūñe ba how ge lalo datroadašomme.

¹⁹ No basaw chejo haje matramme, no ba vi daw a veduw vejodawe.’ ”

Saw tsaḡudroahuw í kakutchow

²⁰ “Sūnda í gudzulyiñe, i awu ichi ge ji: ūḡa gudzudalu sa a uyow í í hoñe nūlvo veag, sūnda gyojeñe í krumogo lag, seyo šūpo chuma tsa.

²¹ Ūsaw ye í che, ‘Awa, no ñedzū í hovow seyo ba how ye lalo dadamme; sūnda hesalu basaw chejo go ñimme.’

²² Sé uyow í í kulo ná che, ‘Kutcho shedra uw yo je uw lañe í sheijodawe, sūnda ūgzūtsū ge gūtsūlye lyeijo dawē, seyo ishi ge shita duijo dawē,

²³ Sūnda rhano a dajo dawē, sūnda me ñi tsa-tuñe lūshūfijobi.

²⁴ Hado chemeje nosaw ye dzūwmme, sūnda ūshūkūlyedamme: moahumme, hesalu tchūlatchodamme.’ Sūnda í lūshū-lūbaw da.”

Saw nugow í shipyew

²⁵ “Sé ūsaw nugow ye vi ge du. Sūnda í kañe ñe kakulai ye, i nuḡuw dagruw seyo ñuksu daw dzūhu.

²⁶ Sūnda i kulo a í balañe dzū, ‘He ha dangkoiya?’

²⁷ Í í che, ‘Ba ñuw kakudamme, sūnda ba awu í tsa-tuw dyew vedame, hado chemeje í í nūna uw hohuda.’ ”

²⁸ “Saw nugow ye he í dzūhulyeñe í lusuvyumfoag seyo ñe ulung makamyogōñ lyag: séso uyow í ñepse ge jihuñe í nū.

²⁹ Í uyo í che, ‘Howe; no añe ojegomdo bá ḡaksūñe ḡyow, sūnda ba chew keje madzūgaahuw, nodraw nadra lūshū-lūbaw dajo, ba no yow kuw kūšūsa ūsa adamje madjūlu.

³⁰ Séso he basaw ye ba bo-luko ná utroñiw mim nadru ge djoañe kakuwñe, ba ubo añe dyew tsaw-tuw dañe gyew.’

³¹ Í í che, ‘Sawwa, ba shūwduw nodra dusaw; seyo nochi ha duma se vyow bachibamme.

³² Séso hesalu lūshū-lūbajodume hado chemeje he ba ñuw ye dzūñe ūshūkūlyetchodabi; moadabi, se hesalu tchūlatchodabi.’ ”

16

Budzu duw nūna

¹ Sūnda Jisu je í shūrhaw ná che, “Nugo a ichi ge hokrūḡiw a duwme, sūnda nūna na i howye se hokrūw í i bo-luko ná tsaḡudroahime cheñe usso ge trutchoañe ve.

² Sūnda nugo ye í balañe che, ‘He hawa no babo go ñu dzūhuiye? Ba hokrūšo cheñe shewe; momeje ba hokrūḡiw ge maḡyofijome.’

³ Sūndawñe hokrūḡiw ye vemchepūñe, ‘Hesalu no hadajobya? Hado chemeje no ūbraw ye hokrūḡiw go no lahuangkoibi: noje no machifi; seyo no tsatuḡujoje šūpo ñimtchūñ vei.

⁴ No danghudaba no ha dajoma: nó hokrūḡiw go lahuahuwñe nūna na nó nañe ge lajo.’

⁵ Sūnda i ūbraw í chi gudzūdaw ná a a balañe dzūpūñe, no ubraw ichi ge ba kūña dojo duwa?

⁶ I che, ‘Fuḡua tsow psūw tel du,’ sūnda i í che, ba kutcho ḡyoañe kako ge pomḡū ḡijo dawē.

⁷ Sūnda i utro a í dzūtcho, ‘Bachi kūña dojo duwa?’ I che, ‘Pu ulumo fuḡua tsow dume,’ sūndawñe í í che, ‘Bá kako lañe šūgzūḡū ḡijo dawē.’ ”

⁸ “Ūbraw ye se machiñiw hokrūḡiw í tro, hado chemeje i budzu yo chiḡa dadabi; hado chemeje he druguw-drulyiw go nūna na ná ñeto go nūna nadra chiḡa dasaw ge, mūsaw go nūna ná fow budzu du.

⁹ Sūnda no djo cheime, mauw go bo yo ba nudzo ubo ūdra dalajo dawē; hado chemeje i kaahuñe, bá na shūwa-shūw lūshūw ge lamyosajo.

¹⁰ Dju imisa yo je imisa ge usuima, ná aŋe ge je usujobamme: seyo dju imisa yo je imisa ge usu mowma: se na aŋe ge je usu mojome.

¹¹ Sündada ba he druguw-drulyiw ayo bo-luko ge usu mowbammeje, bo umso dju djüjowa?

¹² Sündä ba tuğüda-ğuvodzü i bo-luko ge je usu mowbammeje, ha ye bachi ma, se í dju djüjowa?"

¹³ "Dju kulo ye je übraw ksü í mağaksüfijome hado chemeje i a í mahoğon dajo seyo a í nülvo dajome; mome a udra gaagijo seyo a üdra magağijo: ba Tawgyewñe bo-luko naksü í mağaksüfijome."

Tawgyew í gadzü i go

¹⁴ Farisi na, dju tsağotüdama, he na dzühulyeñe Jisu í maw-uw zekülye.

¹⁵ I ná che, "Djobó nüna na how ge uw dañe she, séšo Tawgyew í djodru djolu ná danghuwme, hado chemeje ha gañ ye nünan na how ge dyew dama, se ye Tawgyew í iñigzü ge imisame."

¹⁶ Yohañ í kakuw kuw, shotuko-kunu seyo ñihow truw naje ná chiğa daw. Sehu ñetogomdo Tawgyew í ñetrüğüfo go shi-ñu truñe kaw, sünda vyow nüna na süna datsü.

¹⁷ Nedzüñe no naksü í kabrağiahu ye shotuko ütra a yo lyajobame.

¹⁸ "Dju nudzo ufum udra brağilyeñe utro nadra gzü daima, se na lalo dawme, seyo dju brağiñe gyodaw mim í gzü daima se ye lalo dawme."

Nugo nünañe sapse Lajar

¹⁹ "Nugo nüna a duw dju djüw rong seyo gye uw shewma, seyo shüwa-duwa lüshü-lübaw dañe gyonggudruw.

²⁰ Sündä Lajar iñiñ yo sapse seyo tsadu yo guñe í molgi ütrü toi tralye.

²¹ Sündä í vew, nugo í tsamyew djoadow yo uluhu í tsaşelajo; momeje şulyo na je í tsadu í kañe tsalowba.

²² Sündä se sapse ye dzütrükralye, sünda sorgomuko na í Abraham ichi laku. Seyo nugo ye je dzüdañe zuadabi,

²³ Sündä noğu üşü ge şüpo naw yo iñi voaŋe üğa go hobanda, Lajar í Abraham í udru ge ggyodaw hohu.

²⁴ Sündä í guksuñe che, 'He Awa Abrahamya, no nülvo veñe, Lajar í kiñe, ügzütsü üdza ge hu pagzüñe nozelbüla í ngüadügyeje daw, hado chemeje no he mi ulbu dzongkoige dzahiimme.'

²⁵ Séšo Abraham i che, 'Sawwa vehujodawe, ba bá shülye ge gye-ğuvo uw shehulyewme, sünambo Lajar í gye-ğuvo mauw, sešo i hesalu age güdzüw pangkoimme, sünda ba namoahibi.

²⁶ Sündä he ñu na traañe no seyo ba, ñiksüngko ye ğo dyam a dzühadame, ago dju bachi ge jilağon dama, na majilafijomme, seyo sügo dju age nochi ge jikuğon dama na majikufijomme.'

²⁷ Lajar i che, 'He awa, no ba chengkoime, ba no awu iñe ge kiyajo daw,

²⁸ Hado chemeje no ñu pom duwlume, i na hovrow ge he ñu na trume ujome, mowmeje na he anambo ñiku-ñisüw no ge kakuñeme.'

²⁹ Abraham i í che, 'Nachi ge Musa seyo ñihow truw ná kako duwbase, na se í chew büdzüda.'

³⁰ I che, 'Awu Abrahamya, mowme; nüna dzüw a nachi ge jikülyameje, na nadrü-nalu vyegudoğijome.'

³¹ I í che, 'Na Musa seyo ñihow truw na chew maje madzübi se í, nüna dzüw namko yo djudam üshükülyeñe jiadamje, na madzüjomme.'"

17

Zehaw

¹ Sündä Jisu i í shürhaw ná che, "He ye umsoma ha ñu ye lalo yo ma, se ye kakujome, séšo se nüna í lalome dju yo kakuima.

² Dju he ğato kunu namko ye djudamje a í düğaima, ibo shedra psüm yo udum ge pyogolyeñe, huği ge djoahuye ufojobamme.

³ Vemcheñe gyojodawe; bañuw datrulaimeje, zehajodawe, seyo vepalaimeje í muchoaijo daw.

⁴ Í ahua ye ülye mro datrudamje bachi ge ülye mro jikuñe che, no datrudaşomme, sündawñe ba í datrudaw í muchoaijo daw."

Bá veksüw küña dyewda?

⁵ Sündawñe í shürhaw na Tawgyew i che, "Ñi veksüw í damñeijo daw."

⁶ Prabu i che, “Bachi ge pemdu üsü ütraña kuwdamje veksüw dumeje, ba he kumtchü iyañ í úkrügomdo taprülañe huği ge shüwe chejo, sündameje i ba chew dzüjo.

Chiñiw kulo

⁷ “Sé djomko ye ana dju chejowa, dju kulo ye no chi momeje fugulu ná saw, sünda í vi go kakuwñe, sünda í che, ‘Kutcho age jeñe gyöñe ava tsabe?’

⁸ Haña í ná machejoma, no ava dashütrübe: no tsangko tungkolui kuw toi bašümpe í kidzagolalyeñe no hoíwe; sünda se fum ye baje tsa-tuwe.

⁹ Haña í se kulo í ulu yo vejoma, hado chemej í í dügyedaw chiğa í aka dabada?

¹⁰ Anambo ba je, se vyow chiğa dügyedaw ná damdzoahuñe, baje chewe, ‘Ñi machiñiw kulome; ñi ha dasajo duma se í aka dabadame.’ ”

Tabüñ naw a í nülvo

¹¹ Sünda ana da, Jisu Yarusalem jiw ge Samariañe Galili ñetrü yo jipseañe ji.

¹² Sünda ñetrü a ge jimyongkoi ge í südzüm gü gögo nadaw na tüva, dju na üga gudzudama.

¹³ Sünda í üga ge gudzüñe, gó yo che, “He Jisu, he dadrüwa, no nülvojo dawel!”

¹⁴ Jisu í í hoñe che, “Jebe; sünda bá nudzo í mügaw ná shejo dawel.” Seyo kabyo-kağyowñe güdrajebi.

¹⁵ Sündawñe namko yo a ye hoñe dagyolagdabi, gow yo Tawgyew í troñe katrükralye.

¹⁶ Seyo Jisu ishitrüge gaañe ukrumro yo ishi ge drüñe, ulvyu yo uw che; sünda í nüna uw.

¹⁷ He ibo Jisu í che, “Haña na gü güdraw malyama, nameje se sütü ye hanga?”

¹⁸ Haña he tuğuda-ğuvodzü í tralyeñe dju ñimma Tawgyew í trojo?”

¹⁹ Sündawñe í í che, “Gudzüñe kabi; ba veksüw ye bá dagyodamme.”

Tawgyew í ğadzü kakülyahuw

²⁰ Farisi namko yo a í Tawgyew í ğadzü ke kakülyajowa che dzüñe, Jisu ná che, “Tawgyew í ğadzü ana holaw dañe makakülyajome.”

²¹ Sünda nüna naje ana machejome, age howe, age dume, süge dume. Hado chemeje, Tawgyew í ğadzü djumko ye dume.

²² Sündawñe í shürhaw ná che, “Sé ñeto je kakujome, hai ba nüna üsaw í hoğöñiw dzüajo, sé mahohujome.

²³ Nüna na ba chejome, ‘Howe, süge dume!’ Mome ‘Howe age dume!’ Séšo ba djujejo dawel sünda nafum je djudajo dawel.

²⁴ Hado chemeje ñedzü-lüğaw ye ñedzü üdza a yo utro üdza ge kuw müsakumbo, nüna üsaw ye je í ñeto kuwñe kakülyejošome.

²⁵ Séšo uvromashü í šüpo ñiku-ñisüw gilajome, seyo he shülyiw yo nüna na í matsüñe chejome.

²⁶ Nuha í ñeto ge küna dadama, sünambo nüna üsaw í ñeto ge je dajome.

²⁷ Nuha í lü ulung ge magyomyolu kuw, nüna na tsa-tu gyö, seyo namko ye gzü dañe gyö; sündawñe hulüşü kaküñe vyow mauw damdzoa.

²⁸ Seyo Lut í ñeto ge dambo veduw, nüna tsa-tuñe bumdzu dağiw, shobro zuñe seo ñe daw.

²⁹ Séšo ha ñeto Lut í Sodom ge kadama, sehu ñeto ñedzü go mi seyo ecid šükülyañe vyow mauw damdzoag.

³⁰ Nüna üsaw í kakülyahu ge je ana dajobamme.”

³¹ “Sehu ñeto, dju ñelütsü ge duma; seyo na gañ ñe ulung ge du, na se na law ulung ge djukamyowe, sünda sünambo dju vi ge duma na fum ge djukawe.

³² Lut ufum í vehujodawel!

³³ Dju nudzo í ğaksüjoñe veima na mağaksüfijome, seyo dju nudzo shüw í mağaksüfima na basüjome.

³⁴ No djo trungkoime, se ñegi nüna ksü buğo a ye üša dujome, a í latrayemjomme, seyo utro a í traalyjome.

³⁵ Mim ksü ye ğato üša ğüjome, a í latrayejo, a í traayejome.

³⁶ [Nüna ksü vi ge dujome, a í latrayejo seyo a í traayejome.]”

³⁷ He ná dzühuyeñe na í dzü, “He Tawgyewwa he na hai dajowa?” I ná che, “Hai ñimo duma, süge kurkukiñ dujome.”

18

Müjemñe mauw zevow

¹ Sünda Jisu í ná he ubo go zegaw a trulyeñe udrü-ulu magaada, mamuduw küğüweñe che:

² “Hange damje ñetrü a ye mukow a ğyow; dju Tawgyew ije mağew seyo nüna nabo je mavew.

³ Sünda se ñetrü ye müjem je a ğyow: dju ichi ge jikunggudruñe í chenggudru, ‘No insaf djüyeñe nobo ğaksüiijodawel.’

⁴ I ùgaluw kuw madzü sêso fum ye ulu ge vepũñeñe che, ‘No Tawgyew ije mağew, seyo nũna nabo je mavetunow;

⁵ Sedamje he mujem ye no matraa, sũndada ubo insaf djũijo, mowmeje i nochi ge jikunggudruñe no ġũdzũw mağodũgeyo.’”

⁶ Tawgyew i che, “Dzüwe, he mağũdraw mukow ye ha cheima?

⁷ Nameje: haña Tawgyew i i nũna basũ ladaw ná mamutchoaijoma, dju ñegiw-ñetow i kũğũñe ġyowma; seyo i ná ùgaluw vejoma?

⁸ No djo chengkoime, i mekutcho ná mutchoijome; sé nũna ùsaw kakũlyahuñe, i he druguw-drulyiw i umso vefijosoma?”

Dju ġũdrawñe chejowa?

⁹ Seyo Jisu i shũrhaw na dju nudzo i ġũdrawñe veksũw veima, sũnda utro na mauw daima ná ana zegaw che:

¹⁰ “Nũna ksũ ñegru ge kũğũw ji; a ye Farisi seyo a ye patso-law nũna.

¹¹ Farisi i gudzulyiñe ùdrũ-ulu ge ana kũğũ, ‘He Tawgyewwa no ba ulu yo uw cheime, no utro nũna na dambo tsaksu-laksuw, mütũ chĩga daw, seyo mim ġubuw, seyo he patso-law na dambo nũna mowme.’

¹² No sopta ye ùlye ksũ tsaw-tuw matsaw ġyowme, seyo no bo-luko dalaw gow ùchea je djũwme.”

¹³ “Sêso patso-law nũna ye ùga gow gudzuñe, ñedzü ge je iñi maholyi dá i ùlũjetchũ ge ġũñe che, ‘He Tawgyewwa, he lalobraw no nũlvojio dawel!’

¹⁴ No djo cheime, i ufum yo mowme; sêso he nũna ye ġũdrañe ñe ge kajeme; hado chemeje dju nudzo i dyewñe veima, i imisa lyajome; seyo dju nudzo i imisañe veima, i dyew lyajome.”

Tawgyew i ġadzũ anagasa na vedumbo

¹⁵ Sũnda nũna na na sa naje ichi ge lañe jikeñe nagzü Jisu udru ge vefijoñe; sũnda shũrhaw na hohuñe ná goha.

¹⁶ Jisu i angasa ná ichi ge balañe che, “Angasa ná nochi ge jĩgeyo dawwe, seyo ná djugohajo dawwe: hado chemeje Tawgyew i ġadzũ he nambo nabome.

¹⁷ No djo umso truime, dju Tawgyew i ġadzũ i angasa na dambo malama, ná keje süge majimyoñjome.”

Nugo nũna a Jisu i ñu dzũ

¹⁸ Djadamje dũmbraw a ye i dzũ, “He uw ùbrowa, no shũwa-shũw shũjo ye kũna dameje ujowa?”

¹⁹ Jisu i i che, “Ba nó hado uw chewwa? Djuje uw mowme, nũna a akasa uwbame, se ye Tawgyewme.

²⁰ Ba shotuko-kunu i bo danghušo: ‘Mim dju ġubuwe, djushiwe, djutsakšuwe, mũlaw-mũtraw djutruwe, nudzo awuñe nudzo añ naksũ i chew dzũwe.’”

²¹ I che, “Nobo he ná vyew angasa ulvyu ladañe vewbame.”

²² He i dzũwe, “Jisu i ná che, bachi ge yaje ñu a ñilumme, bachi vyew ha duma ná draatsũlyeñe sapse ná hatsũwe; sũnda bá ñedzü ge luko pajome, sũnda kakuñe nofum kasajo dawwe.”

²³ He i dzũhulyeñe i šũpo duhu da, hado chemeje i šũpo nugo.

²⁴ Jisu i i holyeñe che, “Bo-luko duw na Tawgyew ichi ġadzũ ge šũpo atağa yo kamyofi-jobame.

²⁵ Tawgyew i ġadzũ ge bo-luko duw na kamyoyo i bo ut i sũtrũ üšũ yo kamyow je ufojomabe.”

²⁶ Sũnda dzũhu daw na che, “Nameje djũ basũafjowa?”

²⁷ I che, “Haye nũna yo madañima, se ye Tawgyew i dafijome.”

²⁸ Patras i che, “Howe, nobó ñe-vi je tralyeñe bafum kasawme.”

²⁹ I i che, “No bá umso truime, ana djuje ñime, dju Tawgyew i ġadzũ ubo, ñe, mim-kiği, ñu, awu-añ seyo saw-sam ná trahuw.

³⁰ Sũnda sa yo sa a na haje aña djupawe; seyo dzũwñe druguw-drulyiw ge shũw lũshũw pajodawe.”

Dzüñe üshũ lyajo go ñihow

³¹ Sũnda Jisu na ġũyo ksũ shũrhaw ná ùdra lañe ná che, “Ñi Yarusalem ge jingkoime, sũnda kũña ñu nũna ùsaw ibo ñihow truw na ġi vedama, se na vyow datsũjome.

³² Hado chemeje i tuğuda-ğuvodzü nagzü ge djũjome, sũnda na i tchũğofñe-hoğojome, sũnda zehu je mũdrũdzajome.

³³ Sũnda na i ġũjome, sũnda shijome, sũnda i ñegi dzũ ye üshũkũlyetchojome.”

³⁴ Sûnda na he ñu namko ye haje madzûsû sûnda he ñu na namko ye müšûtsû, sûnda ha trudama se ye na madzûla.

Iñi ġew í iñi

³⁵ I Jeriko ñetrû ütrû ùñisa jikulai sa a, iñi ġew a ye ùdza ge tsatuġuñe ġyoda.

³⁶ Sûnda i upu na dügrû jiw dzühuñe dzüpuñe, “Ayo a ha dangkoia?”

³⁷ Na í tru, “Jisu í Nasri ge jingkoime.”

³⁸ Sûndawñe í ġuksuñe che, “He Jisu, Dawud í üsaw, no nülvojjo dawe.”

³⁹ Dju vro-vro jeima, na í madañda ġyo cheñe ze, sé i umsow šogzukülye, “He Dawud üsawa, no nülvojjo dawe.”

⁴⁰ Sûndawñe Jisu í gudzulyiñe í ichi ge lañe jikuwe che, sûnda i iñisa jikuwñe, i í dzü,

⁴¹ Bá ha tsûda, “No babo daijome?” I che, “He Tawgyewa, nó hofidügyewe.”

⁴² Jisu í ichi che, “Hojodabe, ba veksüw ye ba dagyojemme.”

⁴³ Sûnda í djeañe hohu; sûnda Tawgyew í troñe, ufum kase, sûnda vyow nûna na hohuñe, Tawgyew íbo trotsü.

19

Jisu Jakariya ichi ñe ge

¹ Jisu Jeriko ge jimyolye jimkoi sese.

² Süge Jakkai cheñe nûna duvo, i patso-law go mukyew sûnda nügo je nügo.

³ I Jisu í hoġoñ vyew í djuma cheñe? Sešo upungda sese mahofi. Hado cheme i üchesada.

⁴ Sese i í hoġoñe vye uvro ge gyó djeñe lufuje shoñ udru a ye lyilyig, hado cheme Jisu í se ġabo kajoda.

⁵ Sese Jisu se a jikuñe, udru ge hotrolyiñe í che, “He Jakkai, kutcho lyiga; hado cheme yow no bá ñe ge ġyojo dume.”

⁶ I kutcho yo lyigalye lüshüldzulalye í ichi ñe ge la kake.

⁷ He í hohulyebi nûna na zeġi, “I bó se lalo nûna ichi ñe ge jijeja.”

⁸ Jakkai í gudzuñe Tawgyew í che, “He Tawgyewwa, No nó bo-luko üchea ye ñiw ná djüjome, seyo üchea ye sena djüjome djuchi go no laġamüñeda ma se na no psüġingua fow djüpyojome.”

⁹ Sese Jisu í ichi che, “Yow he ñe a muchoahuw jikudame, sûndada he í je Abraham ichi sawbamme.

¹⁰ Hado cheme nûna üsaw ye moadaw ná tchüw seyo ná basüaijo kakuwme.”

Bosün uvyu ġü

¹¹ Sese i he ñu ná dzümkoï sese, i zeġaw a ze, sûndada chedawa i Yarusalem ütrüañ a duda, seyo i vyesüw je vyesüw, se Tawgyew ichi ġadzûbraw ye hesahe kakudalaibiñe.

¹² Sûnda: I che, “Nûna nugo a ye ge ñetrû üġa ge ka sügo nugo pafiñe kakutchofijo.

¹³ Seyo i í kulo naġi yo ġü ye balalye ná bosün uvyu ġü djü, seyo ná che, ‘No kakuw kuw bumdzu davojo dawe.’

¹⁴ Sešo í ñetrû ge ġyodaw na í mahoġoñ daw, seyo ífum ge muko kiñe ñu che ki, se i ye no matsüme, se i ñidru ge ñubyu dañjo.”

¹⁵ “I ñubyu lyibiñe kakutchow sese, i ana a da, ichi se kulo ġü ye dju í bosün uvyu ġü djülyedama, se na itrü a balaku sûnda danghujoñe vyeñe se na se i yo küña ha ha dashaladama.

¹⁶ Sese uvromashü yo a ye jiku che, He übrawwa bachi djüdaw bosün uvyu ġü yo dañe ġü müñew damñeladame.

¹⁷ I í che, ‘He kulo ülküsüfowwa, bá šüvzüw me, ba šüpyo mesame sese ba umsowda kakülyeda, ayo ba ñetrû ġü yo übraw dabeí.’

¹⁸ Sefum yo a ye jikuñe che, ‘He übrawwa, hošoa, bachi bosün yo uvyu pom dashamüñewme.’

¹⁹ I í chetcho, ‘Ba je ñetrû pom yo übraw dabeí.’

²⁰ Sefum ye a ye jikuñe chetcho, ‘He übrawwa, hošoa, bá bosün ye he duw ye, he í no nó gye ġüpaw üdza toi pyogoñe vyedaw he.

²¹ Hado chemeje no bá ġedabi.’

²² I í che, ‘Mauw kuloa, no bamdzu yo bá no trudañe chei he me.’ Ba nó danghuwbi nûna müġzüchüwñe, ha ye no ma vyema se í dzula, seyo se no ma zuw, se í djoahuwme;

²³ Ba nochi bo ye bo dashabraw ná hado madjüña, se í no kakuñe sashadaw ye lakeġijobi?

²⁴ Seyo dju nûna na ùñisa gudzudama, se na í che, ‘Se bosün ye ichigo latchojodawe, seyo djuchi ge bosün ġü duma se í djüpyojo dawe.’

²⁵ Na í che, ‘He übrawwa, ichi bosün ġü bó dušo.’

²⁶ ‘No bá chemkoime, se djuchi ge duma, í seyo djüpyojoluwe; seyo djuchi ñima ichi go se í je lajodawe se ichi ha dusama.

²⁷ Sešo nochi se fugulu ná se vyeñidaw na se no nadru ge ñubyu dame, se na age lakuñe noñisa a shiwe.’ ”

Jerusalem ge fojelübzüw kakuw

²⁸ Jisu i he ñu na chelye i Yarusalem ge navro-navro ka.

²⁹ Seyo se i Jetun üñiñi yo pu sa a Betfage ñe Betniyah üñisa ge jikuwñe, sese i í shürhaw nañi yo ksü ye ana cheñe ki,

³⁰ “Üñisa yo ñetrü ge jijo dawe, seyo süge jikubyo jikuğyoñe giğe ichi üsa a udru ge djusa je magyoluw, pyogo vyedaw bá pajome, se í tashalye lakuwe.

³¹ Seyo djudamje bá dzülaimeje, hado tashamkoiya chemeje, se a ana chejodase, se Tawgyew i he í tsüdame”

³² Se kidaw ná, na jikuñe i ná ha chesedama, süna pabadabi.

³³ Se na giğe üsa ye tashamkoi se, ichi übraw ye ná dzü, “He üsasa ye hado tashamkoiya?”

³⁴ Na che, “Tawgyew í he í tsüdame.”

³⁵ Na í Jisu ichi ge la kaku seyo nudzoğ gye ye tapualye se udru a ñeilye Jisu í giğe udru ge gyodügye.

³⁶ Sünda na kamkoi sese, na nudzoğ polu ye ġabo toi ñeñoñe ji.

³⁷ Seyo üñisa kakulye se i Jetun pu i ġo ge kaku, sese shürhaw na vyew upua na vyemoñe chiğa dadaw ibó i hohuda na, lüshüldzuañe gow yo ñu zeñe Tawgyew ibo trokülye:

³⁸ Šüvzüwme se ñubyu ye, dju Tawgyew iñiñi yo jikuma!

Sorgo ge ġüdzüw seyo ñedzü ge lüshüwme!

³⁹ Sese upu na yo süña Farisi na í chengkoibi, “He Danghubrawwa, bá shürhaw ná zea.”

⁴⁰ I ná chetcho, “No djomko a chemkoime, he i maziw ġyome, kunu na šogzukülyejome”.

Jerusalem ibo ksew

⁴¹ Se Jisu üñisa kakuñe se ñetrü i hollye ubo kse.

⁴² Sündalye che, “Ha ye ujowa, he ba; am, ba bába, he ñeto ai lüshüjo ñu danghudama, sešo se i yabó bañisa yo mušaadabi.

⁴³ Hado cheme se ñeto ye badru ge kakujo se bá vyeñiw na sülyeñtchü pyogoñe bá djetuğujome, seyo djetuğulye bá ñujome.

⁴⁴ Seyo bá seyo badra ayo a ná bachi angasa ná, nogüdzü nadra gülyiajome, seyo badru ge kunu yo je kunu matrujome; hado cheme ba süna dajo ye kye badru ge nülwov vyeñe hojema sei madanghujе”.

Ñegru í dagudrahuw

⁴⁵ Sese Jisu i ñegru ge drüñe ġyodaw ná nopsü ge lahuatsü.

⁴⁶ Seyo ná che, “Ġidame; ‘Nochi ñe ye küğüw ñejome,’ sešo djo he í tsağa-lağaw nachi ñe da joadamme.”

⁴⁷ Seyo i muhu-muhu ñegru ge shi-ñu truñgudru: seyo se müga sawlyiw na seyo shizew-ñu zew na vyew djekeğiñe i shijoñe tumuñgudru.

⁴⁸ Sešo haje ġabo matchüla; he í küna dañe dajojema, hado chemeje vyew na dru-lu djübyo djügoñe ichi ñu dzüñgudru.

20

Yahudi na Jisu í ñu dzüw

¹ Ahua ye ana a da, jisu i sese ñegru ge shi-ñu trumkoi sese, müğaw dew seyo shi zew-ñu zew kew nadra jikuñe sese gudzu.

² Seyo chemkoibi, “Ba ñi truwe, ba he chiğa ná dju dadügyedañe dawdo daña, seyo se i djua, dju bá he i dawewñe dügyedaye?”

³ I ná trutcho, “No je djó ñu a dzüjome; nó trujo dawe

⁴ Yohañ ichi Baptisma djüw ye Soğgo go ma mo nüna yo ma?”

⁵ Sündañe nağütchü zeği, “Se ñi chebammeje, ‘Soğgo gobabi,’ süñchewñe i chetchojo; ‘Sünameje djo idru ge hado umso mavyeña?”

⁶ Seyo ñi chetchojobi, ‘Nüna yo me chetchobamme,’ se vyew na ñidru ge kunu trüjobi, hado cheme i umsow go danghudabi, Yohañ i ñihow cheñe.”

⁷ Dañdañlye na tru, “Ñi madanghume, se i djuchi go jema.”

⁸ Seyo Jisu i ná che, “Nameje no je djo matrujome no he chi ná dju dügyeñe dadama.”

Bolu mau vi daw nüna i lağüşhi truw

⁹ Sese i se nüna ná he ana zeğaw go tru, “Nüna a ye anggur zugua, sündalye vi daw ná howeñe bo ve seyo šupo uwalaw kuw utro ñetrü ge jitrükralye.

¹⁰ Bomdrü sese i vi daw nachi ge kulo a ki, se vi yo kakülyedaw anggur üje ibó je djüweñe cheñe k, sé vi daw na í gümoamdo gümoañe ufo kadügye.

¹¹ Sündawñe i kulo a ye kitcho, sé na se í je gütholyebi zeaše zeameñe ügzü ufo kikutcho.

¹² Sündatchowñe i ülye dzü kitcho, seyo na se í je dzüthüzew gimoañe lahuag.

¹³ Sündawñe se anggur go vi übraw ye che, 'No há dajobabya? No nó saw í kijobaba, asha na í chew dzüw dujojesoma.'

¹⁴ Sese vi daw na í hohulyebi nağüthü poğı, 'He i bó üsaw ye ba; age djebya, ñi í shibow, sündañe he na ñichi lyajobi.'

¹⁵ Seyo na í se anggur vi yo lahuañe shiag: sündada vi übraw i nadra ha dajobabya?"

¹⁶ "I kakuñe se anggur vi daw nuna ná damütrajo, seyo vi ye utro ná djüjo." He í dzühulye na che, "Tawgyewwa ana djuda."

¹⁷ I nachi ge holye che, "Se he ye ha ġida:

'Ha kunu ye ñe dasüw na ha madağiwñe süñeadama,
Se i ukutru go dakrükye se i lyada.'

¹⁸ "Djudamje se kunu ge gaahima se i ganüajobamme, seyo djudru ge i gahima, se í ġünü-ğüğajobamme."

Shi-ñu zekyew nañe Müğaw sawlyiw na lütsa

¹⁹ Seşügudo ye Shi-ñu zew nañe seyo Müğaw dew na í külyijoñe vye, hado cheme danghula dabi, i nabó magow ñu zeğaw yo tru, sešo í ná büğedañe vye.

²⁰ Seyo na í hokrübabiñe seyo ichi ge hotumuww ki, se hadowo cheme i alyamo alye ye shi-ñu trutroameje sese ñustu kigojoñe, se í nugo ichi ge trutroadame che djüfijoñe.

²¹ Na í ana dzü, "He dadrüwwa, ba mülaw truiñe ñi danghudame, Seyo dadrüw je darüi, Seyo djubó go goñeje mache; Semome Tawgyew ichi ġabo ye umsow trufijo.

²² Hawa ñi Kesar í patso djümeje ujoma, mo mowma?"

²³ I ná budzu yo dzüi ye dzüsülye che,

²⁴ "Bosüñ a nó shejo daw. He a djuchi ġiğe düdama seyo dju ñiñ duma?" Na che, "Kesar ichi."

²⁵ I ná chetcho, "Se Kesar ichimeje í djüwe, seyo Tawgyewchimeje í djüwe."

²⁶ I nuna ñisa a se ñu ye madzüsüla, semome ichi ñu hutrodaw se i yo mavyenghuatsü.

Güdrakosküwñe gzü

²⁷ Sündatcholye Saduki i chew ye, nuna dzüw na kenghuaje maüşhüjome, nağı yo nuna üchea na ichi ge jikuñe dzü.

²⁸ "He dadrüwwa, Musa i ñibó ana ġidawa, 'Se djuchi damje üyalyo a ichi ufum ye saw-sam malaluye dzütrükrallyemeje se üñuw ye se mim üyañedra i gzü datchowe, seyo üyalyo íbó agü mulo sakülyewe.'

²⁹ Sünda ye alyoñuw mro duw, üyalyo nugowfow ye agü je masakülyelubi ye dzütrükrallye.

³⁰ Sefum yo ye je,

³¹ Seyo seladzü kiğıw ye ye se mimdra í gzü daladabi. Se ana dadañe namro mamro agü masakülye dzümdzoaha.

³² Se nafum se mim ye ye dzüase.

³³ Se a na üshükülyemeje se mim ye djufum lyijowa, hado chemeje i na mro mamro üdra gzü datsüwdabi."

³⁴ Jisu i ná che, "He ñefo go shüdaw agü na gzü daibi,

³⁵ Se dju nuna damje ana lyifikülyemeje, sé ñeto go dzüdaw nuna na üshükülyetchojo lyifime, namko ai gzü madafijo.

³⁶ Se i dzü je madzüjo; hado cheme i sorgomuko vyedujo, seyo güdrakoşküw yo agü üshükülyemeje Tawgyew ichi je agü lyijo.

³⁷ Sešo he ñu ye dzüdaw na je üshütchoi, Musa je shoñ ge süna folakülyeda, i Tawgyew í 'Abraham üsa, seyo Isahak üsa, seyo Yakub üsa ana chelyew.

³⁸ Tawgyew ye dzüw nachi mow sešo üshü nachi Tawgyew: hado chemeje ubo yo vyew na üshütsü."

³⁹ Sese na se í dzühulye Shi-ñu zekew küña duma na che, "He dadrüwwa ba uw chejejeba."

⁴⁰ Seyo bó na í ha madzülöfibi.

Jisu Dawud üsawma mo Dawud ichi Tawgyew ma?

⁴¹ Sündatcholye Jisu ná dzütcho, "Masi í Dawud üsaw cheñe kundañe cheña?"

⁴² "Dawud i üsaw Masi í kako ge cheda:

'Tawgyew i nochi Tawgyew í cheda,

Nochi südzüvopsügi ge ġyowe,

⁴³ No bá fugulu ná bashitrü ai malakyeğitsülu kuw.' "

⁴⁴ "Dawud bó í Tawgyew chew; se sünameje i í üsaw kunda cheña?"

Shi-ñu zekyew nuna zew madzüw ná Jisu í trüdrü

⁴⁵ Vyew na dzümkoï sese, i í shürhaw ná che.

⁴⁶ “Shi-ñu zekyew na yo hochiğiwe, dju shedra psüw sheñe kahi wewma, seyo ná bodzağ ge gaga daw, seyo küğüw ñegru ge psüga dew ge gyojo uw vyejome.

⁴⁷ Na müjem nachi ge tsaw jiñe seyo bühodafie uwalaw kuw küğüw dawme, he na şüpyo mau ñe ge gajome.”

21

Haje ñiw müjem ichi umsow lapsü djüw

¹ Sündatcholye Jisu i íñi yo lapsü dzüw nuna na nudzoğ nudzoğ lapsü í lapsügyebyo ge trümkoï hohu.

² Seyo i haje ñiw müjem a ye je i sayo sa a bosüñ ksü trümyoajew hohu.

³ Sese i che, “No djó umsow chejome se i ye he haje ñiw müjem ye fow trümoabajeme.

⁴ Hado cheme nabó nachi nudzoğ nudzoğ lapsü yo me trüje, sešo i í shüda yo küña dusama vyew trümdzoajebi.”

Ñefo i mudzoajo go hosüw daw

⁵ Küña nuna na ñegru ufo go chemkoï ye, se i küña kunu howsa yo seyo gañ yo chibra daida, se i che,

⁶ “Süna ñeto je kakujome, sese he na he i ba hohui na, namko ye ha yo ha a kunu udru ge kunu je matrajome.”

⁷ Na í dzütcho, “He dadrüwwa, he na kye dajowa? Seyo he ñu na dajobi sese, ha chi hosüw dujowa?”

⁸ I chetcho, “Chitchüğiwowe, dju dzüşeawe, hado chemeje şüpyo nuna na nó ñiñi lañe chejome, no se ibamme; seyo he i damdrü kakudamme: djo se nafum djukasejo daw.

⁹ Seyo djo pseği-luğ daw süna nafo go dzühulaimeje, dju gëjo daw; hado cheme he na uvromashü davzujowbamme; sešo se ñeto kutcho mamütrajome.” Süna ñeto je kakujome, sese he na he i ba hohui na, namko ye ha yo ha a kunu udru ge kunu je matrajome, Süna ñeto je kakujome, sese he na he i ba hohui na, namko ye ha yo ha a kunu udru ge kunu je matrajome,

¹⁰ Sündawñe i ná che, “Gübye yo gübyeğütchü seyo ñetrü yo ñetrüğütchü pseğijome.

¹¹ Seyo ñeğüzüw je dew dew dajome, seyo ñetrü ñetrü sapseañe seyo gañemu kajome, seyo ñedzü ge ñiğëñiw ñu seyo dew dew chi shejome.

¹² Séšo he ñu na madaluye na uvro nó ñiñi yo kigovzujome, seyo maw-uw ze dajome, seyo ñegru ge djüjome, seyo pache ge şhüjome, seyo ñetrü ge ñetrü ñubyu natrú ge lajikujome.

¹³ Se he na babó ñu truvomdrü kaküleyjome.

¹⁴ Sündada nudzoğ nudzoğ drü-lu ge pyogo vyejo daw, no vrogomdo trufijo se í duhu madadañe.

¹⁵ Hado cheme no bá ana chejo seyo ana budzu djüjome, se bá mau zeñe zeaşe zeame dai na madafijo.

¹⁶ Seyo bachi awu-añ seyo ñuw-ñum seyo ñeşüğ-ñepyeğ, seyo draw na je tsüladügyejobamme; aña kuw dajome, djomkoye şüpo na dzüdügyejome.

¹⁷ Seyo no ñiñi yo badra mau dajome.

¹⁸ Séšo bakyetrü umu a je matrüafijome.

¹⁹ Ba nudzoğ drü-lu ye güdzüw yo şhütrüñe vyejo daw.

Jerusalem í mütrüw

²⁰ “Ba kyedamje Yarusalem í rhünokew na yo jiğshiğiahuw hohume, sese ichi mütrüjo üñisabammeñe danghujo daw.

²¹ Sese dju Yahudiya ñetrü ge дума se na pu udru ge djetralyewe, seyo dju Jerusalem ulung ge дума se na djehuaajo daw; seyo dju ñetrü ge дума se na süge djujijo daw.

²² Hado che se i dutruğijo ana ñeto kujome, sese ñu giñe vyelyedaw na vyew lyitsüjobamme.

²³ Se ñeto ge dju agü ñiw seyo agü apu tudügyeima, se nabó tui! Hado cheme se ñeto ge no nağütchü dağijo seyo se a ná şüpyo ñiku-ñisüw lyijo.

²⁴ Na vyetsü ürhü yo süğüajome, seyo vyew ñetrü drü-drü ge mubyo na lakuzeğiatşüjome, seyo utro sama nachi ümdrü vyew makulu kuw, sese Yarusalem í utro sama yo dashiğiajome.

Jisu i kakutchojo chitruw daw

²⁵ “Seyo dru seyo hubye seyo lütsü se na ge chi shejome, seyo nomñew ñetrü a je, ñetrü drü-drü go nuna ná chitruw dajome; hado cheme na sütüğülü ichi hu rhaw yo lamo gëtsüjome.

²⁶ Seyo gëw yo druguw-drulyiw a trüw kakujo se i hohuñe nuna üşhüjoñe je mavyejome, hado cheme ñedzü go gokew ye je güdü-güdüjome.

²⁷ Sese na nuna üsa í lüshüw-lübaw mumudrü ge gow kalai hohujome.

²⁸ He ñu ye trumkoi sese, ükye ye gudow dañe udru ge hotrojo dase; hado cheme bá solutoajo üñisame.”

Tawgyew ichi ñetrü ñubyu üñisabamme

²⁹ I ná zeğaw je a tru, “Lufuje üyaññe vyew shoñ na howe.

³⁰ Ichi übatra kaküleyebyo kalyeğyowñe, se í ba hohulyeñe balvyo danghulaibi ñeshü kalaibiñe.

³¹ Sünambó vyeduw ba he ñu na kye hohuima, sese danhulababise Tawgyew i ñetrüğüfo kakujo üñisababiñe.

³² No bá umsow trujome, he gñei ñu na madalu kuw he ñefo ayo shüdo nuna na kyeje lüshüw mapajome.

³³ Ñedzüñe No naksü kaltruğidamje, sešo nochi ñu kye je makatrujome.”

Shüwa Dashütrüwojo dawe

³⁴ “Sündada ufu je ksü üñi je ksü da gýowe, ya ba badrü balu ye he druguw drulyiw ayo dashüw ge daśea kiśeañe, shüjo djojo ge vyeśeañe da gýomkoñbai ye jia, ñe se badru ge kyegüdü-ñiği kakugme.

³⁵ Hado chemeje i he añawa nomñew ñetrü ayo gýodo nachi ge ana vyeduw dañe kakujobabi.

³⁶ Sündada chiğingudrujo dawe seyo küğüñgudrujo dawe, he ana a kyegüdü-ñiği kakudamje ha madaw gaksüfisejoñe, seyo nuna üsaw i vro a gudzufiwjo lyijo dawe.”

³⁷ Seyo se ñeto ge ñegru ge shi-ñu tru süna dawse; Seyo ñegi ge i nopsü ge jihuañe Jetun pudru ge gýoñgudru.

³⁸ Seyo na je şüzüw ye tralye ichi ge jikuñe shi-ñu truw ye dzüjoñe ñegru ge jikuñgudru.

22

Jisu i shijo go küla

¹ Odje oğüme se i na ofo rhano chew, üñisa dabi.

² Seyo müğaw dew nañe shi-ñu zew naksü shüwa í kúndañe shijoma se í kadang hotumu, sé na nuna nayo gëw.

Yahuda Isküriya ichi umsokulyu

³ Seyo mütü Yahuda ge kamyoa, djú Iskariyoti chew sünda í şürhaw ülgü gñu yo ksü namko ge i je duw.

⁴ I jiñe Müğaw dew ñe kulow kyew hotumuw nadra chitru, Tawgyew í kúnda lügyelajoma sena.

⁵ Na lüshülag, Seyo í na bo djújome cheñe müdaa.

⁶ I je embi che, sündalye hotuma-hotumuhi, se í usso ge ñu majodügyew lügyeladügyejoñe.

Fasa í dashütrüw

⁷ Sese odje oğüme daw ñeto kakudabi, sese Fasa ge fugulu üsa ye che küğüw kijobabi.

⁸ Sünda Jisu i Patrasñe Yohañ naksü i ana cheñe kí, “Djeñe ñibó Fasa ge tsajo-tujo dashütrüwowe.”

⁹ I í dzütcho, “Ba nó hange dashütrüwoweñe tsüda?”

¹⁰ I ná che, “Howe, ñetrü ge kaakubyo-kakuğyowñe nuna a ye hu guw kolo lodow tüvajome, dju ñe ge i jhima; ba ifum jisajo dawe,

¹¹ Seyo sé ñe go übraw í chewe, ‘Dadrüwwa bá chemkoime; se tumóna ná ñe hagewa sa a no nó şürhaw nadra Fasa tsajo ye?’

¹² Bá í howsa yo dagüdravodaw üğüñ dew a shejome; süge dashütrüwowe.”

¹³ I jikubanda, i kúna chedama sünaabyo-sünağyo duvobi, sünda í Fasa í dashütrüwo.

Tawgyewchi mülüñ drüpsü

¹⁴ Damdrü kuwñe, Jisuñe í şürhaw na nadra tsajobiñe gýo.

¹⁵ Sündalye i ná che, “No nolu ge şüpyo ana vyewme, duhu makakulu kuw djodra ye ülya ana üśa gýoñe ava tsajoñe vyewme.

¹⁶ Hado cheme no djó chemkoime, he i Tawgyew ichi nogo ge vyew makulu kuw no se í keje matsajome.”

¹⁷ Sese i bekasa lañe dru-lu yo şüvzüw gañe che, “He í lalyeñe djoğütchü ge habrağijo dawe.

¹⁸ Hado cheme je no djó chemkoime, Tawgyew ichi gädzü madalu kuw no ayo dalalye keje he shejehu matujome.”

¹⁹ Sündatcholye i odje la, seyo üdrü-ulu yo küğüñe takuğia, seyo ná ana cheñe djú, “He i nó usso me, ha yé djobo djüwma: nó vyehuñe he ana dajo dase.”

²⁰ He ana dambo i tsaw tsafialye bekasa je ana cheñe la, “He i nochi sé şü yeme he i djobó fuadaw yeme ñu ükünüme.

²¹ Sé hojo dawé, nó kigoladügyeje ichi ügzü ye nodra a dume.

²² Hado chemeje nüna üsaw ye bó ibo küna dawéne dadama, sünambo dajobabi, séšo tui se nüna idru ge, djubó sa a í kigoladügyejoma!”

²³ Sündawé na nağütchü dzügi-hoğingkoibi, “Nimko a djuwa, he chiğa dajo ye?”

Djú dewéne vyefijowa?

²⁴ Namko a ana ñu che zeği; ñimko a dju dew vyefijowa?

²⁵ I ná che, “Utro sama nago nugo na nadru ge shotuko joi; seyo dju nadru ge shotuko jofijo daima, se ná povow nüna chewme.

²⁶ Séšo ba ana djulyiwe; mowme djomko a dju nugow dama, se i angasa vyeduw seyo dju ye ñubyu ma se i kulo vyeduw lyiwe.”

²⁷ Hado cheme dyew ye djuwa; se i buğo ge gyodaw yeme, semome se chiğa damkoi yema? Hawa se i je mowma se tsawdra gyodaw ye? Séšo no djodra a kulo vyeduw bame.

²⁸ “Séšo djo se na me, dju nodra ñiku-ñisüw ge je nodra duwsaw na me;

²⁹ Seyo sünambo vyeduw nochí Awu i nóbo ñetru ükün a davyedama, sünambo no je djobó davyejome.

³⁰ Se i ye hadowo cheme djo nodra nó buğotru ge tsawe-tuweñe; se psüğa a gyöñe Israyel nachi go gübye güyöksü i zegüdralawe.

Patras i hujonoğyow ñihohuw

³¹ “Simon, oi Simon, djó mütü ye prüdame pu í dambo güjoñe.

³² Séšo no djóbó küğüwme, djódrü-djolu go umsowéne vyedaw ye kyeje mañoajo seyo djo kakume djó nudzoğ alyo-ñuw na je güdükewe.”

³³ I í che, “He Tawgyewwa, no badra pache ge damje kasejo semome dzüjoje dzüfijobame.”

³⁴ I che, “Oi Patras no bá chemkoime, yow jo külyiweñe sese ba nó ülye dzü mahosüw chejome.”

Duhu gijo ye dashütrüvowe

³⁵ Seyo i í che, “Bá no dzulngasa seyo kapüğa seyo shita je ñiw ufobüla kimkoi ge ba hama a mapu mavyaw dadama?” I chetcho, “Ha chi go mowme.”

³⁶ I í che, “Séšo djuchige dzulngasa duma se na se i lawe, seyo sünambo kapüğa í je, seyo djuchi ge kyeği ñima ná nachi gye na damje drütülülye lawe.

³⁷ Hado cheme no djó chemkoime, he gido ye, ‘Se i truw nüna ge ngüjobamme; se i nódrü ge dajoye krükrüwbamme; hado chemeje nogru ge küna dajoñe dadama se na datsüjobamme.”

³⁸ Na che, “He Tawgyewwa, howe, he a kyeği ksü duwa.” I ná chetcho, “Şüpyo dume.”

Jetun pudru ge jisu i küğüw

³⁹ Sese na ñepsü ge jihuañe na dadaw basha yo na ge Jetun pudru ge jitsü, seyo shürhaw na nafum jisa.

⁴⁰ Süge jikuñe i ná che, “Küğüjo dawé, djo zeğaw ge magajoñe.”

⁴¹ Seyo i na yo utroga kunusa a josajombuaña ge jiñe, seyo üshipyu dugoñe küğümyomkoibi.

⁴² “He Awua ba tsübameje he bekasa ye notru yo latrülyewe, sedamje nó husü yo mow bá husü yé dadzowe.”

⁴³ Sese soğgo go sorgomuko a í sa yo sa a hohu dju í zego dawma.

⁴⁴ Seyo babiye i şüpyo vyemülüañe vyemoañe küğükülyejebi; seyo ichi úfu ye no ge şü fuw vyeduw tra tra dzuamkoi.

⁴⁵ Sese i küğüfialye gudzulye ichi shürhaw nachi ge kakuñe hoholye vyew na drumutsüdaw hoñe duhu da.

⁴⁶ Sündalye i ná che, “Hado drumuiya? Pülyibya, küğübya, na zeğow ge magajoñe.”

Jisu í tsülaw

⁴⁷ Jisu i süna chemkoi sese, howe upu a djelai ná, seyo se gü yo ksü namko a ye dju ñiñi ye Yahuda chewma i uvro uvro djekelaibi, i Jisutru ge djeku, i bubu dajoñe.

⁴⁸ Sé Jisu i í che, “Oi Yahuda, hawa ba bubu dañe nüna üsaw í kigoladügyejoma?”

⁴⁹ Idra yo na idra ha dajoma i hohuwñe, sünda che, “He Tawgyewwa, ñi keği dzofijoma?”

⁵⁰ Seyo namko ayo a ye mügaw dew ichi kulo nadru ge keği yo dzohiñe ufu fuvo go dzoga.

⁵¹ Sé Jisu i che, “Sayo sa a damudoabe.” Seyo sa a ichi ufu ye kiñe dagyoi.

⁵² Sese Jisu i mügaw dawof na seyo ñegru ge hokrüvwow go mükyefow na seyo kew se na idru ge lyikülyedaw ná che, “Hawa djo nó ñiguduñe danghuñe keği ñe shalbo ñe lañe jikuma?

⁵³ No djodra ñegru ge muhu-muhu djodra duw sa je sesüge djo nó gzü a je maki; sé hesahe djochi ümdrübamme, vatağüsagiahuw yo vatağüsagiahuwme.”

Patras ichi hujonoğyow

⁵⁴ Sündatcholye i na tsülalye la kakyé, seyo mügaw dawof saw-lyiw ichi ñe ge lañe kaku seyo se Patras i üğa-üğa djega djegañe ifum-ifum djese.

⁵⁵ Seyo na nopsü ge mi pyeñe tchü üša gyomkoi sese Patras je namko a gyoa.

⁵⁶ Seyo se a kulom a ye í mi müsaw ge gyokülyedaw hohulye seyo í usu yo hopafi hopañe chemkoibi “He i je üdra yo baba.”

⁵⁷ Séšo í ana che hujonoğyoa, “O mimya, no í madanguwe.”

⁵⁸ Me uwalatchowñe utro a ye hotcholye chetcho, “Ba je nadra yo baba se.” Patras í che, “Oi nuna, no mowhoje.”

⁵⁹ Me uwalatchowñe nuna a ye dügago hoñe chengkotchobi, “He i je nadrayobabiša; umsoy cheme he í Galilibabi.”

⁶⁰ Sé Patras í che, “Oi nuna, no madanguwa ba cheijema.” I süna chemkoi sese jo je külyijebi.

⁶¹ Sündawñe Tawgyew í tcholtruğiañe Patraschi ge ho, sündawñe Patras í Tawgyew í ñu chedo ye vyehu í ha chedama, “Yow jo makülyilu uvro ge ba nó ülye dzü kuw madanguw cheñe hujonoğyoajome.”

⁶² Seyo í ñepsü ge kahualye šüpyo ku ku kuw kse.

Jisu í mülakulyuw

⁶³ Dju nuna ye Jisu í kigo dama, na í mülakulyuñe gümyomkoibi;

⁶⁴ Seyo ichi iñi ye pyelyeñe í dzü, “Ñiholye trubya bá dju güima.”

⁶⁵ Seyo ana šüpyo nomñew zeaše-zeameñe í maw-uw ze.

Kyew nañe seyo melye dew gzu

⁶⁶ Ñetoahwñe naği yo kyew seyo müga dew shi-ñu zekyew-kikyew se na vyew keğitsü, sündalye í na melye dew gudo ge lakuñe chi dzü,

⁶⁷ “Sünameje ba Masimeje, ñi trujo dawel!” I ná che, “No djó trumsome djo nó umsoy mavyejome.

⁶⁸ Seyo dzüdamje, matruñijome.

⁶⁹ Sešo ayo dalalye nuna üsa no sawlyiw Tawgyew ichi upo südzügo gow dañe gyongudrujobi.”

⁷⁰ Süñchewñe vyew na chetsü, “Sünameje ba Tawgyew üsawma?” I ná che, “Djo cheñšoiwa, hado chemeje nobabi.”

⁷¹ Sese na che, “Yabó no truvojioje ha matsübi; hado cheme no bó nobyo no dzühuladabi.”

23

Pilatus í Jisu í ñu dzüw

¹ Sese vyew keğidaw nuna na gudzutsüñe Jisu í Pilatus ichi ge la jiku.

² Sündalye na ana cheñe idruge külü jo, “Ñi í nuna ná zegow seyo Kesar í patso í madadügyew seyo nudzo í Masi seyo nugomeñe chew dzühudame.”

³ Pilatus í dzü, “Ba hawa Yahudi nago nugoma?” I í tru, “Sebó ba chešoiwa.”

⁴ Süñchewñe Pilatus í mügaw saw-lyiw nañe se nuna ná che, “No he nuna idru ge ha je külü mahohume.”

⁵ Séšo nabó süñchewñe seyoje šüpyo mügzüw yo chemkoibi, “He í Galili yo dalalye age kuw Yahudiya ná vyew shi-ñu tru truñe truğolatsüdame.”

⁶ Süna dzühulye Pilatus í dzü, “Hawa he nuna ye Galili ñetrü goma?”

⁷ Seyo he í danghula í Herodes ichi shotuko ulungo nuna dabi, í Herodes itrü ge kitcho, hadowo cheme sé ñeto ge í je Yarusalem ge duvo.

Jisu í Herodes ichi ge kiw

⁸ Herodes Jisu í hohulye šüpyo lüshü, hadowo cheme šüpyo uwalaw gomdo í hoğöñiw vye: se í ye hadowo cheme ifogo dzühuda, seyo ichi chi ashama asha ye sheweñe ve.

⁹ I í šüpyo ha ha ñu dzü, se í í ha je matru.

¹⁰ Seyo se müga saw-lyiwñe shi-ñu zekyew naksü ulung ulung ge í ze.

¹¹ Sese Herodes í ichi nuna nadra ye í zeaše-zeameñe zekütso zemürhü, seyo iği ğiguw gye ye sheisalye ge Pilatus ichi ge kitülütcho.

¹² Sehu ñeto yo Pilatusñe Herodes naksü üdrawlya. Ana madalu. Sevro ge naksü mahoğiw.

Pilatus í Jisu í shiweñe düm takyoa

¹³ Pilatus í mügaw saw-lyiw í seyo nuna na balañe ná che,

¹⁴ “Djo he nuna í nuna ná zeğoiwe cheñe nochi ge lakuda, seyo holašoa, no djó how a í dzü howšobi, se djo ha ñu yo iso ge külü joima, se ñu yobó no hasaje ichige külü mahohu;

¹⁵ Ge Herodes je mowbi, hado cheme í í nochi ge djültrutchodabi: seyo holašoa, i düm takyolaje shimdojo ana haje mada.

¹⁶ Sündada no í shidzü trabañebi”

¹⁷ Pilatus í rhanomko a nuna a tsüla vyedaw ye kihujababiñe lya.

¹⁸ Sündawñe vyew na šogzutsü, "I damtrüabei, seyo ibó Barabba i trajodawe."

¹⁹ I ñetrü a ye psegi-luñe, shiw-law dadaw ubo go pache ge shüñe vew.

²⁰ Sešo Pilatus i Jisu i trañoñe vyeñe nüna ná che hopüñetcho.

²¹ Sešo nabó šogzuñe che, "Í kuros ge külyiwe, kuros ge!"

²² I ülye dzü kuw ná che, "Hado cheme i ha mau damdoda? Nobó í düm takyoñe shimdojo lalo daw mahohubei! Sündada no í gidüñe trabañebya."

²³ Sešo na šogzu-šogzuñe zetsü, í kuros ge külyimdowneñe, sünda ná šozuw ye foajebi.

²⁴ Ha madanghulye: Pilatus i dügyeaha, na ha cheima sei dzülye dawwe cheñe.

²⁵ Seyo i se nüna vyesvye-vyemdolalye nüna shido í pache ge shüdaw ye, seyo djú í prüwma í trase; seyo Jisu í na nalu ge ha vyedama süna vyew apyew kuw djüki.

Jisu í kuros ge külyiw

²⁶ Na í lañe kakemkoi sese, Simon cheñe Kurení a ye ñetrü go kanglai sa a, í kigo lalye shokru giñe Jisuchi ge lakuñe ifum ifum la kake.

²⁷ Seyo nüna ye gumtchubabiñe ifum ifum kase: seyo šüpo upu mim na je, dju ibó üldjetchü gü gü kseñe ksekugiladjew.

²⁸ Jisu i nachi ge tcholtruñalye che, "He Yarusalem ayo sam nawa, nóbo djuksejoda; sešo djo josa seyo djó nudzoğbó ksejoda.

²⁹ Hadowo cheme se ñeto kakujome, seyosa a nüna na chejome, 'Šüvzüwme se na dju ügüzbümma, seyo dju saw-sam masakülyema seyo dju agü apu manuma.'

³⁰ Se ümdrü ge

'Na pu naje chejome, ñidru ge gaabe,

Seyo noğüfo yo ñi mušuiwe.'

³¹ "Hado cheme na shoñ djüw nadra ana damkoibi ye, krow nadra küna ha dañjema?"

³² Na seyo nüna ksü ije lalo datruw go idra ye shijoñe la jikye.

³³ Na se Kopri che Noğüfo ye jikuwñe, na sayo sa a í seyo se lalo datrudo ksü ye je, a ye ichi südzü go seyo a ye ichi fuvogo ge süna kuros ge külyiñe vye.

³⁴ Sündawñe Jisu i che, "He Awuwa, ná muchoaiwe, hadowo cheme he na madanghume na ha dangkoima?" Sünda na kako ge ği veñe i gye í habrağia lastü.

³⁵ Nüna na gudzu-gudzu hoğyo, seyo nugo na je zeaše-zeameñe ze ğyo, "I utro na ğaksülaw, i Tawgyew ichi Masimeje, seyo ichi dzulawmeje, nudzoğ ğaksülajo dawwe."

³⁶ Rhünokyew naje í trow uhu ye í nuñe zeaše-zeameñe che.

³⁷ "Senameje ba Yahudi nachi go nugomeje, ba bá nudzoğ í ğaksülabalya!"

³⁸ Seyo idru ge truw a chedalubi; "He í Yahudi na go nugome."

Shokru ge dru-lu vyegüdolaw lalobraw

³⁹ Ha lalobraw ye shokru ge külyi suntchadama, namko a yo a ye í zebze-zeğeñe che, "Hawa ba Masi moma? Sünameje ba balvyo ğaksüñe seyo ñiksü í je ğaksüila!"

⁴⁰ Sünchewñe utro a ye í zeñe che, "Hawa ba Tawgyew í je mağewbama? Ba je süna pabaibi,

⁴¹ Seyo ñiksü bó shotukobasha yo pangkobabi, hadowe cheme ñibó ñi chiğá ha dadama süna shishü pangkobi; séso i haje mau chiğá mada."

⁴² Sese i che, "He Jisua, ba bá ñetrü kakuwñe nó je dju košoawe."

⁴³ I í che, "No bá umsow chemkoime yow yo ba nodra sorgo nogo ge dujome."

Jisu í lutukyohuw

⁴⁴ Seyo muhumdzu yo dalalye me apyew djüdualai kuw ye vyew ñetrü na nukuğuatšüdabi,

⁴⁵ Seyo dru müsaw yebó je kañoahibi, seyo ñegru go gyeña bó je ulumko toñe-meñe yo gağaaajebi,

⁴⁶ Seyo Jisu í šüpyo gow yo šogzuñe che, "He Awuwwa, no nó ğulo ye bagzü ge trahime." Seyo i süna chelye ulvyu sese lutukyoaha.

⁴⁷ Ğyokrüw nüna ye sa a ha dadama se na holye i Tawgyew í tro, sündalye che, "He nüna ye güdrašobi."

⁴⁸ Seyo upu na he í hojoñe keğitsüdaw na, he šobošulyw dadaw í holyeñe nalüjetchü ge güñe kalütrü.

⁴⁹ Seyo ichi hosüw-holüw küña duma vyew, seyo mim na je dju dju idra Galili go jikusedama vyew, üğa ge gudzuñe se na ho ğyo.

Yusufi Jisu í iyo ğuahuw Arimitiya go nolu ge

⁵⁰ Seyo süge, Yusuf cheñe yo nüna a ye se rhano dew ge du, dju ye uw seyo chi danghuw muhu.

⁵¹ Seyo ichi vyéw seyo ichi chiğá daw yo malüşhüw; seyo i Yahudi na ñetrü go Arimitiya ge ğyow seyo Tawgyew ichi nogo ye ğyokrüw nüna.

⁵² I Pilatus ichi ge jiñe Jisu ichi ñimo ye prü,

⁵³ Seyo í lagaalye gyelüdü yo daw gyeña ge vašüñi, seyo nuğu a ye vye, se í ye kunu ge chido süna; seyo süge keje dju je mavyewlu.

⁵⁴ Se í ye dashüwtrüw ñeto, seyo gyogow rhano damivrojo ümdrü ge.

⁵⁵ Seyo se mim na dju idra Galili go jikusedama, ifum, ifum jiñe se nuğu ye ho seyo uso je ho í daw basha yo da vyedašomañe.

⁵⁶ Seyo kakultrüñe šowsa chi seyo šonuw dashütrü; seyo gyogow ñeto ge bó í je daw basha yo gyogo.

24

Jisu í üshükülyew

¹ Sopta uvro ge, sağa-müga na nuğu ge šowsa šow gañ-miği lañe jiku.

² Sünda na kunu í gñhuadaw hohu.

³ Sünda ulung ge jemyongkoi ge, na Prabu Jisu usso mahohubi.

⁴ I he ñu yo mavenghuañe gyoñbaiye, muhu ksü ye lütsü-lütsüw gye sheñe ütrü iñisa ge gudzu.

⁵ I gëñe, sünda nodo ge ukrumro í pelye; sündawñe í í che, “Ba üshü í dzüw namko ye hado tchüwwa.

⁶ I ayo a ñimme, séšo üshükülyedamme. I djo Galili ge ha trudama vehujodawe.

⁷ “Umsogo je nüna üsa í lalobraw nagzü ge kigo ladügyejobamme, sünda kuros ge tükegojome, sünda ñegi dzü ye üshükülyetchojome.”

⁸ Sünda í í ñu í vehuag,

⁹ Sünda nuğu go kangkoi ye í se güyo a ná, sünda utro naje, he vyow ñu ná truzeğiatsü.

¹⁰ Dju he ñu í shürhaw ná trudama, se na Mariam Magdalini seyo Yoana, seyo Yakub üyañ Mariyam sünda nadra ye utro mim naje duw.

¹¹ Séšo na ñu trudaw ye ná shipyew truw veduw velada sünda na ná umso mave.

¹² Sündawñe Patras í gudzulyiñe nuğu ge gyo dje, sünda gye ufobüla hohubadabi, sünda hadadama, se yo mavenghulyaha, í nudzo ñe ge kaltrutcho.

Imawus ġabo ge shürhaw na how

¹³ Sehu namko ye nüna ksü ye Imawus cheñe ñetrü ge jijnngkoi, Yarusalem yo kilo mitar mro kuw üga.

¹⁴ Sünda naksü se vyow ñu ná, hadadama se na naksügüтчü chitruñe ji.

¹⁵ Sünda naksü se ñu na naksügüтчü ge truğiñe dzüğiñe jingkoi ye, Jisu í iñisa jikuñe naksü üdra jisa.

¹⁶ Séšo nañi ye ana veduw mütrüdaw ye í mahosülañi.

¹⁷ Jisu í ná dzü, “He ha ñuwa, djoksügüтчü ge truñe jiñe.” I duhu dañe ġudzu.

¹⁸ He í dzühulyeñe, namko ye Kilyupas ñetrü go nüna a ye che, “Haña ba Yarusalem go ba akasa tüvaw jiw nünabamma, dju he ñeto ge hadadama se na se í madanghu.”

¹⁹ I í dzü, “Ha ñu ye wa?” Na í che, “Nazret go Jisu ibo dju Tawgyew seyo nüna nabo chiğa dawma sünda shi-ñu truw go ñihow truw.

²⁰ Sünda mügaw kew na seyo ñi dümbraw dakyew na í kigoladügyeñe, shibeñe dügyeaha; sünda kuros ge sümtchadügye.

²¹ Séšo ñi vyeksüwšo, í Israyel í mutchoaijo che, sünda he ñu na tralye, he sobošulyuw dajew ye ñeği dzü kujebi.

²² Sünda jimko ye je mim üchea na ñi mavenghuadügyeda, dju sağa-müga nuğu ge jidama na.

²³ Sé usso í mahohuwñe, sorgomuko nadra í üshüdame cheñe ñu truw che djekuda.

²⁴ Sündawñe ñimko yo a ye nuğu ge how ji, sünda mim na küna trudama, süna tchülada; séšo í mahohu.”

²⁵ Sündawñe Jisu í ná che, “O madzühoave dañe gyodaw nawa, seyo ñihow truw ná ñu ge üdrü-ulu yo umso dzüngahu nawa!

²⁶ Ana dajo mowma, Masi í duhu gilañe nudzo lüshüw ge kalyitralyejo?”

²⁷ Sünda í ná ibo go kako ge ha ġidama se ye Musa ichi yo dalalyeñe vyow ñihow truw nachi ge ġidaw na, í ná danghudügye.

²⁸ Aña sa a na hange jingkoima, se ñetrü jikujebi, sünda í dawyo na ana danghuda, í ayoje uvro ge jijolu cheñe.

²⁹ Sé na í ana cheñe ġokrüdügye, “Ñidra gyosajodawe; hado chemeje djüdu lyañe aña uwaladabi.” Sünda í ulung ge nadra gyosaw kamyoa.

³⁰ I nadra ava tsajoñe gyosangkoi ye, í odje í lañe gağüzü djü, seyo í takuğiñe ná djü.

³¹ Sündawñe nañi hojukülyeñe í hosülag, sünda na iñi how yo müšü.

³² Na nağüтчü ge che, “Ñidrü-ñilvyu ge mi madzoma, í ñi ġabo ge kako ge ġidaw ná truñe jomkooi ge?”

³³ I sa yo sa a gudzulyiñe Yarusalem ge katrükralye, sünda i se ġüyo a seyo nadra a yo na üšaka ye keġidaw hohu.

³⁴ Na che, “Tawgyew umsogo je üšhükülyetchoda, sünda Simon i hohu.”

³⁵ Sündawñe i ná ġabo ge chitru jidaw na ná tru seyo he je tru, i ná kúndañe odje í takuġiañe tsadama.

Jisu i í nudzo shürhaw nadra

³⁶ Na he ñu í trumkoi ye, Jisu í husü yo namko ye gudzukülye; sünda ná che, “Djo ġüdzüw pawe.”

³⁷ Séšo na mavenghuatsüg, seyo ġeatsüg, sündañe na velatsü, ñi mütü hohungkoi.

³⁸ I ná che, “Hado mavenghuatsüña? Sünda djulvyu ge hado mavenutsüña?”

³⁹ No gzü seyo noshi na howe, no sebamme; no kiñe hojodawe; hado chemeje ñeġulo nachi uso üġübye ñijo nochi ge hohumbo.”

⁴⁰ Ana chelyeñe ná i ichi ügzü ishi na she.

⁴¹ Ná lüshüw yo seyo umsojemañe veñe, seyo lümashü ve, sündawñe i ná dzü, “Haña djochi ge ava duma?”

⁴² Na í psekrow tchükro üsüla a djü.

⁴³ I lañe na how sa a tsag.

⁴⁴ Sünda i ná che, “He na no ñu name, no djodra ġyosañe truwme, Musa í shotuko ge seyo ñihow truw kuw na seyo kako ge nobo go ġidaw na umso kakülyejome.”

⁴⁵ Sünda i na ükye-ümüñi í ġüdraw ñu ġidaw dzüstüdügyejojñe voiha.

⁴⁶ Sünda ná che, “Ana ġidame Masi duhu gilañe seyo ñegi dzü ye dzüñe üšhükülyetchojome,

⁴⁷ Sünda Yarusalem yo dalalyeñe vyow ġübye geg vetrüw seyo lalo daw na iñiñ yo lañe tružeġiatsüjo.

⁴⁸ Djo he ñu na hohusawme.

⁴⁹ Sünda djuchi trašüġa no awu i dadama, se ná no djo lakülyaijome sünda udru go gow mapamdolu, süña kuw djo he ñetrü ge ġyokrüjo dawe.”

Jisu i ñedzü ge katcho

⁵⁰ Sünda i ná Betnyah kuw ñepse lañe jekülyasa, sünda ügzü i lañe ná gaġüzü djü;

⁵¹ Sünda ná gaġüzü djüshüñe i na yo utro lya seyo ñedzü ge kalyitralye.

⁵² Sünda na mraañe í šüpo lüshüw yo Yarusalem ge katrükralye.

⁵³ Sünda ná ñegru mamuduw keġiñe Tawgyew i troñe seyo gaġüzüwe.

Philemon iñiñ güdraw Polus üsam

Ġiw

He kako í Ġiw braw ye Polusme. He kako ha a Polus i Filemon í i Unesimus i ichi ge kitchojomeñe che sünda Kulu 4:9 ge Unesimus i Tukikus üddra Kulusse ge jimkoi sese Tulukus i Filemon i Polus ichi kako i djü. He ye šüvzüw ñume Polus i he kako i nudzo ügzü yo Ġidaw ichi gō vyow na shetsüjoñe.

Ġiw übraw ichi dzaga

Oje 60 kuw.

Filemon í he kako Ġingkoí ñeto ge Polus i Rom go pache ge shü veda.

Lajovo

Paulus i he kako ye Filemon í Ġida, Arkippus í girja ñe ge sünda ñi ñum Apphia í. Kako Ġidaw í holyeñe vemeje he kako ye Filemon í Ġibadabi.

Ha ma a vew

He kako í Ġiw ge Polus i Unesimus í i übraw ye ichi ge lakutchoweñe ve Ġidame (Unesimus ye Filemon ichi kulo tsaksulalye kaksudaw ye) sünda í sojai djudjüwe. (10-12, 17). Sünda sesüyo, Polus i Filemon í kulo veduw mowdaye “nudzo uñuw” veduw veweñe veda. (15-16). Unesimus i yaje Filemon ichi bo-luko ubo go lubi seyo Polus i ubo ġabo davoġoñ ve hado chemeje Filemon í lajovowene veñe. Polus i shi-ñu truw ubo sa Unesimus i Tawgyew í Ġaksüla. (File. 10).

Ñustu gow

Kahuahuw.

Udrüla

1. Abiwadan ____ 1:1-3

2. Abarokti ____ 1:4-7

Unesimus ubo ñu cheġüdraġiw ki ____ 1:8-22

Damdzualai shi-ñu ____ 1:23-25

Dašüvzüw

¹ Polus ichi go bó, se Jisu Masi ichi pache ge shüdaw nuna, seyo ñuw Timotiyus ichi ve go ñichi nülvo chiġadam Filemon,

² Seyo ñum Afya seyo ñidra yo shipashi Arkipusñe Filemon ichi ñe go ñešü na ñiñi.

³ Ñichi Tawgyew awuñe Tawgyew Jisu Masi naksü naksüchi vye go ġüdzüw ye bá pangudruwe.

Šüvzütroi ñe Küġüw

⁴ No shüwa Tawgyew í šüvzütrojome; seyo nudzo küġülai ge je bá vyehuwme.

⁵ Hado cheme no bachi sé nülvo seyo vyemso chi shi-ñu na dzühulye, se Tawgyew Jisu dru ge seyo vyew güdraw nuna nadra.

⁶ No küġüjome se vyemsodaw ge bachi üdra ayo na hadamje uw ñu ge danghusajo dawe ha ye Jisu Masi ichi yo ñidra dusama.

⁷ Hado cheme noñuwwa, nó bachi nülvo yo šüpyo lüshüw seyo ġüdzüw padame, sündada, ba yo dañe güdraw nuna nadrü-nalu hu je adjüdjüw no je aġimiw pajome, uñuw nawa.

Unesimus ibó küġüw

⁸ Sündada sedamje noje Jisu ge šüpyo bolu duda, se ha ñu ye udama, se í bá dügyejo.

⁹ Sedamje no vyeduw mukro Polus i se yabó Jisu Masi ibó pache ge ġyow nuna babi, se ayoje šüpyo nülvo yo ibó küġüjolu.

¹⁰ No nosaw Tawgyew go Unesimus ibó no yo nochi sülyeñtchü ge sakülye dame no yo küġüime.

¹¹ Se ibó ahuge ha madaġiw a ba, se yabó ba ñe seyo nochi dew chiġa tsüwbaba.

¹² Se í ñe seyo dju nolu ge kadama, no se í bachi ge djütülütchowba.

¹³ Í no nochi ge vyejoñe vyehomacha se í bó bachi vye go shüdabi shi-ñu ibó yo sülyeñtchü sumbo, nó datunowe.

¹⁴ Sé no ba mahusüw haje madaġoñ se bachi he nülvo djüdo ye datüdalüw yo mow lüshüw dawe.

¹⁵ Hado chemeje ha danghuñda i ba yo ksühua dzühua kuw he ibó utro lyadawa shüwa bañisa ge ġyojoñe.

¹⁶ Sešo ayogo kulo mavyeduw, kulo yo je dewfo, seyo ñuw vyeduw ġyowe se nochi drü-lü ge duw süna nülvobó sešo, se yabó usofu ge je seyo ġulo ge je, bachi je drü-lu ge sünda Tawgyew ge.

Filemon ichi dügyew dzüw lüshüljow

¹⁷ Senameje ba nó bachi nudzoġ dakyetunowñe vyedameje, se na vyeduw yo shutrolajodawe.

¹⁸ Chemeje se nó bachi ha damje damdalyoama semome sa a bachi ha damje a kakuw, se í nochi üñiñi ge ġiwe.

¹⁹ Polus no nó gzü yo ġijome, se i no bá ġigujome; seyo ichi chejoje ha madaġi, se no añawa he daado na badru me se i babamme.

²⁰ He no ñuwwa, he lüshüw nó bachi Tawgyewwa nó bachi go pawe, Tawgyew ge nodrü nolu ye hu je adjüdjüw no je aġimiw daiwe.

²¹ No bachi dügyew dafiw dajo umsow vyyeñe, bá ġimkoime seyo he ana danghuwme, se no ha cheima, ba se í foje lübzüw daijo.

²² Seyo he i je, nobó ġyojo buġo dashütrüvowe; no süna umsow vyedame, se bá küġüw trüdu yo noje no bachi ügzü ge djüjome.

Mülüñ šüvzüw

²³ Ifras se Jisu ge nodra pacheshüw ge

²⁴ Seyo se Markus ñe Aristikurs seyo Demas seyo Luka seyo no chiġadam.

²⁵ Ñichi Prabu Jisu Masi nülvow ye bachi ġulodra duwe. Amin.